

**SIXTH LEGISLATIVE ASSEMBLY OF MIZORAM  
( FIFTH SESSION )**

**LIST OF BUSINESS**

FOR NINTH SITTING ON MONDAY, THE 29<sup>th</sup> MARCH, 2010  
(Time 10:30 AM to 1:00 PM and 2:00 PM to 4:00 PM)

**MEMBERS PRESENT**

**Pu R. Romawia**, Speaker at the chair, Chief Minister, Deputy Speaker, 11 Ministers and 23 Members were present.

**QUESTIONS**

1. **QUESTIONS** entered in separate list to be asked and oral answers given.

**LAYING OF PAPER**

2. **PU LAL THANHAWLA** to lay on the Table of the House a copy each of the following.
  - (a) Finance Accounts for the year 2008-2009 relating to Government of Mizoram
  - (b) Appropriation Accounts for the year 2008-2009 relating to Government of Mizoram.
3. **Pu LALRINLIANA SAILO**, Minister to lay on the Table of the House a copy of correction of answer to Starred Question No.56 asked by Pu Lalduhawma, MLA on 23<sup>rd</sup> March, 2010.

**FINANCIAL BUSINESS**

**DISCUSSION AND VOTING ON DEMANDS**

4. **Pu LALSAWTA** to submit to the vote of the House various demands under his charge.
5. **Pu LALRINLIANA SAILO**, Minister to submit to the vote of the House various demands under his charge.

**S P E A K E R** : “Dik taka rorel a nihin mi tha an lawm a, misualte tan chuan hnara khawn ang a ni”.

Thufingte. 21:15

Zawhna leh chhanna hunah kan kal nghal ang a. Zawhna 116-na kan la ang a. Pu Lalthansanga zawt turin lo sawm ila.

**Pu LALTHANSANGA** : Pu Speaker, ka lawm e. Ka zawhna 116-na Food, Civil Supply & Consumer Affairs Department Minister chhan atan – (a)-na Ration Buhfai quota hi mimal pakhat hnenah engzata sem thin nge ? (b)-na Kum 2009-2010 chhunga sem dan min hrih thei em ?

**S P E A K E R** : Chhang turin a enkawltu Minister zahawm tak Pu H. Rohluna i lo sawm ang.

**Pu H. ROLHUNA, MINISTER** : Pu Speaker, Pu Lalthansanga, Member zahawm tak zawhna Starred Question 116-na chhanna chu hei hi a ni.

(a)-na Puitling pakhat tan Ration Buhfai kar khatah APL quota 2 Kg. emaw 3 Kg. emaw a semin naupang kum 11 leh a hnuailam tan puitling quota chanve-a sem a ni thin a.

Tin, helaiah hian APL mi bik turah kan ngai a, a zawhna hi. Amaherawhchu, BPL hi a hran a awm a. BPL hi card pakhat 35 Kg. thlakhatah hian pek a ni a.

Tin, AAY pawh chutiang tho chuan thlakhatah hian 35 Kg. pek a ni thin a.

Tin, (b)-na chhanna chu kum 2009 January atanga March 2009 thleng hi puitling pakhat tan 3 Kg. zela sem a ni a. March 2009 thla tawp lam second fortnight of March 2009 atanga August thlengin puitling pakhat tan 2 Kg. in sem a ni, September 2009 – January 2010 thleng puitling pakhat tan 3 Kg. in sem a ni leh, February 2010 atang khan puitling pakhat tan 2 Kg. in sem leh a ni.

**S P E A K E R** : Zawhbelhna Pu Lalthansanga, a dawtah Pu C. Ramhluna i lo sawm ang.

**Pu LALTHANSANGA** : Pu Speaker, ka lawm e. February thla a ka bial ka han kal khan 1 Kg. mi pakhat tan sem a ni a. Hemi hi ka zawh bik nachhan pawh hi 1 Kg. mi pakhat ah, 2 Kg. mi pakhat ah, a changin 3 Kg. te a ni a. Hei kudam politics hi a nasa em em a. Tuna i dinglama thute hian a

thalo te kha an va la chhuak a ni a. Chutiang chuan tuna i veilama thute hian a ruak zia an han ti leh a, 12.3.2010 khan ZNP thalaite khan kudam ruak an sawi a. A bikin thingtlangah hian ei bar a harsa hle mai a. Hman nia Agriculture Minister zahawm tak ka zawhna ah pawh 1990 leilet siam thei lo an awm a, leilet leh WRC bakah tlangramah an thar thalo em em a. Heng quota hian a bikin thingtlang lamah te dah tam theih a ni em? khatianga a sem dan tur mi pakhat chutiang chuan a ni ang, tia Central Norms emaw State ina a dan emaw nghet taka siam a nih loh chuan. A chhan chu thingtlang mite hian ni 1 ah wawi 3 chaw an ei a, chawfun nen chuan a tlem tham em em a. Mautam a ni a, mautam a zo a, khawkhengin a chhunzawm leh a. Chuvang chuan kha kha tul ka ti duh bawka. Tin, hemi weight bridge hi privatize tum niin ka hre deuh a, Serchhip amite pawh kha. Hemi ina an operate hi a khawl hi a tha reng em? tih ka zawt tel bawka. Hetia han tih hian truck lianah engzah nge an lak a, truck te 207 ah te engzah nge an lak, Pick up ah te engzat nge an lak, tih kha min hrilh thei em? Trip khat ah?

**S P E A K E R** : Pu C. Ramhluna i lo sawm ang.

**Pu C. RAMHLUNA** : Pu Speaker, ka zawh belh duh chu, ka bial chhung khaw hrang hrangah hmanni khan ka zu kal a. Karlui te, Sakei lui te, Chawngte lui te, Pandawng luiah te hian BPL family ten 35 Kg. an dawng ngai lova, 26/27 Kg. tih vel te hi an dawn dan tlangpui a ni. Minister zahawm tak hian lo en chiangin an dawn dan tur dik hian an dawng thei ang em? tih ka zawt a.

Tin, a pahnihna ah chuan Pu Speaker, Retailer te hian ka bial chhung ami khaw 16 Retailer te hian Vathuampui, Bungtlang, Vaseikai te hian kudam atangin Buhfai an la chhuak a. Mahse an khua an thlen lova, Vathuampui, Bungtlang, Vaseikai tih velah hian an sem chhuak mai thin a. Tichuan, khaw 16 ho hi khata tang khan chhipa phur turin an ti a. Ka zawt fo tawh thin a. Hei hi a phurh man an pe thei bawka si lova, wawiin ni thlengin. Chuti a nih chuan Pu Speaker, khaw 16 Retailer te hian anmahni khua ah ngei hian Buhfai hi thlenin anmahni khawchhung atang ngei khan an khulh tir theih ang em? tih kha ka zawt e.

**S P E A K E R** : Pu Lalduhawma a phar naa khawngaih takin zawt lo mai rawh se. Tunah Pu Rohluna, Minister chhang turin i lo sawm ang.

**Pu H. ROHLUNA, MINISTER** : Pu Speaker, Pu Lalthansanga, Member zahawm tak zawhbelhna kha February thla chhung khan a bial chhungah 1Kg. in thlatir lamah mi pakhat pek nia sawi hi a Department lam chuan kan lo hre hauh lova. 1 Kg. a pek tur a ni lova, 2 Kg. tal a ni tur a ni. Khatianga a awm a nih kha chuan kan lo in en chiang ang a, 2 Kg.-a pek tur a ni, puitling pakhat

tan. Naupang chu ½ Kg. a ni. Tin, thingtlang lamah a pek tam theih lawm ni ? tih kha – Nia, kan pe tam deuh thin a, a awm ang ang hi chu kan pe thin a ni. District Headquarters bikah hi chuan tlemin Buhfai dawr te a lo awm a, quota an kham loh deuh pawhin a lei theih deuh a, tiin. Thingtlang lam bik hi chu Buhfai zawrhna awm lohna hmun hi chu duhsak bik a, quota pawh tlema tih tam deuh an ni, tih kha ka chhanna ni sela.

Tin, Weigh Bridge chungchangah hian Serchhip hi chu a tha ang reng a. Amaherawhchu, privatize anga an kal takah hian, a kalpui tur te, a Department lam bakah Finance lam pawmpuina te a lo ngai a. Chuvangin install hnuah pawh kan hmang thei lawk lova, tunah erawh chuan hman a ni tawh a, tha takin a kal a. Tin, a Retailer te pawhin Weigh Bridge ami an la a nih chuan Electronic weigh Bridge a nih avangin a print a hi an carrying bill ah pawh hian an theh luh dawnin an telh ngei tur a ni, tih a ni a. Chuvang chuan Weigh Bridge kaltlang lova Retailer tena an lak te hi kan remti lova, chutiang chuan tha takin a kal a. A trip khat man te te kha chu ka lo in ring lova, ti maiin ka sawi thei lova. Sorkarin a rate pawh kan fix vek a, a tul a nih chuan ziak pawhin kan la in hriattir turah ka ngai a.

Tin, Pu C. Ramhluna, Member zahawm tak zawhna kha BPL te hi 27, 28 Kg. ten 35 Kg. dawng tur ni si, tia a bial lam a sawi kha a dik pawh a dik mai thei a. A chhan chu supply hi kan chhangchhe ang reng a, kilkhawr tak taka awm te kan ni a, kan in endik vek seng lova. Chu chu he House zahawm takah pawh hian phat rual a niin ka hre lova. Khawilai Retailer emaw ten an lo tihsual palh pawh a awm thei a.

Amaherawhchu, Member zahawm tak ten min hriatpui tura ka duh chu, hetiang thil dik lo an bial chungah a awm a nih chuan a rang thei angin, helaia sawi mai lo hian min hrih hria sela. Keimah a nih loh pawhin kan Department hotute pawh, a tul angin kan bawhzui zel a. Dik taka mipuiin an chanvo an dawn hi kan tum a ni a. Chumi tur chuan beih pawh kan bei nasa a, chumi tur chuan tan min lakpui tur pawhin ka sawm duh a. Sakei lui, Chawngte lui, Pandawng luite an ni a. Hengho hian 35 Kg. man hi chu an pe thin a, a man hi chuan. Mahse Buhfai tak tak hi 26/27 Kg. tih vel bak hi an dawng ngai lo tlangpui a. Va kal hian an lo complaint sup sup mai a. Ni e, kan Minister zahawm tak hi personally in ka hriattir hman lova, ka lo haw na kha a la rei vak lova, min lo ngaithiam sela. Tun tum hi remchangah lain he House ah hian ka'n hriattir a ni, an surprise deuh pawh a ni mai thei a, min ngaithiam sela. Mahse mipuiten an mamawh hun a nih avangin kan ti lo thei lova, ka han zawt a ni e. Pu Speaker, a theih ang angin hei hi chu siam dik pawh kan tum a, tan pawh kan la a, Retailer te pawh dik taka ti turin kan inti a. Amaherawhchu, kalphung a lo dik tawh lova, ngaia neih chin pawh a tam a. Chuvangin vawi leh khata siam that mai hi a har a, theih tawp erawh chu kan chhuah zui zel a ni, tih ka hriattir duh a. Tin, Vaseikai tih velah te pawh chutiang chu a nih avangin heng hi chu kan lo enzui ang a, tun aia dik zawkin tan kan lo la ang e, tih ka han sawi duh a.

Tin, chu lovah chuan Head load bill kan Member zahawm tak hian session apiang hian a zawt a, a ngai pawimawh a, a chhan pawh kan in chhang tawh a, hei hi a pawimawh khawp reng a. Retailer hnenah lo hi chuan a Head load bill hi bial chhunga mi mal te te te hi sorkarin direct in a bill hi pek theih dan kan nei lova. Chuvang chuan a Retailer through lo hi chuan kan pe thei lova, Retailer hnena bill kan pek hi hemi Head Loaders tak tak kan han tih mahni eitur phur, mahni khua piah lam deuh a Centre-a va la te Retailer ten an lo pelo a nih chuan chulai erawh chu sorkar lamin kan hriatpui meuh lova. Amaherawhchu, a tul ang angin session hnunung berah pawh khan ka ngen tawhin ka hria a. Bialtu MLA te ngei pawhin hei hi a Retailer te pawh khatianga mimal harsatna nei te an awm chuan an pek theihna tur atana tan min lo lak puia hma min lo lak pui tur pawhin ka ngen duh a. A chhan chu Retailer te hian anmahni khua ah la lo hian khing thingtlang kilkhawr zual deuh, a bik takin Pu C. Ramhluna bial lamah te pheih chuan motor-a kal mai theih lohna te, Retailer tena a khuaa an va lakna, mahse a Retailer te takin a khua thlen si lova a eitu tur a tena Head load-a an va lakna khua te pawh kha a awm a ni tih ka hria a. Chungah te pawh chuan a Retailer te hian a bill la vek si hian anmahni eitur phurtute hi an lo pe lo a nih chuan khang te pawh kha a tul dan angin action lak zui te pawh a thain ka ring a. Chungte pawh chu Chiangkuang deuh hlek zawkin nakin session lo ah te pawh hian min han hriattir thei se ka lawm khawp ang. Chu chu ka chhan theihna tawh a ni e. Pu Speaker.

**S P E A K E R** : Tunah Starred Question No.117-na zawt turin Pu Lalthansanga i lo ko ang.

**Pu LALTHANSANGA** : Pu Speaker, ka lawm e. Printing & Stationery changtu Minister zahawm tak chhan atan - Starred Question No.117-na (a) Printing & Stationery Department chungchangah hian sorkar hian engtianga hma lak nge a tum ?

(b) Sorkar hian Printing & Stationery Department atang chauhin Stationery Article indent turin thuchhuah a nei thin em ?

(c) Thlatin sale engzat nge ?

**Pu P.C. ZORAM SANGLIANA, MINISTER:** Pu Speaker, Hrangturzo bialtu Pu Lalthansanga zawhna chhanna chu –

(a) Printing & Stationery Department thumthat chungchangah sorkarin kawng hrang hrangin hma a la mek.

(b) Printing & Stationery Department Depot atang chauhin Stationery Article indent turin sorkarin vawi duailo thuchhuah a nei tawh thin.

(c) April 2009 – January 2010 inkara chhanna a ni a. Department hian Depot 3 kan nei a. Chutah sale chawhrualin April 2009 – January 2010 inkarah hian Rs. 3,80,590 a ni e.

**Pu LALTHANSANGA** : Pu Speaker, zawhbelhna – Demand ah kan sawi tawh na a, Chief Secretary pawhin vawi 2 lai thuchhuah a nei tawh a. Mahse ‘an zawm love’ tih te kan hre thin a. Chumi rual chuan a Department dang ho hian “Printing & Stationery Depot ami hi a quality a chhe bawk a. Tin, kan duh ang an nei lo a ni” tih hi an tan chhan a ni a. A dikna chen a awmin ka ring a. Kan Minister hian a wind up naah party mite induhsakna atan kan duh ve kan tih hian engmah a tih theih loh a ti. Chumi ah chuan party induhsakna a kal thin a. Tichuan Supply Order hmutute hian khawimaw laia an condemned tawh, an duh tawh loh te an supply a, Department in a pawm lo thei si lova. Chutiang avang chuan kha, hmanni ah khuti lai Luangmual Depot a tlawh pawh khan nuai 27 man lai mai kha chhia a awm tawh a ni a. Kum te a lo thar dawn a, thian thenkhat ten an rawt tawh a, O.E. atang ten a la khawm a ni, tiin.

Hei Printing & Stationery Department hi Sick Department ah kan chhuah leh dawn a ni mai a. Keimahni hi a chhuah tute kan ni deuh zel a, sorkar hian. Chuvang chuan kum tharah chuan quality tha zawk, an duh dan zawt a, supply te pawh Order siam a kal kha a tha mai awm mang e aw, tih kha. Hemi Department dang dangin chhuanlam an han siamna te pawh kha chutiang chuan hma a lak theih lawm ni? tih te kha Pu Speaker, ka’n thurawn ve duh a. Chu chu kum 2009–2010, 2008-2010 hi a ni ang chu, ka zawh tum tak a ni a. Supply engzah hi nge maw kan sorkar thar hian a pek ve tawh kha? tih kha ka zawt duh a. Hetia min chhan theih mai loh pawhin ziakin nakinah min chhang se, tih kha ka’n zawh belh a ni e.

**S P E A K E R** : Chhang turin Pu P.C. Zoram Sangliana, Minister i lo sawm ang.

**Pu P.C. ZORAM SANGLIANA, MINISTER:** Pu Speaker, Hrangturzo bialtu zahawm takin a sawi ang khan Consultative Committee ah te pawh kan pharh a, 26 August 2009-a kan report hnuhnung bera a lan dan kha chuan Stock Value hi cheng nuai 270 man ngawt kha a lo awm a ni. Chutah chuan chung ang te chu kan han chinfel vel lai khan thlatina Department hrang hrang ina indent an lak kha nuai li leh singhnih sangnga chauh a ni mai si a. Chu chu Depot kan mangang a, sorkarin siamthat a duh si a. Consultative Committee te pawhin min ngaihpawimawh sak em em a.

Sorkar Office Memorandum ah hian Department tin te hian Printing & Stationery atang chauhin indent la tawh rawh se, tih hi 19.11.1997 te, ni 2.9.1998 ah te, 13.7.2004 ah te, 21.11.2006 ah te, 20.12.2007 ah te, 9.9.2009 ah te a chhuah tawh nghe nghe a ni. A chhuahna copy te pawh chu

kan nei na a, mahse copy inpek kha a that ka ring lova. Tuna Member zahawm takin a rawn sawi/thurawn ang deuh khan, Department hian an chhuanlam siamah chuan leh a Supplier tute pawh an ni tel a. Hetah hian quality thalo min pe thin a ni, an ti a. Chumi taka chu kan ngai pawimawh a, sorkar thar hian October thla atang phei kha chuan indent thar hi pakhat mah hi a pe ta lo a. Member zahawm takin a rawn duh a kha kan lo inbuatsaih lova, a tih ang khan nakinah session chhung la la pawh hian kan peih theih chuan kan pe dawn nia, tih ka sawi tel duh a. Chutah chuan khatiang ang a ni kha, “A hmunah enfiah teh u,” kan ti ta a. Uluk takin kan Officer te leh Technical miten an han thlir a.

Nichina Pu Speaker, ka han sawi ang khan nuai 270 ngawt stock lo awm tawh atang khan engzatnge hralh tlak awm tih an han chhut khan, “Nuai 26 man hi chu a la awm ang a,” tih a ni. Hei hi House-a ka information pawimawh tak a nih avangin sawi tel ka duh a. Tichuan, quotation te call-in dan ang takin hma an han la ta a. A chhang sang ber kha a pek loh theih loh a, chuta kan lakluh tur a hi a nuihzat thlak a ni. Chu chu enge a chhan chu wind up naah kan sawi tawh a, indent tur ten an rawn indent loh vang te a ni a. Tin, kan quality hi a tha hi kan assured ngam a ni. Consultative Committee ah Minister-in Department a hriattir naah pawh a tul a nih phei chuan direct-in a factory hmunah pawh kan la lut ang ti hialin hetah hian hma kan lak dan a ni tel a ni, tih pawh ka sawi duh a. Tahchuan quality keimah ngei pawhin a hmuna ka zu en naah te pawh a awm chhun te chu a tha a. Hmannia House-a kan sawi tawh ang khan thil nuihzat thlak tak enge Toilet Bus tih ang te, feet 12 bial khat dawn mai anga lo awm ang deuh te kha chu a chi lo khawp mai. Khangte phei chu tih tawp vek mai kan tum a, kan Depot hmuna miten an neih loh leh Sorkar Department hrang hrangin an report ang chin chauh a hi tunhnu ah chuan indent siam kan tum tawh a. Hei hi Consultative Committee-in Department te a advice kha a ni a. Chutiang chuan hma kan lo la a, a bultanna tur atan chung stock, suma la chantir theih tur angte kha kan han chantir chho mek a ni e.

**S P E A K E R** : Tunah Starred Question 118-na zawt turin Pu P.P. Thawla i lo sawm ang.

**Pu P.P. THAWLA** : Pu Speaker, ka lawm e. Minister for Taxation Department chhan atana ka zawhna pakhatna - Mizoram Taxation Department hi zone engzatah nge then a nih? Pahnihna - Lunglei Zonal Office ah hian Assistant Commissioner of Tax hi a takin a awm ve tawh em? tih hi a ni.

**S P E A K E R** : A chhang turin a changtu Minister zahawm tak Pu Lalsawta i lo sawm ang.

**Pu LALSAWTA, MINISTER** : Pu Speaker, Member zahawm tak Pu P.P. Thawla zawhna pakhatna chhanna chu – Mizoram pum hi zone 4 ah then a ni a. Chungte chu : (1) Aizawl North zone (2) Aizawl South zone (3) Aizawl Central zone leh (4) Lunglei zone te an ni a. Tin, a zawhna pahnihana Lunglei Zonal Office ah hian Assistant Commissioner of Taxes a takin a awm ve tawh em, tih chhanna chu hei hi a ni. “Awm ve tawh e” Amaherawhchu, Aizawl Central Zone ah Assistant Commissioner of Taxes post a awm loh avang leh Lunglei Zone aia hna a tam zawk em avangin Assistant Commissioner of Taxes Lunglei Zone a thawk lai chu Aizawl Central Zone ah transfer a ni, tih kha ka chhanna chu a ni.

**S P E A K E R** : Zawhbelhna – Pu P.P. Thawla i lo sawm leh ang.

**Pu P.P. THAWLA** : Pu Speaker, ka zawh belh duh chu District Headquarters-a Taxation Office te hi Zonal Office-a up-grade tumna a awm em ? tih leh Lunglei Assistant Commissioner of Taxes kha tuna a post luah rihah hian midang dah mai tur hi a la awm rih lo em ni ? tih hi ka zawh belh e.

**S P E A K E R** : A chhang turin Minister i lo sawm ang.

**Pu LALSAWTA, MINISTER** : Pu Speaker, zawhbelhna han chhanna kha chu tiang hi a ni awm e. A chhan chu “Kan Department-a kan Organisation chungchangah District tina Zone nei tur zawng hian kan la inbuatsaih lova, nichina kan chhan tawhna ang khan Mizoram pum hi zone pali ah kan then a. Tin, Taxation chungchangah hi chuan khatiang activity tamna kha kan ngai pawimawh lo thei lova, chuvangin Aizawl Zone pawh hi Zone thum laiah kan siam a, activity tlem deuhna Lunglei lampang kha Zone pakhatin a va tuam ve kha a ni mai a. Chuvangin District tina Zone ang zawng khan chuan buatsaihna kan nei lova, mahse heng zone hnuai ah hian (1) Serchhip Circle te (2) Champhai Circle te (3) Kolasib Circle te (4) Mamit Circle te (5) Lawngtlai Circle te (6) Saiha Circle te kan han siam a. Chutiang chuan mawhphurhna neiin Taxation chungchanga a viltu kan han inbuatsaih ve thlih thliah a. Tin, chung bakah chuan Check Gate kan tih hi Mizoramah hmun parukah kan buatsaih a, chung hote chu – (1) Vairengte ah te (2) Zemabawk ah te (3) Tlabung ah te (4) Bairabi ah leh (5) Zawlnuam ah te Gate kan buatsaih bawk a. Mihring kan la indaih loh avang hian kan duh ang tak hi chuan Officer te kan la in dah kim tha hlei thei lo a ni tih kha, Pu Speaker, ka chhanna a ni e.

**S P E A K E R** : Starred Question 119-na zawt turin Pu P.P. Thawla i lo sawm ang.



**Pu P.P. THAWLA** : Pu Speaker, ka lawm e. Hon'ble Minister for Taxation Department chhan atana ka zawhna Starred Question No.119-na chu – Mizoram ah kum 2009 leh 2010 chhunga Tax pe tam ber, pe hnem ber tunge ni? Cheng engzat nge a pek? tih ka zawt e.

**S P E A K E R** : A chhang turin Pu Lalsawta Taxation Minister i lo sawm ang.

**Pu LALSAWTA, MINISTER** : Pu Speaker, Member zahawm tak Pu P.P. Thawla zawhna kum 2009 leh 2010 – Hei hi kan la zo lo deuh hlek a, mahse tuna bak ang hi chu a record han luahlan tur ang hi chu an awm chuang lovang a. Kum 2009-2010 chhunga Tax pe hnem ber tunge ni, cheng engzat nge a pek, tih chhanna chu - Mizoram pumpuia kum 2009-2010, (hei hi March ni 15 thleng kha a ni lo thei lova) chhunga Tax pe tam ber chu Indian Oil Corporation Limited, Assam Oil Division, Vairengte a ni a. A Tax pek zat chu cheng nuai 1,670 leh singthum sangthum leh sawmhnihpali (Rs.16,70,33,024/-) a ni. Hei hi Petroleum products an hralhna atanga Sales Tax an pek a ni.

**Pu P.P. THAWLA** : Pu Speaker, ka'n zawh belh duh chu, Tax lak chungchanga kan sorkar hmalakna hi a tha tawk maiin a hriat em? tih leh tun aia tha zawka hmalak tumna dan thar te kan nei em? tih ka zawt e.

**Pu LALSAWTA, MINISTER** : Pu Speaker, a chhanna kha lo inbuatsaih lawk hleihtheih vak pawh a ni lova. Khawvel ram changkang ber berah pawh Tax lak danah te hi chuan improvement tha zawka tih ngaihtuahna hi a awm reng a. Mizoram ah pawh hian kan Party Manifesto ah pawh Commercial Taxes, Land Taxes leh Building Taxes thlengin, Tui Taxes te, Utility services Taxes te, a siam leh lak dan te tha zawka buatsaih tumin, kan Manifesto-a kan tarlan angin tunah hian hmalak mek a ni a. Tuna kan dinhmunah chuan kan duh ang chiah chu nilo mahse a tha zawk, remchang zawk leh mipui tana awlsam zawka lak theih dan tur kan buatsaih chho mek a. Vawiina kan han chhanna Indian Oil Corporation, Assam Division hian a pe a ni lova, hmun hrang hrang atang ami pek khawm kha sorkarah a chhunglut mai a ni a. Tax pe tia record kan han record tam tak hi anmahni pek a ni lova, mipuite pek an kawl khawm, sorkara an chhun luh mai a ni tih kha, ka'n sawi tel nghal bawk a ni. Ka lawm e.

**S P E A K E R** : Starred Question No.120-na zawt turin Pu K. Liantlinga i lo sawm ang.

**Pu K. LIANTLINGA** : Pu Speaker, ka lawm e. Starred Question No.120-na, Home Minister zahawm tak ka zawhna chu hei hi a ni.

(a) Bru ral tlante repatriation chungchangah hian sorkarin eng ang ruahmanna nge a siam ?

(b) Eng hun chhungin nge chinfel theih a in rin ?

**S P E A K E R** : A chhang turin Minister zahawm tak Pu R. Lalzirliana, Home changtu i lo sawm ang.

**Pu R. LALZIRLIANA, MINISTER** : Pu Speaker, Pu K. Liantlinga, MLA zahawm tak zawhna chhanna –

(a)-na Bru ral tlante lakluh/lakletna tur hian Mizoram sorkar hian Road Map a siam a, Ministry of Home Affairs, Government of India pawhin a principle-in a pawmpui bawk a ni.

(b)-na Harsatna a la awm deuh avangin a chinfel theih hun hi a la sawi theih loh.

**S P E A K E R** : Zawhbelhna - Pu K. Liantlinga i lo sawm ang.

**Pu K. LIANTLINGA** : Pu Speaker, ka lawm e. Hemi Bru ral tlante repatriation thuah hian Central atang khan sum kha anrawn pe niin kan lo hria a. Kha kha engzat nge tih leh tun dinhmunah hian engzat nge kha sum ah khan hman tawh a ni a, engzat nge a balance la awm ? tih kha a ni a. Tin, a pathumna atan chuan repatriation atana Mizoram sorkarin proposal a siam te kha min hrilh thei ang em ? tih a ni.

**S P E A K E R** : A chhang turin Minister i lo ko ang.

**Pu R. LALZIRLIANA, MINISTER** : Pu Speaker, Central hian hemi repatriation atana Road Map siamah hian cheng khat mah a takin min la pe lova. Khata tana ruahman chu crore 25 leh nuai 87 a ni a. Hei hi a takin kan hnen a la thleng lo a ni. Tichuan, hemi laklet theih lohna a Road Map Repatriation atana an han buatsaihah hian Bru Co-ordination Committee te leh Bru Displaced People Forum te nen hian inbiak thin a ni a, vawi duai lo inbiak tawh a ni a. Anni hian duh dan khirh tak tak an nei ve a. Chung anga kan sorkarin a tih theih bak chu Central ah hian thlen thin a ni a. Tichuan, tunah hian Mamit District ah hian khaw khatah in 500 te awm turin demand an siam a. Kha kha helam atanga ngaihtuahin khawi ami mah lo an nei dawn lova, a lo awm sa te nen. Chuvangin khatiang kha tih theih a ni lova, a harsa a ni.

Tin, chutiang bakah Central Security Force te anmahni veng turin an beisei a. Chutiang bakah chuan Special Project, a hmaa hel tlem azawng, 800 leh tih lo lut vel, khatieng anga Special Project an hmuh ang a kha extent sak turin an beisei a. Chutiang ang chu kan tih theih bik loh avang leh kumin kal taa laklet leh tur nia kan han tih laiin, khulam ah incident te a lo awm leh avangin tunah hian laklet theih an ni ta lo a ni. Chu chu a ni deuh mai.

**S P E A K E R** : Zawhbelhna – Pu Lalduhawma i lo sawm ang.

**Pu LALDUHAWMA** : Pu Speaker, Bru issue hi thil sensitive tak a ni a, rei tak kan buaipui tawh a. Kan lo buaipui tawh thin danah hian NGO te leh Political Party te hian politics khelth nan leh inchirhtheh nan te hman a lo ni tawh thin a. Hei hi a fel lo hlein ka hria a. Hnam issue a ni a, concious taka kan kal hi a fuh ka ring a. Chuvangin hemi chungchanga kan kal chhohna turah hian Home Minister zahawm tak hian Political Party hrang hrangte mai ni lovin, NGO concern deuh deuh te nen ngun taka ngaihtuah tlan a, hmalak hi a tum em ?, tih ka zawt duh a. Chuti a nih loh chuan kan inpuh thin a, kan tel vekna a nih erawh chuan kan inpuh thei lovang. He thilah hian kan inpuh chuan a pawh dawn tlatin ka hria a. Hnam thil a nih avangin lungrual taka ke kan pen theihna kawng hi sorkarin a dap chho thei zel ang em ?, tih ka zawt a ni.

**S P E A K E R** : Chhang turin Home Minister i lo sawm ang.

**Pu R. LALZIRLIANA, MINISTER** : Pu Speaker, rawtna lawmawm tak a ni a. Khatieng ang khan political issue-a lak chi ni miah lo, hnam issue thil tak tak a ni a. Lungrual taka kal kan duh a. Chumi avang chuan Political Party tum hnih NGO te nen kan lo ko khawm tawh a. Amaherawhchu, keini duh dan ngawt kha a tlang theih loh avangin anni hi zualkona nei nia an in hriat avangin heti hian an ti zel rih a. Chuvang chuan kan duh ang a tlang bik lova, an duh ang a tlang bik lova. Tunah hian hei hi kan la thleng rih chu a ni a. Chuvangin, tunhnu ah pawh political issue a la lova, Political Party leh NGO te tangrual zel turin, a tul chuan kan rawn zel ang, tih ka sawi duh a ni.

**S P E A K E R** : Zawhna No.121-na zawt turin Pu K. Liantlinga i lo sawm ang.

**Pu K. LIANTLINGA** : Pu Speaker, ka lawm e. Fisheries Department Minister zahawm tak ka zawhna Starred Question No.121-na chu hei hi a ni. Mizoram chhunga Sangha dil 7469 zet te hian kum khat chhungin Sangha quintal engzat nge an thar chhuah ?

**S P E A K E R** : Chhang turin Minister zahawm tak Pu H. Liansailova, Fisheries changtu i lo sawm ang.

**Pu H. LIANSILOVA, MINISTER** : Pu Speaker, Member zahawm tak Pu K. Liantlinga zawhna chhanna chu - Mizoram chhunga Sangha dil 7469 atang hian kum 2008-2009 chhungin Sangha 2890 M.T. vel thar chhuaha chhut a ni.

**S P E A K E R** : Zawhbelhna - Pu K. Liantlinga i lo sawm ang.

**Pu K. LIANTLINGA** : Pu Speaker, ka lawm e. Sangha dil hi kan ngah hle mai a, 2890 M.T. lai kan thar a nih chuan heng ang kuthnathawk tute tan hian a hralh chhuahna hmun tur a market hmun lai bik Aizawl emaw, Lunglei ah emaw hian siam sak bikna kan nei em? Tin, heng thar chhuah te hi phailam atanga lak te aia tlema a hnathawkte hi han duhsak bikna leh hmun tha han ruahman sakna kha kan nei em? tih kha ka han zawh belhna a ni e.

**S P E A K E R** : A chhang turin Minister i lo ko ang.

**Pu H. LIANSILOVA, MINISTER:** Pu Speaker, heng kan ram atanga thar chhuah te Sangha zawrhna tur hmun bik siam hi Department lam chuan a ngai pawimawh viau a. Mahse, market area tak hi Trade & Commerce kut a ni a, anmahni te nen inbia in Champhai hmunah hian siam a ni a. Tin, Aizawl New Market ah pawh siam a ni a. Chutiang chuan Lunglei lamah leh hmun dangah pawh a theih chin chin-a Trade & Commerce te nen inrawn a, hmalak tum a ni e.

**S P E A K E R** : Tunah chuan Starred Question No.122-na zawt turin Pu Lalduhawma i lo sawm ang.

**Pu LALDUHAWMA** : Pu Speaker, Law & Judicial Department changtu Minister zahawm tak chhan atan ka zawhna –

(a) The Mizo Divorce Ordinance, 2008 kha engvanga siam nge?

(b) He Ordinance hi a thi ta mai em ni?

**S P E A K E R** : A chhang turin Minister zahawm tak Pu Lalsawta, Law & Judicial changtu i lo sawm ang.

**Pu LALSAWTA, MINISTER** : Pu Speaker, Member zahawm tak Pu Lalduhawma zawhna chhanna –

(a) The Mizo Divorce Ordinance, 2008 kha engvanga siam nge?, tih chhanna chu hetiang hi a ni – “Mizo Hnam Dan hnuai inthenna hi tha tawkw lova hriat a nih avangin Mizo Divorce Ordinance, 2008 kha siam a ni” tih a ni a.

(b) He Ordinance hi a thi ta mai em ni ?, tih chhanna chu hetiang hi a ni - The Mizo Divorce Ordinance, 2008 hi Mizoram Gazetted ah kum 2008 October ni 6 khan chhuah a ni a, hman theih nghal tura chhuah a ni a. Amaherawhchu, India ram Constitution kan Dan pui ber Article 213-na ina Ordinance te chungchanga a lo phut angin he Dan hi hetiang hman theih a lo niha hman a lo nih tawh hnuah hian Assembly Session hmasa berah tih nun emaw, tih thih emaw tura tih a ni a. Tichuan December ni 16-a Mizoram Legislative Assembly kum 2008-a kan thut khan he Dan hi chutianga ti nung tur emaw, ti thi tur emawa engmah action lak a ni lova. Tin, he Dan hrim hrim a hi sorkar hmasa hun lai khan hmanhmawh deuh hleka an lo buatsaih a ni a. Keimahni pawhin kan han en ve a, tihian kan duh ang tawkw, tlin lohna a neih ve teuh avangin leh famkim tawkw lova hriat a nih avangin tunah hian Mizoram Law Commission in a lo zir chian tur atana Law Commission-a dah a ni.

**S P E A K E R** : Zawhbelhna – Pu Lalduhawma i lo sawm ang.

**Pu LALDUHAWMA** : Pu Speaker, he Ordinance a thi hi lawmawm ka ti khawp mai a. Kan Customary Law a ni a. Article 371 G ina min protect sak a ni bawkw a. Chu chu kan siam tha dawn a nih chuan MUP te leh tutu te emawrawn a, House ah hian nasa taka kan discuss hnuah chauh siamthat tur a ni a. Chuti ni lova, Ordinance -a min deng ringawt hi a fello ka ti tak zet zet a. Thil hmanhmawh thlakah Ordinance hi siam a ni a. Hei hi hmanhmawh thlakna engmah a awm lova, pawisa liam tur pawh a awm lova. Chuvang chuan khatih laia ngaihtuahna kha eng ber hi nge maw le tih kha, engtizia nge kan hnam dan chungchang pawimawh tak mai, House ah pawh debate reng reng loh a, Ordinance a, hetiang anga an lo tih mai theih? Tute ngaihtuahna atangin nge a lo zik chhuah? Kan hnam pawh a khawih thei a ni. Tin, a hnuah umzui leh duh miah bawkw si lo, ngai pawimawh duh leh miah si lova, expire tir leh mai mai bawkw si hi, tih lai a kha, arawn zik chhuah dan a kha, engemaw chhanna mumal leh zual deuh a kha ka la beisei cheu a.

Tin, tuna Law Commission-a an han chai mekah pawh hian kan hnam dan te ngaihtuah rengin arawn tul te rawnin, a lo kal leh dawn a nih pawhin Ordinance ni lovin, Bill-in muangmar in heta kan sawiho theih tur hian anrawn buatsaih tawh tur a ni thei ang em? tih kha ka zawt a ni.

**S P E A K E R** : A chhang turin Minister i lo ko ang.

**Pu LALSAWTA, MINISTER** : Pu Speaker, zawhbelhna chhanna kha kan chhan theih loh thil a ni tlat mai a. A chhan chu kan sorkar hmasa hun laia buatsaih leh an ngaihtuahna atanga lo piang chhuak a nih avangin a chhang turin anni vawiin lamah an awm tawh si lova, kan chhang thei lova. Bawhzui loh chhan chungchangah chuan nichinah pawh khan ka chhang tawhin ka hria a. Kan han enchian hian tha tawh lovin kan hria a, tin, zau zawka inrawn tulin kan hre bawh a. Chu chu Law Commission ah pawh kan dah chhan ber a ni a.

Tin, zawhbelhna pathumna Law Commission ah hei a awm ta a. Law Commission hian zau zawk leh a rawn tur angte pawh rawn kim zawkin a ti thei lawm ni ? tih a rawn zawhna kha chu a pawimawh kan ti a. Chutiang taka ngaihtuahna lo hmang tur chuan kei pawhin Law Commission Chairman hnenah thu ka lo hlan chhawng ve leh ang e.

**S P E A K E R** : Tunah Starred Question No.123-na zawt turin Pu Lalduhawma i lo ko ang.

**Pu LALDUHAWMA** : Pu Speaker, Home Minister zahawm tak chhan atan - Mizoram ah police ten Non-Banking 19 lai an chhui chhuah tawh hnuah hian sorkarin mipuite hnenah thurawn engemaw tal pek a ni tawh em ? tih a ni.

**S P E A K E R** : Chhang turin Pu R. Lalzirliana, Home Minister i lo ko ang.

**Pu R. LALZIRLIANA, MINISTER** : Pu Speaker, Member zahawm tak Pu Lalduhawma zawhna chhanna chu hei hi a ni –

Sum peipunna thianghlim lo leh tha loa fimkhur turin police te, mipuite hnenah thurawn pek thin a ni. Police ten pawisa dah chungchangah hian company dik lo leh phuachawp awm thei a nih leh mipui fimkhur a, hriat chian lovah tuman pawisa dah loh a tha, tiin fimkhur turin Press hand out siam thin a ni a. Press mite nen pawh S.P Aizawl-in vawili aia tlem lo sawihona a neih pui tawh a. Tuna tarlan 19 te hi an dinhmun hriatfiah tumin hma lak mek a ni a. Dik lo an awm chuan sorkarin a phu tawh angin hma lak a tum a ni, tih ka chhanna a ni.

**S P E A K E R** : Zawhbelhna – Pu Lalduhawma i lo sawm ang.

**Pu LALDUHAWMA** : Pu Speaker, a lawmawm a, khang bakah khan a thar hi an awm zel ni te pawh hian a lang a. Thingtlang lamah te pawh hian tutu ten emaw an la bum leh mek zel ni te hian a lang a. Chuvang chuan a

Department hian hei hi chu mipui an chetsual leh hma hian. Kha, tuna mipui an lo hriattirna te kha kan han hria a, a lawmawm a, kei ka lo hre ve mang lova, ka bengvar loh vang nge ni. Department atangin spokesman te pawh siamin TV ah te pawh hian mi ngaih pawimawh hlawh leh zual tur zawnga awareness rawn tih chhuah zel kha kan ti thei ang em? tih ka zawhbelh duh a.

Tin, Pu Speaker, ka zawh belh leh duh chu vawiina ka question a chhuak hman lo tur hi supplementary ah kan hmang mai ang a, a in puahchah thovin ka ring a. Suangpuilawn kidnap case kha kan sawi tawh thin a, tun session ah pawh “Sorkar hmasain Enquiry Commission a din a, an hmuh ang ang kha a ni zo tawh a, tihngaihna kan hre tawh lo”, tih hi chhanna kan dawn a ni a. Sorkar hmasa ina Enquiry Commission Suangpuilawn kidnap case chungchanga a siam hi ka la hre ve lo reng reng.

Pu Speaker, tuna Home Minister zahawm tak nena he House-a kan sawi chhui tura Enquiry siam kha chu a awm a, hei hi a ni a. Hetah hian suangpuilawn case kha chu a tel lo hrim hrim a. Suangpuilawn case kha chu police in FIR te an siam a, an chhui mai kha a ni zawk a. Enquiry Commission lam kha a thlengin ka hre lova. Kha kha final report an pe ta nge, an chargesheet ta nge? A tawp dan tal kha mipui hriatah kan phut mai a ni. Kha kha min hrih thei ang em?

**S P E A K E R** : A chhan theih dan ang anga chhang turin Home Minister i lo ko ang..

**Pu R. LALZIRLIANA, MINISTER** : Pu Speaker, hemi Non-Banking Company chungchangah hi chuan theih tawpin tan kan lo la zel ang a. T.V ah te awareness tih te kha rawtna lawmawm tak a ni ang a. Khang kha tih kan lo tum ang, kan ti chho zel bawk ang a.

Tin, buaithlak deuh thil awm thei chu chiahpuam te nena inang tlang deuh hian thil hi a kal thei ang em aw, tih hi a crore tel heng ho hian an lo chalai tawh hlawm a. Chungah chuan chiahpuam ang deuh khan han ti tawp thut ta ila, a tuar tur hi mipui kan ni leh ang em? tih te hi ngaihtuahna a awm thei a. Chuvangin RBI tena an authorized a nih loh hi chuan Mizo mipui hrim hrim hian vawikhata hlawkna kan duh avanga hetiang anga awlsam taka sum hmuh theihna hi zawng lo ila, duhthusam a ni, kan vaia that tlanna tur niin a lang a.

Tin, tuna an zawhna kha rampum buaiin kan buai phah a. Suangpuilawn kidnap tak tak emaw kan ti a, kan campaign lai min rawn lam a, kan buai viau a. Hei hi Enquiry Commission din a nih sorkarin a hre chuang lova, chutiang chuan kan lo chhang palh tawh nge ka hre lo a. Tunah hian Suangpuilawn Constituency inthlanna candidate te kidnap case kha ngun taka chhui a nih hnuin final report kha 29.1.2008-a theh luh a tih tawp a ni, tih kha a ni mai a. Police ina ngun taka an han chhui hnuah khan kidnap case a nih

prove-na a awm lova. Chuvang chuan kha thil kha tih tawp mai a ni, tih kha kan chhanna chu a ni mai.

**S P E A K E R** : Starred question No.124-na zawt turin Pu Lalduhawma i lo ko ang.

**Pu LALDUHAWMA** : Pu Speaker, UD&PA Minister chhan atan ka zawhna -

- (a) Aizawl West-I Constituency chhunga kawng laih tur, JNNURM hnuaiia DPR theh luh tawh te kha Appraisal tih zawh a ni tawh em ?
- (b) Engtikah nge hna thawh tan a nih ang ?

**S P E A K E R** : Chhang turin Pu Zodintluanga, UD&PA Minister i lo ko ang.

**Pu ZODINTLUANGA, MINISTER** : Pu Speaker, Aizawl West-I bialtu zahawm tak zawhna chhanna chu -

(a) Government of India Ministry of Urban Development hnuaiiah theh luh a ni a, Appraisal neih mek a ni a. Siam that ngai laite siam that a nih hnuah Central sanctioning & Appraisal Committee ah theh luh leh tur a ni a. Chu chu tuna a nihphung a ni a.

(b) Central atanga sanction kan hmuh hunah a hnathawh dan tur chu ngaihtuah a ni ang.

**S P E A K E R** : Zawhbelhna - Pu Lalduhawma i lo sawm ang.

**Pu LALDUHAWMA** : Pu Speaker, a nghahhlehawm khawp mai a, he thil hi ka bial chhungah ringawt pawh kawngpui 10 chuang pawimawh deuh deuh dah a lo ni leh hi lawmawm kan ti a. Hemi sum hi a dangte reng reng pawh kan Municipal neih tur nen hian a in kaihhnawih tlat mai a, kan neih har chuan sanction lamah hian harsatna a awm thei dawn tih kha kan hriat dan a ni a. Chuvang chuan sum harsatna kan tawh lohna turin engtikah nge Municipal Council hi kan neih dawn hmel ? Engtikah nge Local Council inthlan te kha kan neih theih ang ?, tih nen an kaihhnawih avangin ka'n zawt teh ang.



**S P E A K E R** : Chhang turin Minister Pu Zodintluanga i lo sawm ang.

**Pu ZODINTLUANGA, MINISTER** : Pu Speaker, Municipal inthlan hi neih turin sorkarin hma chak takin a la mek a, a tih tur ang angte a ti chho mek a. Election Commission kan neih angte pawhin tunah Electoral Roll te buaipui turin tunah hma te an la a, Committee te an nei thin a. A rang thei ang bera neih kan tum a ni. Ka lawm e.

**S P E A K E R** : Starred Question No.125-na zawt turin Pu C. Ramhluna i lo sawm ang.

**Pu C. RAMHLUNA** : Pu Speaker, Food, Civil Supplies and Consumer Affairs Minister zahawm tak chhan atan Starred Question No.125-na –

- (a) LPG Cylinder hi tun aia zing zawk hian sem theih dan a awm ang em ?
- (b) Black-a hralh awm reng mai hi tih tawp dan a awm thei lawm ni ?
- (c) Engtin nge sorkarin hma a lak ?

**S P E A K E R** : Chhang turin Minister zahawm tak Pu H. Rohluna i lo ko ang.

**Pu H. ROHLUNA, MINISTER** : Pu Speaker, Member zahawm tak Pu C. Ramhluna zawhna chhanna chu –

- (a) I.O.C lamin min pek theih dan azir zelin a zing thei ang bera sem zel a ni ang.
- (b) Black-a hralh hi tih tawp tumin a hma aia na zawka hmalak a ni.
- (c) I.O.C hotute nen inbiak pawh reng a ni a. Guwahati/Silchar lama hotute pawh a hmunah te kalin zuk dawr thin a ni a, anmahni an lo zin chho bawka a. India ram pum indaih lohna avangin population (consumer) zat base deuha sem rual thin a ni. Tin, Mualkhang Gas Bottling Plant pawh a leta tihlen tura tihfel a ni tawh a, a bul ram lak tur tihfel a nih veleh hna tan theih beisei a ni.

Tin, Ramnagar a mi khu chutiang tho chuan tih len tura electronic filling a tih tum mek a ni a, chungte pawh chu chak takin kan nawr mek a. tin, Pu Speaker, helaiah hian chhanna ah hian Department lam atanga kan rawn pek chhut kim loh a awm a. A sem dan chungchangah September 2009 atangin systematic deuhva kalpui a ni a, Department a Monitoring Cell leh V/C te

tangrualin nitin a distributions points a sem dan uluk taka vil reng a ni. Black a zuar te hi sim turin hriattir an ni thin a, an sim that duh loh avangin criminal case siam sak zel mai tur em ni ang tih Sorkarin a ngaihtuah mek a ni.

**S P E A K E R** : Zawh belhna Pu C. Ramhluna.

**PU C. RAMHLUNA** : Pu Speaker, chhanna tha tak kan hmu a, lawmawm ka ti a.

Thil pakhat kan sawi duh chu tunah zone wise in an sem a ni a, Aizawl khawpui ah te hmanni chu tun thla ni 15,16 velah khan kan veng Shivaji Tila khi Mizofed in min enkawl a ni a, nihnih chhung zet mai kha gas a lo kal dawn an ti a, mipui an pungkawm a, mahse a lo kal lo an ti leh a, a tuk ni 16 ah khan a lo kal dawn an ti a, a lo kal leh lova. Khatiang khan a awm fo mai a. Chutihlai chuan black a hralhna a awm reng bawk si tih mipuiten an hre viau hlawm a. Chumi avanga hei hi a tuartu kan ni a. Hei pawh hi kan sawi tawh thin a, agent hrang hrangte hnen atang khan card kha kan nei thin kha a ni a. Khatia agent hnen atanga card a kan lak khan awlsam phian a hriatna kan nei a. Tuna a zone a min han then tak hian kan buai ta zawk riau a hriatna kan neih avang khan session hmasa lamah te pawh kan han au deuh hlawm kha a ni a. Khatiang a pangngai a kal leh kha a tha zawk mai lo em ni, tih ngaihdan ka nei deuh a. Agent hrang hrangte khan an procurement vek a kha a receipt nen khan a inang lo thin tlat a. MIZOFED hi a tlai deuh bik emaw ni, chuvang chuan tunhma a kan tih thin ang khan kal leh ta ila, mipuiten harsatna kan tawk lo zawk lo ang maw, tih kha Department lampang ngaihdan kha ka'n zawt a. Kan vengah pheih chuanin, Tlang veng lamah opposition party MLA a awm a, an sem tha duh lo a, a hnuai lamah khu chuanin MLA zahawm tak Pu Rinawma, ruling party a mi a awm a, an sem chak bik deuh a te an ti a. A ni duh emaw ni chu aw te ka ti rum rum a. A pangngai anga kal leh mai kha Department hian tha a ti zawk lawm ni tih kha karawn zawt leh e.

**PU H. ROHLUNA, MINISTER** : Pu Speaker, Gas hi mitin mamawh a ni a, kan chhan tawh ang khan duhthusamin Company lamin min pek belh loh avangin hnianghnar takin kan pe thei lo a ni tih kha kan chhanna a ni a. Area siam hi helaia Sorkar thu a ni lova, Company thu a ni a. Gas leh Distributor te inkar ani a, amaherawhchu, Nodal Department kan awm vangin kan enpui a ni a. Tin, party inthliarna lam hi chu kan distributor ten an neih ka ring lo, an hriat pawh ka ring lo, chuvang chuan hei hi chu awm lo turah ka ngai a. Tin, Company thupek anga hei hi distributor te nena an inkar a hmalakna a ni tih hi min hriatpui hram se ka duh khawp mai, ka lawm e.

**S P E A K E R** : Kan member te pahnih Pu R.L. Pianmawia leh Pu Chawngtinthanga te hian phone in nizan lamah khan Pu R.L. Pianmawia chuan minrawn phone a. Tukin zing ah Pu Chawngtinthanga'n nimin tlai – zan

thlipui/ruahpui/rial in an bial a suasam nasa a, chuvangin an bial lam ngaihvenin an thang a, vawiinniah hian an lo kal thei lo a ni tih House ka'n hriattir a ni. Tunah chuan kan tih tur dangah kan kal leh tawh anga.

**PU LAL THANHAWLA, HON'BLE CHIEF MINISTER** : Nimina thil thleng kha a detail report kan la hmu lo nain engemaw tlem tlem kan hriat theih chin hi Member zahawm takte hriat atan han sawi hi a rem em ?

**S P E A K E R** : Tunah khan kan House Leader khanin House chhungah Member te chauh nilo Zoram mipuiin a khitilai harsatna bial hnih ai pawhin a huamzau maithei a, chu chu House ah rawn hriattir a duh a, kha kha kan pawm thei mai lawm ni ? House Leader in han report sela i lo ngaithla ang u.

**PU LAL THANHAWLA, HON'BLE CHIEF MINISTER** : Ka lawm e Pu Speaker. Hmanni lawk khan lirngching chak tak, na tak khanin min hrut tawh a, Aizawl khawpui kha, khata tang khan engemaw a thleng thin tihte a awm avang hian a tak tak pawhin hmundangah te kan lo experience tawh a, engemaw a thleng ang tih chu kan hlauthawng rilru viau va. Nimin chawhnu atang khan thli na tak leh ruahpui vanawn leh rial lianpui pui Zoram hmun hrang hrangah a tla a, kan hriat theih chinah chuan hemi Bukpui tlangdung ah te, Suangpuilawn leh a chhehvel ah te, Lunglei lamah, tin, Hnahthial bialah te a ni a. Chumi rual chuan thil vanduaithlak tak thleng a awm a.

Nimin 27 tlaiah khan tlai dar 2:30 P.M. ah Phuaibuang distribution transformer line a tha lova. Siamthat tum a ni a Pu Chanchinmawia, Muster Roll leh Bhagat Electrical Worker Power & Electrical Department ten siamthat an tum a. Telephone in Saitual Keifang Sub-Station shut down an zuk dil a, telephone in. Saitual Keifang control room chuan an dil angin an lo phalsak a. Tichuan, Saitual-Phuaibuang line chu an shut down ta a ni.

Tichuan, siamthat hna pawh chu an tan nghal a. Chutihlaiin Pu Parmawia J.E., Saitual in Phuaibuang lamin power supply an hmulo tih a lo hria a. Chumi chungchang hre turin Saitual Control Room ah a zawt a. Pu Anka Rao, Electrical Worker chu duty in a awm a, mahse a muhil a, a bula awm Vanlalpeka chuan chhangin Phuaibuang electric line hi load shedding a nih thu a lo hrih a. Pu Parmawia chuan Phuaibuang line chu pe leh turin a ti a. Pu Vanlalpeka chuan Phuaibuang electrical line chu dar 2:40 P.M. ah a on a. Hetihlai hian Chanchinmawia chu Phuaibuang ah electric ban a siam mek lai a ni. Tichuan, electric in a man ta a, feet 15 a sang atangin a tla thla a. Nikhaw hrelo in hun engemaw chen a awm a, Phuaibuang damdawiinah enkawl a ni, ni 28 dar 6:00 P.M. ah Aizawl rawn pan pui a ni a, zan dar 9:00 ah Casualty, Civil Hospital room thlenpui a ni. Doctor te'n a tul anga an buaipui hnu in X-ray, Ultra-sound leh C.T. Scan lak a ni a, tunah Male Surgical Ward ah dah mek a ni.

Doctor ina an sawi dan chuan a nunna atan chuan a hlauhawm lovin an ring a, amaherawhchu, a hnungzang ruh a tlakna ah khan a khawih avangin a taksa chanve in nikhua a hre lova, a zung thei lova, zun siak a ngai a, a lu lam a harh na-in a taksa lampang chu a la che tha thei lova, amah pawh biak chu a biak theih a ni. Chutiang thil vanduaina rapthlak tak chu a thleng a. Departmental inquiry an ti a, a ti diklo tute hmuhchhuah thuai chu Dan in a phut anga ti turin order pek an ni tawh a ni.

Tin, thli chhia leh rial leh ruahpui kha hmun tam takah chuan Zopa pawhin an sawi thiam chiah lova, a mak angrengin a rapthlak angreng a, rial te chu kut tum tiat tiat a ni hlawm a, an ti a. Tawngka ngei te pawhin theih ang ang chuan kan phone kual ve a.

Tin, D.C te theuh kha nimin tlai dar thum hnu lam kha a ni nain, a theih ang ang chu anmahni ngei kal tura hriattir an ni a. An kal theih loh a, rokhawlhna a awm a nih pawhin Senior Officer te, chutiangah chuan kal nghal turin leh relief material an theih ang ang ken tir nghal an ni. Deputy Commissioner, Serchhip District atang chuan Bungtlangah In pakhat luah theih lohina a chhia a. Chulaiah chuan tanpuina te pein Silpaulin te nen an umzui nghal a. Tin, V/C hnenah hnatlangte hman tur sum an pe bawk a ni. Tin, chhiahtlang ah In pahnih a chhia a. Rs.5000/- ve ve immediate relief pein Silpaulin kan pe a, YMA te hnenah hnatlang thingpui lumna tur Rs.1000/- pek a ni.

Tin, Darlawn ah In 20 (sawmhnih) a ti chhia a, partial damage chu In 80 a ni a, Sawleng ah In 150 partial damage a ti chhia a, Sunhluchhip ah 8 a ti chhia a, 2 partial damage a ni. Silutar ah 24 partial damage. Tin, Kepran ah partial damage 30, Serzawl ah tih chhiat burh 10, serious damage 20, partial damage 15 a ni a. Phullen lamah – Phullen AAC Disaster management and Relief nizan ah tirh nghal an ni a. Silpaulin tam tawh kengin tunah hian report kimchang nghah mek a ni a. Tin, biak pawh hleih theih an nih lohna lai a awm a, khang khan electric line tam tak a tih chhiat avanga harsatna tawhna te a awm nual a ni.

Tin, Darlawn ah BDO leh DAC tunah an kal mek a, Silpaulin 200 an keng a, Relief Fund tlem azawng nen, report kimchang kan la nghak mek a. Hetih lai hian khaw thenkhat Network te a awm loh avangin hriat mai a harsa khawp mai. Tin, Bukpui bialah pawh report kimchang a lo la thleng lova. Amaherawhchu, nizan tlai thlenga kan hriat theihah chuan In 20 a chhe lailet der a, Rial tla kha kuttum tiat tiat te a nih avangin a la sur zawm zel chuan tam zawk la chhiat an hlauhthawn thu minrawn hriattir tawh a. Tin, Darlawn ah nasa taka chhia 20, partial damage 80, Sawleng ah partial damage 150, Sunhluchhip ah serious damage 8, partial damage 2, Sailutar ah chutiang bawkin partial damage 24. Tin, minor hi 10 a ni a, Suangpuilawn ah chhe vek 13, serious 33 partial 40, minor 124 a ni. Khang hunah te pawh khan Silpaulin te leh a tul ang ang kengin BDO te EAC te an kal hlawm a. Darlawn ah phei chuan tuna Speaker zahawm takin a sawi ang khan MLA te pawh an kal a, hemi Bukpui tlangdungah pawh bialtu MLA a thang mek a ni. Chu chu tuna

kan hriat theih a ni a, network a awm hunah report a rawn lut deuh zeuh zeuh reng dawn a. Chutiang chu tunah hian Pu Speaker, thil chhiatna rapthlak a nih avangin House zahawm tak hriat atana a pawimawh avangin ka rawn hriattir a, min lo phalsak avangin ka lawm e.

**S P E A K E R** : Pu Hmingdailova hi tuna kan han ngaihthlak tak ang khan a bialah thlipui, ruahpuin In a tih chhiat avangin vawiin ah session ah a lo kal thei lo a ni e. Tunah chuan laying of papers a ni a, Pu Lal Thanhawla, House Leader zahawm tak, Finance changtu ni bawkin 1-na Finance Account of the year 2008-2009 relating to Government of Mizoram leh 2-na Appropriation Account for the year 2008-2009 relating to Government of Mizoram te House dawhkan ah rawn lay sela. i lo ko ang.

**Pu LAL THANHAWLA, HON'BLE CHIEF MINISTER:** Pu Speaker, i phalna leh House zahawm tak remtihna in heng 2 te hi Finance Account for the year 2008-2009 relating to Government of Mizoram leh Appropriation Account for the year 2008-2009 relating to Government of Mizoram te hi House zahawm takah ka rawn pharh e. Ka lawm e.

**S P E A K E R** : A copy kha han sem ula. Pu Lalrinliana Sailo, Trade & Commerce changtu Minister zahawm takin 'a copy of answer to Starred Question No.56 asked by Pu Lalduhawma, MLA on 23<sup>rd</sup> March, 2010' hi House dawhkan ah rawn lay sela.

**Pu LALRINLIANA SAILO, MINISTER:** Pu Speaker, i phalna leh he House zahawm tak remtihna in 'the answer to the Starred Question No.56 asked by Pu Lalduhawma, MLA on 23<sup>rd</sup> March, 2010' hi he House zahawm takah hian ka pharh e. Pu Speaker, hei hi Member zahawm takte zawhna a ni a. A thu chu a inthlau vak chuang lova. Amaherawhchu, ziaka dah a nih dawn avangin kan fimkhur thu ah minor deuh tak tak a ni e. Ka lawm e.

**S P E A K E R** : A copy kha Member te han sem rawh u le. Tunah chuan Financial Business lamah kan kal leh tawh ang a. Vawiin hian Minister pahnih, Pu Lalsawta, Minister zahawm tak leh Pu Lalrinliana Sailo, Minister zahawm takte Demand lak tur a ni a. Kan tih thin dan ang khan la kawp leh mai ila tha kan ti em? Le, kan la kawp leh mai ang a. Tunah Pu Lalsawta, Minister zahawm takin a Demand No.4-na, 8-na, 12-na, 20-na leh 21-na te hi House ah rawn submit se, i lo ko ang.

**Pu LALSAWTA, MINISTER** : Pu Speaker, Sir, he House zahawm takah hian Governor in a recommend angin ka Demand No.4-na Law & Judicial

Department Rs.12,43,70,000/- leh Taxation, Demand No.8-na Rs.793,35,000/- . Tin, Demand No.12-na Parliamentary Affairs, Rs.36,98,000/-, School Education Department, Demand No.20-na Rs.428,92,07,000/- . Higher & Technical Education Department, Demand No.21-na Rs.69,11,13,000/- te hi he House-in a discuss turin ka rawn submit e. Ka lawm e.

**S P E A K E R** : Tunah Pu Lalrinliana, Minister zahawm takin a Demand No.24, 28, 44-na te hi House ah han submit ve leh sela. I lo sawm ang.

**Pu LALRINLIANA SAILO, MINISTER:** On the recommendation of the Governor of Mizoram and with your permission, sir, I move Demand No.24, 28, 44 for Rs.170,29,38,000/- for meeting the expenses during 2010-2011 in respect of the following Department, Demand No.24 Medical & Public Health Services, Rs.159,49,15,000/- and Demand No.28 Labour & Employment, Rs.6,10,60,000/- and Demand No.44 Trade & Commerce, Rs.4,69,63,000/-. Total 170,29,38,000/-.

**S P E A K E R** : Tunah chuan Minister pahnih te Demand kan dawng ta a. Kan sawiho leh nghal mai ang a. Member te kha minute 10 theuh han inpe leh ilangin, tha kan ti mai em? Ni danga kan tih angin tha kan ti maw? Minute 10 theuh hun kan inpe leh ang a, tunge sawi hmasa dawn le? Tunge hmuipui han pu hmasa ber dawn? Pu R. Lalrinawma i lo sawm ang.

**Pu R. LALRINAWMA** : Pu Speaker, ka lawm e. Kar kalta tawp lam khan Pu Speaker, i phalna leh House Leader remtihna in Delhi ah National Convention on Law, Justice and the Common Man tih convention-a tel turin ka zuk kal a, chuangin session ka absent a. Vawiin ah a sawi hmasa bera han tan pawh kha a thain ka hria a. (Speaker : Ka absent ve lai a ni a, i absent tih reng reng ka lo hre lo. Ka lo damlo ve a.) A ni maw, Pu Speaker. Prime Minister hovin UPA Chairperson te, Union Minister engemaw zat leh Assam Chief Minister te, Haryana Chief Minister te an tel a, Vigyan Bhawan ah. A hlawk thlak hle mai a, a bengvar thlak a.

Tin, he UPA sorkar kum 6 chhunga Common Man te tana dan justice an lo pek hrang hrangte an sawi a. Chung zinga ka lo chhinchhiah ah chuan Right to Food te an ti a (BPL tan). Nichina Pu Speaker, zawhna a chhanna ah khan Union Minister-in a sawi dan nen khan inang lo deuh hlek a awmin ka hria a. Ani chuan 25 kg. BPL tan kan pe a ti a. Helaihan 30 kg. tih vel 35 tih vel kha a ni a. Union Minister chuan 25 kg a ti a ni.

Tin, hei Right to Work NREGA kan tih kan sawi lar em em, hengte hi Right to Work, UPA sorkar ina Parliament dan siama a pek a ni a.

Right to Compulsory Education tih te, Right to meal, Mid-day meal tih te, Right to Information, henge hi a pawimawh em em mai a (Common Man tan). High Official te leh Politician tam tak chuan House ah pawh zawt theiin leh Office ah te pawh. Mahse Common Man te tana Right to know an awm a, Right to Information an awm ta te hi. Tunah hian Right to Gender Representation tih leh mek a ni a. Kum 6 chhunga mipuite dikna leh chanvo hmasawna tur kawnga hnathawh a hi a ropui em a, he House ah hian han sawi lan hi a thain ka hria a.

Tichuan, Pu Speaker, Demand sawi turah hian Department a tam hle mai a. A indawt kher lovin, sawi vek sen a nih dawn loh avangin. Demand No.8 Taxation ah hian Vairengte ah khuan check gate a awm a. Amaherawhchu, Bagha road kan tih Serkhan – Bagha road, Bukpui tlangdung lam hi Vairengte check gate hel nan hian an hmang fo mai a. Hetah hian check gate te, taxation check gate te hi dah theih ni ve ta se chu a tha awm mang e, ka ti a. Mahse thawktute, Department lam an indaih lo hle mai a. A tul anga thawktu te pek belh a, gate hi siam nise, sorkar revenue te pawh a pung ang a, check gate hel a, tax exemption tam tak tur kha a veng dawn a ni.

Tin, Demand No.12-na Parliamentary Affairs ah hian han sawi lawk ka duh chu Democracy ah Parliamentary form of Government in kan kal a ni a. Hetah hian Parliament te, Legislature te a pawimawh em em a. Engkim, dan te, sorkar kalphung turte duanna a ni a. Hetah hian Parliamentary Practice & Procedure hi kan hriat a pawimawh a. A bik takin Official te, Department hrang hrang Official te hian hriat a pawimawh a. Delhi ah khuan training an buatsaih thin a, Department Officer te tirin training tur, Organize tirin zuk ti ta ila, Department Officer engemaw zat a rualin tum khatah an ti thei ang a. Ama'rawhchu, chu ai chuan Pu Speaker, tunhma sorkar hna ka thawh ve lai Superintendent ka nih ve lai, Parliamentary Affairs ah; khulai training tir tute, Official kha kan ko chho zawk ta a. Helaiyah mi pathum an lo kal a, tichuan Official Joint Secretary chin mi engemaw zat kha a rualin training an rawn pe thei ta a. Hetah Official te kan tirh a, TA/DA tam tak kan senna turah khan kan koh chhohna a kha a hlawk zawk em em mai a. Chutiang ang zawngte chu a khat deuh tawh si a. Kan tihna kha a rei tawh a, 1995 nge, 1996 bawr vel daih kha a ni tawh a. Chu chu tunah hian Parliamentary Practice and Procedure in zirtirna hi awm leh thei sela, tih hi a duhawm hlein ka hria.

Tin, Demand No.24-na Medical and Public Health Service chungchangah hian Central-in duhsak takin National Rural Health Mission hnuaiah te sum tam tham tak tak sorkar hmasa hunah pawh khan a rawn pe thin a. Chung sum hmanna chu mipui tana hlawkna ni lemlo pawh tam tak a awm tih te kan hre thin a. Tin, buai tak tak a awm a, khang ang chhunzawmtu Minister zahawm tak tan pawh hian a buaithlak hlein ka ring a. Hei News/Media te an chak tawh a, thil an han haichhuak a, Minister changtu an han zawhin ani tan lo zep thu a awm lova, khang ang sawi chhuah a nih a, Pu Speaker, i veilam amitena mimal inbeihna anga an rawn ngai hi a dik lo in ka hria a. Thil dik lo a awm a nih chuan chhui chhuah a, dan anga kal hi a pawimawh a; chumi a mimal ang zawnga rawn lak luih tlat hi a changtu

Minister tih tim nan an ti thin a niang, ka ti a. Tin, a khirh em em chu i veilam amite vek, a thenin in chhui chhuak dawn lawm ni, in chhui chhuak em ? an tih reng laiin, a thenin mimal inbeihna a ni, an ti bawk si a; hengte hi a changtu tan a luhai thlak dawn hlein a lang a. Mahse a tha ber chu thil dik lo chu chhui chhuah a, danin a kawng zawh sela, chu chu thil nih dan tur a ni a, kan ram hmasawna tur pawh a ni.

Tin, Demand No.4 Law & Judicial chungchanga Law Department hmalakna lawmawm tak tak, Governor Speech ah lawmthu sawihona ah khan kan sawi lang tawh a. Heng Junior Civil Judge 12 lai lak thar a, posting siam fel te, Senior Civil Judge 6 lak te leh High Court hmun tur pek te, tin, Village Court, thingtlang mi harsate Common Man tena an doorstep a, an kawngkaa dikna an hmuh ve theihna tur ruahmanna lo awm ta hmun 12 lai maiah kalpui tur an ni te, khang kha sawi nawn vek tawh lo ila. A lawmawm ber ka tih thin a chu roreltu tha tak tak Court lamah te neiin, Court Building te tha tak tak nei mah ila Executive sorkar mipui thlan politician tena (Speaker : minute 1 hun i la nei) Aw Pu Speaker, ka zo tep. Khatiang mipui thlan politician tena kha Court-a roreltute kha an promotion te, transfer te, posting te an kuta a awm miau chuan Justice awm loh chin leh Justice kha tih ni lova lan chin a awm thin a. He sorkar tharah erawh chuan Separation of Judiciary hi a tak taka kalpui niin, vawiin niah Court-a roreltute hi sorkar ina a duh duh a transfer emaw posting emaw promotion emaw a duhsak theih a ni ta lova, High Court control vek an ni ta a. Chuvang chuan Court-a rorelna ah pawh hian tunhmaa sorkar, hmanni ah kan Law Minister zahawm takin a sawi tawh a, sorkar inrawlhna awm anga rinhlelh a nih thu a sawi a. Khang kha Pu Speaker, rinhlelh mai ni lovin, a naka zentu kan ni a. Special Judge kan House Leader case khawihthu Special Judge sawn a ni a. Kha case ngaihtuah tur thlak a ni te, Public Prosecutor dan dik lo taka ban thut a ni a, a thar lak, kha a thar lak ina Court case delay-na tura theihtawp a chhuah a. Heng hi Justice a ni love, kan tih pawha kan delay loh chuan min ban ve mai anga sin, a tih te khan Court ah an inrawlh chian zia a tilang hle a. Chuvang chuan Court-a sorkar inrawlh thei lo a, he sorkar thar ina a siam leh kan House Leader ina a ma case la awm lai ngei a, Court-a inrawlh thei lo tura a'n ti te hi a huaisen thlak a.

Chutiang chuan dikna pawh a lo lang chhuak ta a. Court ah hian sorkar a inrawlh loh hian mipuiten Justice an hmu thei dawn a ni, tih te kha ka sawi lang duh a ni. Pu Speaker, ka lawm e.

**S P E A K E R** : Tunge sawi leh dawn le ? Pu R. Lalrinawma kan tur hmanhmawh viau si a, in sawi leh duh si loh chuan, Pu H. Zothangliana i lo sawm ang.

**Pu H. ZOTHANGLIANA** : Pu Speaker, ka lawm e. Thiante, Member zahawm pui pui, zahawm tak tak te, chawhnu lam atan an inkhek deuh a nih ka ring a. Chuvangin keimah ka'n ding ve zawk ang a, sawi tur tam tak ka nei lem lova. Amaherawhchu, ngaihpawimawh pahnih/khat te han tih rik ve duh a awm a.



Pakhatna ah chuan 13<sup>th</sup> Finance Commission ina kan State Specific Needs a rawn hre chat chat mai a. Kan hotuten a, an ngaipawimawh hi a lawmawm mange aw, ka ti a ni. Entirnan- Construction of Primary Health Centres and Sub-Health Centres atan hian Rs.30 crores ngawt mai, 13<sup>th</sup> Commission period ah hian pek kan ni dawn te hi a ropui ka ti tak meuh meuh a. Kan Chief Minister zahawm tak, kan House Leader ni bawk leh kan Minister te thahnem ngaihna a niin ka hria a, a lawmawm ka ti a ni. District Hospital te pawh tun dinhmunah hi chuan duh anga thum famkim a ni tawk lo em em mai a. District Headquarters chu sawi loh, Aizawl hmun tak tak a pawh hi thum that ngai, tihchangtlun ngai tak mai a la nih mek lai a, thingtlang lam hawi a kan hotuten ngaihtuahna an seng a; thingtlang mite hmakhua ngai tak mai a ruahmanna an rawn chhawp chhuak hi a lawmawm ka ti tak meuh meuh a ni.

Khami chungchanga ka sawi tel zauh duh chu, kan Minister zahawm tak pawhin a lo sawi tawh thin, kan problem lian tak pakhat chu sorkar Doctor tena Aizawl ni lo, Lunglei tal pawh ni bawk hek lo, thingtlang lam zawka kal chhuah an duh lo bur anga lang deuh tlat mai hi a ni a, a pawh hlein ka hria a. Thingtlang lamah pawh a mamawhtu hlei hlei kan tam a ni tih hi ka'n sawi thar ve leh duh a. Aizawl hi Doctor mi tam tak chuan an chhuah san duh lova. Aizawl chhuah sana thingtlang lama hlawh tam vak lova, sorkar enkawla awm ai chuan Aizawl khawchhungah mahni duh thala in leng a, sum tam tak hlawh chhuak bawk si a an awm hi an tan a nuam zawk em em a ni, tih chu kan hriatpui rualin, kan ram mipui te, a bik takin thingtlang kilkhawr zawka chengte hian kan mamawh ngawih ngawih a ni, tih te pawh hi hre thar leh se. Chutiang ang chuan ram rawngbawlna rilru, missionary rilru te pawh doctor tam zawk te hian pu thar leh deuh se, kan va han mamawh em, ka ti a ni.

Tin, District Hospital hrang hrangah Staff Nurse te, Nurse hrim hrim te an indaih lo em em mai a. Heng karah hian hmun thenkhatah chuan Health Worker zawk te an lo indaih deuh hlek a. Chutiang angtu chu hmun thenkhata an dinhmun a nih avangin Hospital hovah hian Health Worker te hi an post a tam lem lova emaw, a awm em em lo a nih pawhin attach-a dah ve mai theih te hi ni sela, Nurse lama kan harsatna zual zawpui te hi chu min chhawk zangkhai theih dan awmin ka ring a. Chungte chu ka'n tarlang duh a ni.

Tin, 13<sup>th</sup> Finance Commission huam chhungah bawk hian infant mortality rate, naupiang hlim sangkhat zela chhuta a thi zat tihhniam thlak zel a nih chuan State hrang hrangte tana lawmman tur a hi cheng vaibelchhe 5000 zet mai India ramah hian dah a ni tih te kan hria a. He lawmman changtu State vawng taka changtu State kan nih theihna turin kan thawktute Minister atanga a te zawk te thlengin an pawimawh em em a ni tih kan hria a. Chutiang karah chuan kan Minister chak tak kaihhraina hian hma kan sawn chho thei ang tih hi a beiseiawm hlein ka hria a. Chungte chu ka'n tarlang tel duh a ni.

Demand No.20-naah ka kai mai ang a. Ministry hmasa, MNF Ministry chhung khan kum 2007 ni tain ka hria, a kum hi ka sawi soal palh mai thei a. Lawngtlaia Government Region High School-ah hmalak thar tumna awmin Govt. Region High School tih thin chu Higher Secondary School-a hlankai a lo nih tak hnu khan, Geography leh Sociology Subject te introduce turin khatih hun laia kan Minister zahawm tak khan assurance a pe a, Lawngtlai hmunah ngei, zirlai te leh pawl hrang hrang tena an ngen chiam avangin. Tichuan khatih hun laia Lai District Council-a hotute nen rem ruatin, lawmman tur District Council lamin an sum neih tlemte atanga pe ve leh chhawngin zirtirtu atan mi 4 lai mai Geography atan 2 leh Sociology atan 2 an ruai a. A hnu lawk thla 3 chhungin kan rawn tifel ang, tiin Ministry hmasa khan min tiam a. Amaherawhchu, tihfel a ni lo kum khua a, min chhuahsan ta a. Chungte chu vawiin ah hian kan Minister zahawm tak pawh hian min hriat thar sak leh kan duh tak meuh a. Govt. Region High School tih thin hi Mizorama High School upa ber 5 zinga pakhat a ni tih pawh hi min lo hriat tel sak hram ka duh em em a, ka ngen a ni.

Tin, High School hrang hrangah chhim leh hmarah pawh a ni a. Headmaster mumal awm lohna a tam em em a, chu chu kan Minister hian a pawimawh zia hriain dah ngheh tumin hma a la a, a lawmawm ka ti a. Keini chhimlam Lawngtlai District huam chhungah ringawt pawh High School 5 Headmaster incharge maiin an enkawl thin te kha Headmaster ngeth dah turin hma an la a. Ruahmanna an tifel thawkhat tawh a, order te a chhuak a, a lawmawm ka ti a. Chutih rualin High School Headmaster atan hian zirtirtu senior te hmun hrang hrang ami a seniority list atanga enin dah thin an ni a. Mahse zirtirtu tam ber chu nichina Doctor ho kan sawi ang deuh khan khawpui pawna chhuah hrim hrim duh bur lote an nih avang hian a senior hlei hlei te kha dah ngheh atan an itawm em em laiin dah ngheh hleih theih lohian an awm thin a. Chu chuan zirna kawngah harsatna thui tak min siam a ni. A bik takin thingtlang lamah tih kha ka sawi duh a. Chuvangin tuna appointment order an pek hote hi hunbi tuk fel chhunga an zawm fel a, an hna hi an thawk tak tak a nih loh chuan alternative arrangement hi a rang thei ang bera min siam fel sak leh nghal a pawimawh tak meuh a ni.

Demand No.8-na Taxation ah kal ve ta ila. Ka ngaih pawimawh ber chu 'Payers' convenience' tih hi a ni. Mizoram chhungah kan Tax base a that tawk loh dante kan hria a. Chuti chung chung pawhin tun hnaia kan Transport Minister zahawm takina (midangte pawhin) hma an lak anga Tax petute remchanna sorkar ina kan ngaihtuah a, Tax awlsam zawka, tha zawka, samkhai zawka an pek theih dan tur ruahmanna kan sem chhuah hi chuan kan mipui tam zawk hi chuan an chawi tur Tax pek hi an hreh lo a ni, tih hi ka hmuh ve dan a ni a. Chuvang chuan 'Tax payers' convenience' ruahmanna kan chhawpchuah hi a pawimawh a ni.

Demand No.21-ah Higher & Technical Education ah hian sawi duh ka neih ve chu, College hrang hrangte duhsak phu tak takte an awm rualin an dinhmun hriain sorkar pawhin hmachhawp tha tak tak an neih sak a. Heng karah hian kum 4/5 kal ta atang khan University Grants Commission (UGC) kan tihah

hian direct-a College hrang hrangten sum dil an in tihmuh a, College tam takin an dil hmu teuh teuh reng bawk a. A thenin tha taka an hman tangkai laiin College thenkhatah erawh chuan principal emaw thuneitu pahnih khat maiin mimal contract ang deuh reuh a kalpui mai mai a te pawh an awm a. Hemi chungchangah sorkar a bengvar a, a ngaihven chhoh pui a ni tih ka hria a, a lawmawm a. Chutianga mumal deuh zawka an kal chhoh pui chuan, heng Grant leh Fund an hmu har te pawh hi ram tana chhenfak awm zawkin an kalpui thei ang tih a beiseiawm a ni.

Pu Speaker, point khat lekin ka'n zep leh hram ang a. Demand No.26-na Labour & Employment chungchangah hian Lawngtlai ah sawn Office 'chhete' tih aia chhe mah hian kum 20 chuang kalpui a ni tawh thin a, M.R. pakhatin a thutchilh a. District Headquarters ve riang ruanga (keimahni tawng takin ka han ti ang a) kan dinhmun a chhe em em mai a, thil dang kan sawi hman tawh lovang a. Khawngaih takin hemi chungchangah hian Minister zahawm tak hian min enfiah sak in min up-grade sak se, establishment te hi min tihchangtlun sak hram se, tih hi Pu Speaker, nangmah kaltlangin ka han ngen duh bawk a ni e. Ka lawm e, Pu Speaker.

**Pu LALTHANSANGA** : Pu Speaker, ka lawm e. Kan House Leader zahawm tak khan chhiatna hrang kha an sawi a. Champhai District kha a report chiah lo na a, Biate ah khan In seriously damage a kha pakhat a awm a. Tin, partial damage pawh kha pakhat a awm a, Biate bikah chu chu report min han pek a ni a. Hmun dang dang ka hre chiah lova, chu kan hriat chhun ka bial chhung ami ka'n sawi ni sela.

Hei, waviin Demand hi a tam hle mai a, a vaiin pariat vel kan sawi dawn a ni a. Law & Judicial ah hian High Court hmun te min han pe tawh a. Tunah khuan Governor In tur a tih kha High Court turin modified mek niin ka hria a. Khu khu engtik huna peih tur nge ? tih hi kan Minister zahawm tak hian min hrih thei se, tih kha ka'n sawi duh a. Kan mamawh hle tawh mai a, Zoram mipuiin waviin ah Dan hmanga engkim mai hi hai chhuah kan lo tum ve tawh a. Chuvang chuan khu khu hman theih thuai ni thei sela, tih kha ka sawi duh a.

Tin, hei Taxation ah hian kan sorkar co-operate dan a hi ka hre chiah lova. Tunah hian hei Commissioner te kan han nei a, Deputy te, Assistant te kan han nei a. Deputy hi pathum, Assistant pawh hi pathum niin ka hria a. Tunah hian Superintendent te pawh hi District hrang hranga an han hawn tharah te pawh khan charge an la ni te pawhin ka hria a. Hetiang te pawh hi tih puitlin chhoh a, tun aia changtlung zawk hian kan tih tha hlein ka hria a. A chhan chu hei kan Tax collection atang te hian kan Budget punna te pawh hi awm chho zel tur niin a lang a. Chuvang chuan duh thawhna a sang chho hle a ni a. Tin, Inspector ang chi post te hi a la tam hle mai a. Hei GSP te kan la tih chhoh dawn chuan tih tur a tam dawn hlein ka hria a. Tin, Contractor leh Supplier hote nena agreement han sign ah te hian Taxation Department hi an tul

hle dawnin ka hria a. Hemi RGGDY thir ban han supply chungchangah te hian an exempt ta niin ka hria a. Company pakhat phei kha chu Mizoram sorkar khan an khing a, an hneh ta ni te khan ka hria a. Inter-State thilah hi chuan VAT hi lak theih a ni lova. Chuvangin khatiang khan Company hrang hrangte kha a awm chho dawn niin ka hria a, P & E ah hian a bikin. Hetiang te pawh hi duhthawh a nat avangin ka sawi lang duh deuh hlek a.

Demand No.20-na School Education ah hian – School Education hi an tang hle mai a. Tunah phei chuan kan Department ah hian a pun tamna ber tur ni pawhin ka hria a, chutiang ang taka kan han duhsak hi a lawmawm hle a. Amaherawhchu, thingtlang School hrang hrangte min han tlawh tir ve a, naupang tana School kal chakawm lohna khawpa School Building chhia hi a tam em em a. Tin, thenkhatah phei chuan a tawt lutuk a, extension ngai tak te, a thenah chuan extension tih sak tawh incomplete-a dah hi a tam em em mai a. Hetiang te han hmuh hian School naupang tan chuan zirna tha te kan han ti a. SSA ten hma an han la a, Mizoram ah 2012 thleng tur ang a ni ang chu hemi scheme hi a lo kal zel chuan chutiang ah te pawh chuan, hei kan School enrolment te han en hian hemi GER atangte pawh hian a lo pung chho zel a; a bikin Middle School ah te phei chuan a pung nasa hle a. 2007-2008 atang khan 2009-2010 angah phei chuan 82.72 angte pawh hian an chhova, hengte pawh hi SSA hmalakna te pawh a ni ang a. Chutiang lai karah chuan School tui mai hian an building hlui tawh zia leh chhiat tawh zia hi an sawi nasa em em mai a. Zirtirtuin khami rilru nena naupang a zirtir kha chuan a zirtir tui tawh lo ang tih a hlauhawm thei a. Chuvang chuan School building ah te leh a compound kan tih thatah te hian Pu Speaker, tan han la zual se, tih kha ka sawi duh a.

Tin, SSA teacher te hi han ban tumna deuh hi a awm emaw ni, chutiang angte pawh chu kum tina extension hi automatically-a han tih te a ni a, a project tawp hma a han tih tawp hi a lehlamah miin eizawna atana an lo hman tawh a ni a. A project a tawp a nih chuan thu hran nise, a la tawp lo a nih hi chuan uluk zawka en a, extension te pawh hi tih leh a tha lawm ni? Hei pawh hi kan Minister hian min han hrilh thei se, a wind up hunah khan. Tunah pawh hian a zirlaite pawhin an teachers sikul kal lo te pawh rilruah an vei tan deuh a ni a.

Tin, zirtirtu te hian Selection Grade chungchangah hian an ti nasa hle a. 2009 September ah te pawh khan (Teacher's Day te pawh khan) sorkar nena inbia khan hemi te pawh hi Selection Grade hi chu tih chhoh a ni ang, an tih mai tur a kha a ni a. An tan chuan an ACP kha a ni ve tak meuh a. Hei pawh hi kan hnih/khat vel nghah tura sorkar tih kha tun thleng hian tih a la ni lova. Pu Speaker, kan Minister hian hei pawh hi engtika tih tur nge tih hi a wind up naah min hrilh thei sela.

Tin, RMSA hi kan han ti chho dawn a ni a. SSA nen kal kawp deuhin MESA te pawh kan hmang chho ang tih te a awm a. Chutiangah te pawh chuan RMSA kan tan ta nuai mai a. High School upgrade leh a awm lohna a dah leh ah 24 dah a ni a. Eng kalkawnga han dah nge tih te hriat a chakawm hle a. Ka bial Hriangtlang ah pawh a awm lova, mipui vantlang tih a

ni a. Chutiang chuan an han ti a, an awm lova New Serchhip ah chuan pakhat a awm tawh a, a awm belh leh a ni mai a. Chuvang chuan kan mamawh ve hle mai a. Hriangtlang ah te pawh khian tih kha kan sawi duh a.

Tin, Medical & Public Services ah hian han ti leh ila. Damdawi In saw kan extend vat vat mai a. Demand No.24-na hi kan ti nasa a, mahse staff hi kan dahbelh mang si lova, an khawngaih thlak a ni. Tin, kan Medical ho hi Contract Basis-a awm tawh em ni aw! ka ti a. Pu Speaker, kan Minister chak tak mai hian MoU palzut tu in ni bawh a, in sorkar hi rawn palzut teh u, Medical ah hian a bikin. In palzut loh chuan an khawngaih thlak awm a ni.

Tin, Budget nise a tlahniam nasa si a, keini thingtlang bialtu tan chuan kan rilru a zam a ni. Tun ang zela Budget a kal hniam si chuan thingtlangah hian an hnathawh tur chu a awm lo, kan neih loh lai a ni, min lo hrethiam ula, hei hi lei mai ta che u, tih kha duty naa doctor ten an tih tur kha a ni leh ta a. Chutiang chuan sawi tur a tam hle a, chu chu kan dinhmun a ni a.

Tin, Hospital & Medical Education-a post saw Director hi an ti mai hian ka hria a. A lem sawn a kal em ni aw! Saw pawh saw chiang deuh hlek hian, Director a nih chuan Director sawn kal mai se, Director saw a Director chiah lo te pawh hian kan hria a. Khatiang nuaih a nih avang khan sawti lai te pawh saw han sawi chiang nghal ve se.

Pu Speaker, minute khat chiah helaiah hian, Trade & Commerce bikah hian ka'n sawi duh chu MAMCO te pawh hi Wholesale Market 10 lai a nei a, Rural Primary Market pawh 82 a nei a, Bungtlang ah khian min sak sak ve a ni. Mahse Second Installment awm lovin ti hian kum engemaw zah hi a ro rum tawh ringawt mai a. Khimi Second Installment awm theihna tur, complete nan khian kan mamawh em em mai a. Tuna Serchhipa Zikhlum kan tih zawng zawng khi Bungtlangin kan thar a ni a, chutiang ang tak chuan mipakhat khian 400 quintal te an nei a, khiti laia han tih ve te pawh kan chak ve a nia. Chuvang chuan Incomplete Market te pawh khi heti laiah hian la tel em lo turah ngai ila, kha pawh kha min lo hriat sak se, tih kha Pu Speaker, hunte min pek belh a, kha zawng kha ka sawi theih ni mai teh se. Ka lawm e.

**S P E A K E R** : Sawi tur kan awm tawh rih lo maw. Aw, Lt. Col. Z.S. Zuala i lo sawm ang.

**Lt. Col. Z.S. ZUALA** : Pu Speaker, ka lawm e. A hmasa berin Law & Judicial hi han sawi ila. Separation of Judiciary hi a takin kan han hmang a. Kan han sorkar a, a result pawh kan hmu nghal a, kan House Leader zahawm tak Case te, Judgement Order te pawh an han ti chhuak nghal a. Kum 10 chuang zet sorkar hmasain an lo pawh tan tawh kha tiang hian a result kan

hmu a, a lawmawm hlein ka hria. Ani hi Justice kengkawh turin tang tang tang se.

Tin, Customary Law hi sawi hlek ka duh a. Customary Law hi Customary Law a nih ang hian hman tum ila, Customary Law hi dan dang anga writing-a tih chhuah kan tum hi kan buai niin ka hria. Kan custom ang hian kalpui mai ila, tih zawng hian ngaihtuahna awm thei se, thain ka ring a. Tin, Gramnalaya kan tih te hi thingtlang mite tan awlsam tur a nih ka ring.

Tin, hemi zawh hian Taxation hi sawi leh ka duh a. Taxation ah hian income kan hmu a, Revenue pawh kan hmuh belh hle, tih Budget bu ah te pawh kan hmu a, chanchinbu ah te pawh kan hmu a. Hemi ah hian ka sawi duh chu, heti laia sipai ho canteen taxation chungchang hi, a hma pawhin discussion a awm tawh thin a. Vat hi heti lai sipai canteen atan hian tih tlem sak rawh u, ti te pawhin request rawn thawh a ni a. Hemi chungchangah hian Tripura khuan Vat hi an la lova, North-east Area ah chuan Nagaland, Manipur, Assam leh Meghalaya ah hian 4% an la a. Tin, Mizoram ah hian 6% kan la a ni. Hei hi a sang lawr bik a, chu aia kan sipai hote leh kan sipai bang hoten canteen atanga a tlawm zawka an lo lak theihna turin North-east State ang tal hian tih sak hi a awm viau in ka hria.

Tin, Trade & Commerce ah hian han sawi tur ka neih chu, Mission vengah sawn Market Building tha tak mai kan nei a. Amaherawhchu, a kalna saw a tha lova, chuvangin inzuar ho, a bik takin vegetable zuarte saw an lut thla duh lova. Saw saw kan Minister zahawm tak pawh hian min rawn enpui tawh a. Tin, UD&PA Minister pawhin min rawn enpui tawh a, kalkawng saw min siam sak turin kan request a. Kan lo hriat dan chuan UD&PA hian min siam sak dawn niin ka hria a, chak zawkin hma min rawn lak sak thei se a lawmawm hlein ka ring. Tunah chuan saw mi market hmanah Trade & Commerce Minister-in a rawn en a, a hnuai bawlhhlawh kalna tur (drain) sawnin min rawn pe a, an ti mek a. Kha kha a progress ka han hrih duh a, kan lawm hle a, sawti lai V/C ten tunah hian hna an thawk mek.

Tin, chulo lelah chuan ITI ah khuan Market Building sak a ni a. Tunah khuan half finished, half done ang velin a la awm a. Khumi completion pawh khu pawisa tlem azawng min han pek belh se, a finish theih mai turah kan ngai a. Khu khu min lo hriat sak se kan duh a.

Tin, Labour and Employment ah hian Youth Commission te hi Labour Employment hnuaiyah hian an awm a. Hmanni lawk khan Information Service ah te khan anni hovina an organized hnuaiya coaching atanga pass te kha an lawm tih kan lo hmu a, a tihzia in a lawmawm hlein ka hria a. Hetah pawh hian Youth Commission ah te hian national level-a kan thalaite an luhna tur hi ngaihtuah ila, local-a hna zawng mai lova, national level a nih loh pawn India ram pawn zawka kal dan te hi min zawnpui tam se a thain ka ring a. Tin, chu lovah chuan sipaia luh danah hian coaching kan tih sak chuan kan thalaite hi nasa takin sipai ah hian an luh belh thei a ni, tih hi ka sawi duh bawka a ni.

Tin, Education hi khami Youth Commission te leh Labour and Employment te an in connect ang hian kan education standard tihsan hi nasa takin an tum a. Kan minister zahawm takte pawh hian tan an la a, Education Reform Commission te pawh hian an ti mek a. Tin, hmanni lawkah khan High School Leaving Examination Result te kha improvement nasa tak a awm a, a lawmawm a. Amaherawhchu, khami improvement kha keimahni State chhung improvement a ni mai a. National level ah khan engtiang takin nge kan improve tih kha kan in enna tur a nih ka ring a. India ram pum compete thei tur hian kan tan chu a la ngai hlein ka hria. Example han sawi ta mai mai ila, hman deuh khan Delhi Police-a tang tur khan kan thalai 40 rual vel an kal thla a. Khatah khan pakhatmah an tling lo niin ka hria a. Kha khan kan standard a entir hlein ka hria. India ram pawna kan compete hian kan standard dik tak kha a lo lang thin a, hei hi improve a ngai a ni. Hemi improve tur hian kan zirtirtute hi improve an ngai a. Engtin nge kan improve ang kan zirtirtute hi, kan selection system hi tu sorkar lai pawh hian political party worker indah nan a ni e, kan inti tawn a. Hetiang hi a nih dawn fo chuan kan zirtirtute select tur hian duh leh State pawna mi pawh hmang mai ila. University dang te pawh an chhawr theih a, chutiang kher lo pawn khawimaw lai, ka hriat dan chuan Delhi Police selection rawn conduct-tu te kha, ITI Khoragpur ni ang ten an sawi a. Khatiang deuh khan kan zirtirtute selection pawh hi keini ho hi rintlak loha kan in ngaih chuan khatiang ang mi kha ruai mai ila, a tha mai awm mang e aw, ka ti deuh a.

Tin, Education ah hian quality education ah te kan kal nasat a ngai hlein ka hria a. Tunah vanneihthlak takin Sainik School te kan hotute zarah kan nei dawn a. Chu lovah pawh Central School te, hetiang lampanga kan kal nasat hi a ngai hlein ka ring.

Tin, Medical and Public Health chungchangah hian hei Aizawl South area ah hian Hospital, Kulikawn Hospital an tih mai, PDO post saw kan nei a. Sawlai ah sawn Psychiatric Ward a awm bawk a, tin, Gynea Ward a awm a, Dental Unit a awm a. Tin, General Ward a awm a. Chulovah chuan Health Worker Training Centre a awm bawk a. Saw mi saw nasa takin a improve theih a, kan Health Minister zahawm tak hian a bengvar, a ngaimawh hlein ka hria a. Hman ah pawh ama ho hian visit kan nei a, ani pawhin ruahmanna tam tak a neiin ka hria. Saw saw nasa takin a improve theih a, sawti lai kan improve chuan, heti lai kan Civil Hospital bazaar lun lai taka awm hi, tam tak hi saw lamah sawn a pawhpen theih dawn a. Chutah chuan a approach road saw, sawti lai Kulikawn main bazaar atanga City road a lo kalna kawng saw extend a ngai a. Saw mi kan extend a, a hnuai a C.P. road atanga Hospital panna saw grade tha zawka kan tih chuan, nasa takin kan damlo te tan kal a awlsam ang a, emergency ah pawh a tha dawn a, kal a awlsam dawn. Saw saw min hriatpui a, eng emaw plan tha tak siam chuan Civil Hospital Annexe emaw addition emaw ang khan tha takin a kal theih dawn a. Khatiang bawk khan ITI ah khuan Urban Health Centre kan nei a. Khutah khuan tunhma kha chuan Specialist-in karkhat ah vawihnih te an rawn tlawh thin a. Khatiang bawk khan tunah hian kal leh thei se, tih kha ka'n beisei a. Khatiang a nih chuan Aizawl veng hla zawk ina Civil Hospital-a an kal fo ngai lovin, awlsam

taka Medical Specialist Service kha a hmuh theih dawn a. Hei hi kan Health Minister zahawm tak hian min lo hriat sak se, tih ka sawi duh a. Ka lawm e.

**Pu K. LIANTLINGA** : Pu Speaker, ka lawm e. Vawiin ah hian pariat lai mai demand sawi tur a ni a, sawi zawh hman chi pawh a ni lova, minute 10 chhung chuan. A then lai laite han sawi ve ka duh a. Hei, kan Budget ah hian nikum leh kumin chu Performance Budget te an rawn dah a, Work Programme te. Ama'rawhchu, duhthu a la sam lo hlein ka hria a. Hei hi kan House Leader te pawhin min hriatpui sela. Tin, kan Speaker te pawhin tih leh hunah chuan tun aia changtlung deuh fe hian tih theih ni sela, chu chuan kan ram hmasawna tur leh kal zelna tur pawh hi kawngro a su deuhin ka ring a.

Tin, Demand No.4 Law & Judicial ah hian Budget hi crore 15.60 vel a ni a. Budget puitling a la ni lo ah ngai ta ila. Governor khan a ngai pawimawh hle mai a. Helai ah hian Judiciary leh Executive han then hran a lo nihna ah hian infrastructure te leh thil dang hmalak chhohna turah hian hma lak chak deuh theih ni sela, a duhawm hlein ka hria a.

Tin, helai ah hian thil pawimawh tak mai pakhat chu Youth Parliament Competition hi Mizoram ah nei tura ruahman a ni a. Mizote hi rorelna leh dan siamna lamah hian hma kan sawn theih nan College zirlai atang te leh High School zirlai atang tea District Wise te, City ah te ti tura ruahman deuh kha a ni a, tih hman mang loh a ni a. Kum inah hian Rs.3,00,000/- (nuai thum) vel dil a ni a. Tunah pawh hian Budget ah hian a reflect leh niin ka hria a. Helai ah hian Rs.10,00,000/- (nuai sawm) vel tal te chu awm thei sela. Mizo hi dan leh dunah leh rorelna lamah te hma kan sawn theih nan a duhawm hlein ka hria a. Tunah pawh hian a in relate deuh hlek a. Demand No.4-na han sawi tlang nghal mai ila. Paliamentary Affairs ah hian kai chho ila. Khatianga mumal taka Legislature te leh Executive te, Judiciary te a hranga kan awmna turah hian, Assembly ina Committee hrang hrang kan neih te leh thil dangah pawh hian a executive lam te hian tlema han ngaih pawimawh deuh hlekna te hi a awm lo deuh emaw ni chu aw!, tih theihin a lang a ni.

Demand No.12-na Parliamentary Affairs ah pawh hian nuai 36 vek erh awrh chauh mai dah a ni a. Hengte hi ti chakin, tan lak a tul hle a ni. Budget-a other charges tih te hi a blank tawp mai a. Hengah te hian sum leh pai tam deuh ta sela, relation tha deuh hlek build up chho thei turin Parliamentary Affairs Ministry lam atang hian hma lak chhoh ni ta sela, a tha awm mang e aw, tih te ka rilrua ah chuan a awm a ni. A chhan chu kan Assembly hi kan General Assembly a ni mai a, House Committee hrang hrangte hi rorelna awm reng mai a ni a. Kei pawhin MLA kum khat vel ka nih atang hian ka hrechiang ve chauh a ni. Rorelna tak tak sorkar kalphung leh thil dang zawng zawng enna chu House Committee hrang hrang 20 dawn lai kan nei hi a lo ni reng mai a. Kha kha helai Assembly tluk bawh hian ngaih pawimawh a tul a, Awareness pawhin pek a ngaiin ka hria a. Hmanni pawh khan sawilan a ni nual tawhin ka hria a, chuvangin helai thil pawimawh hi School leh College level ah te, Youth Parliamentary Competition te han neih a, zirna tam tak han



neih khan tun atanga kum 20 vel ah te chuan kan democracy kalphung hi a in her rem viau mai awm mang e, tih te ka rilru ah a awm a. Chu chu ka han sawi lang duh a.

Tin, Demand No.20-na School Education hi chu SSA, RMSA tih te, Centrally Sponsore Scheme ah te kan han nei a. Tin, Education Reform Commission te kan nei a, report mumal tak a awm si loh avangin thui tak han sawi a harsa a. Kum inah pawh hian Budget hi nuai 1901.93 lain a pung a. Mahse fimkhur taka kal a ngaiin ka hria, education for all han tih han tih ngawt pawh hian thil kal a pherh lutuk ang tih a hlauhawm a. School naupang tlemte leh zirtirtu tam takte pawh hi tlema siam rem han tumna awm thei sela a tha awm mang e, tih kha ka rilru ah chuan a awm a, sawi chhuah ka duh a ni.

Tin, Higher & Technical Education Demand No.21-na hi, hei Consultative Committee ah te kan han thliar a, ram hmasawanna tak tak tur chuan Higher & Technical Education atangin student tam tak kan zirtirte an awm a, student ten nasa taka hman sawn te a ngai a. Tin, Central lam Commission tena GNP (Gross National Product) a an report ang chuan 6% GNP te hman ni sela tih te a ni a. Mahse Mizoram ah chuan hmanni pawh khan Consultative Committee kan thu a, 1.8 per cent vel chauh mai GDP ah hian hman a ni a, a tlem em em a ni. Chuvang chuan tih tam theih dan te ngaihtuah ni ta sela a thain kan hria a ani.

Tin, Consultative Committee kan thutna ah bawh hian Scholarship Centralization chungchang te kan thliar a, kan zir chiang deuh hlek a, tah chuan khami han centralize tur hian mumal taka Board te dinin, Dan ang thlapa legislate ni sela; chutichuan Board fel tak Autonomous Body-in ding sela a tha awm mang e aw, tih rilruah chuan a awm a. Amaherawhchu, chutih lai Scholarship Board Secretary kha, ka hriat sual loh chuan Chief Minister Office ah in report tura tih te kha niin ka hria a. Chumi hnuah Chief Secretary atangin order a chhuak leh a. Secretary Higher Technical Education ah in report tur tih te a chhuah leh tak avang khan, helai hi a mumal lo deuh ang tih kha ka rilru in a hlauthawng deuh a. Chuvang chuan Department 20 lai atanga sum leh pai te centralized-a hnukhawm a nih dawn avang khan a enkawltu tur a kha Board mumal tak legislate ngei ni thei sela. Heng MBSE te pawh School Education atangin an la hrang a, Budget Head neiin engkim ruahmanna a awm a. Khatiang ang khan anni te pawh hi kal ve theiin Nodal Department pangngai taka enkawl ni thei sela a tha awm mang e, tih te ka ngaihtuah naah chuan a awm bawh a ni.

Tin, ka'n sawi duh pakhat chu ka bial chhung han sawi hi ka hreh khawp mai a. Amaherawhchu, sawi ve ka duh deuh a, Education Department chungchangah hian, tun tum chu ka sawi ve hram ang a, ka bial chhung thil. Republic ah sawn Middle English School-II a awm a, SSA atangin cheng nuainga (5,00,000/-) an pe a, School Building an sa a, a chanve pawh sa zo si lovin. Ban karah naupangin lehkha an zir a, rod karah te, saw saw SSA ah pawh khan kan thlen tawh a. Amaherawhchu, hei bak chu a tih ngaihna kan hre lo an ti a. Mahse hetiang sorkar riang ruang chuan naupang enkawl na tur

atan hian ruahmanna fel deuh hlek min siam sak thei sela, saw sikul saw sak zawh ngei ni sela, tih kha kan Minister te leh kan House Leader te pawhin min hriatpuiin, khang kha ruahmanna min siam sak ula, a thain ka hria.

Tin, a Demand No.8-na hi han kai leh ila. Hei Budget ah chuan Rs.7.93 crore a ni a. Tax Revenue ah chuan hei hi a vaia an pawisa hmuh tur hi Rs.284 crore ni awmin a lang a. Hei hi Non-Tax leh Tax Revenue ah a ni a. Budget atang hian Rs.7.64% vel chu a ni a. Amaherawhchu, Rs.500 crore vel tal thawk chhuak thei tur chuan kan in ngaihtuah a ngaiin ka hria. Hetianga State ve reng ruang, kum 40 lai kal tawh chu kan in ruahmanna a tha, Tax chungchang nichinah khan a rawn sawi nual tawh na a, Tax lak dan tur leh tihpun dan tur hi kan ngaihtuah a ngai a ni. Hemi Non-Tax Revenue te pawh hi Electric bill emaw, Tui bill te pawh hi kan tihsan ve deuh a, awmze nei deuha kan kal a ngaiin ka hria. Hetiang State intodelh lova kan awm hi a fel lova. Tin, Central ah Rs.300/400 crore kan dil chhuak a. Hetiang a nih dawn phei chuan ka sawi tur a nih awm leh awm loh chu ka hre lo na a, Central ho han pek ve atan te pawh hian Income Tax te pawh hi introduce ve mai te pawh hi thil awm a ni lawm ni chu aw!, tih te ka ngaihtuah a. Lehlamah hei, Sixth Pay Commission te pawh kan nei dawn a, 6<sup>th</sup> Pay ah te pawh hian hlawh a pung dawn a. Income Tax te, sumdawng te leh sorkar hnathawk te pawh hian han pe ve ila chu a tha awm mang e aw, tih te, Central te nena thawhho thatna atan tih te ka ngaihtuah a ni.

Tin, Demand No.24-naah hian han kai leh ila. Medical hi a pawimawh khawp mai a. Budget kha nikumah khan Rs.272.87 crore a nih lai khan, kum inah Rs.159.49 crore chauh a ni a. Rs.111.33 crore in a hniam a. NRHM ah te, smashing share ah te an dah a. Heng Referral Hospital atana Rs.5.00 lakh chauh dah te pawh hi a tlem lutuk lo maw? Tih puitlin dan, Medical College te kha kan nei ang tih te kha kan sawi ut ut bawk si a. Rs.5.00 crore chauh mai han dah chu. Tin, nikum ah khan Public Health Insurance ah hian Rs.122.50 crore dah kha a ni a. Kumin ah cheng singkhat chauh dah a ni, .01 lakh chauh dah a ni a. Health Care Scheme mipui tena kan beisei hi kan nghahhlel em em hi kan kalpui dawn ta lo em ni? tih te pawh ngaihtuahna awmin ka hria a. Tin, Directorate pahnih a awm a, Medical Hospital Education hi Directorate hrana a awm rau rau a nih chuan a pay structure te thlengin tih danglam ni sela. Tah hian kan Specialist te ho kal chhovin Medical College nei chho tur te pawh a in ruahman a, tlema ruahmanna siam danglam ni ta sela a tha awm mang e, tih kha ka rilruah a awm a. Chutianga a kal loh chuan hlawh in ang pek chiah loh ang chi te hi, a theih chiah lohna lai te pawh awmah ngai ta ila. Ruahmanna fel tak awm chho sela a thain ka hria.

Tin, Hospital-a supply chi hi Medical Superintendent te hriat mang loh sawn Directorate atang hian an duh duh an order a, an duh duh an pe ringawt mai a. Chutiang ni lovin mumal takin a grass-root atangin demand rawn siam sela, an mamawh dik tak leh a company an duh angte kha rawn siam chhovin, chutiang ang chuan ruahmanna fel tak siam ni sela, kan Hospital kalphung te hi a dikin ka ring a. Chu chu kan Minister pawh hian Directorate

te leh Medical Superintendent lam te sawi puin, ruahmanna fel tak neia an kalpui hi a thain ka hria a ni.

Tin, a hnathawk indaih lo lutuk chungchang thu te pawh hi tih that a tha viau in ka hria a. Tin, chubakah chuan, Cardiology te, ICU te kan nei ve a. Dialysis te, sawng te saw 10 (ten) bedded vel tala siam chhoh theih dan a awm lawm ni, tih nikum khan ka sawi tawh a. Dialysis khawl te hi panga tal emaw awm sela, tunah pawh hian khawl thar pakhat a awm a. Chu pawh chu an nun hlei thei lova, a fit-na tur sum leh pai kan nei lo an ti a ni, (kan zawh chian chuan). Khangte kha a rang a ranga sanction peka fit a ngai a, khawl thar pakhat saw, ti sawn hman theih lohvin a awm reng mai a, khangte kha khawl thar kan neih ni ah chuan hman theih ngei se a tha awm e. Tin, Medical Staff te pawh hian thla sawm pathum tal mai hi hlawh la ve sela, Department dang Police te pawhin thla 13 hlawh an la tho si a.

Pu Speaker, minute khat chauh min pek belh la ka zo tep. Labour & Employment hi ka sawi leh duh a. Health Department conclude-na atan chuan an pay pawh hi thla 13 tal pek ve nise, a tha lawm ni, Health Department Minister mai bak, kan House Leader pawh hi a ngenin ka ngen sak duh a ni.

Labour & Employment ah hian hmalakna tak tak a tam lo ang reng a. Kan Chief Minister-in a chan awm niin ka hria a. A chhan chu Mizo population 70% vel enkawltu a ni a. Mirethei leh mi harsa te kan VIP an nih angin Youth Commission a han sawn luh pawh hi a nihna tur dik tak a ni. Labour & Employment hi chak sela, Youth Commission hi a din pawh a tul em em in a lang lova. State changkang leh ram changkang ah te chuan Plan Budget atangin 40-60% vel hi Labour Ministry ah te hian an dah a ni. ITI te, heng job oriented-a hnathawh dan tur te hi tih chak dan helai ah hian kan hmu chiah lova, Budget ah hian. Upgradation of scheme chungchang te pawh hi a lan vak loh avangin hengte hi tih lan ni ta sela a tha awm mang e, tih hi ka sawi duh a ni.

Kan sorkar in 6<sup>th</sup> pay tih chhoh dawn mek lai hian point pakhat chiah Pu Speaker. Tunah hian kan House Leader khan Labour ho hlawh tur kha House ah khan a puang tawh a. Chutih lai chuan Department thenkhat hian a skill an down sak a, 6<sup>th</sup> pay hian hlawh lo la ve ta se, an hlawh sang tur kha an skill a tlakhniam chuan hlawh ngai ah an ding dawn tihna a ni a. Entiran-Superintendent hi Assistant ah tla thla ta se, Assistant kha UDC ah. Khatiang khan 6<sup>th</sup> pay avang hian lo tla thla ta se, an thiamna te kha lo down sak se, a hrehawm lutuk dawn a. Heti laia unskilled te, semi skill te leh skill-I te, II te. Heng hi khawngaih Department te leh kan House Leader ten min hriatpui turah ngai ila. Department te hian an labour te hi skill down lovin, 6<sup>th</sup> pay-a an hlawh sang ang ngei hi enjoy tir ve thei se, tih ka sawi duh a. Labour & Employment Minister pawhin a lo sawipui tawh a. Hetah hian khawngaih takin lo ngaichang thei hram sela, anni te pawh hi sawi puin heng association hrang hrangah te pawh an harsatna sawi pui an ngai a ni. Politician te chu ram roreltu leh mirethei leh mi harsa te chawikang tur leh economic development titu tur kan nih avangin, heti laia te ngaih pawimawh ni hram hram thei se ka duh

khawp mai a. chungte chu vawiin niah hian Budget Session ah ka'n sawi ve a nih chu. Pu Speaker, ka lawm e.

**S P E A K E R** : Minute 5 lai khan i sawi chuang a, mahse minute 10 lai pawh sawi la i la khat thovin i lang e. Tunge sawi dawn le? Kan chawl rih tawh mai dawn em ni? Phar kan awm lo maw.

A nih leh minute 10 chu a la awm a, hun hmang duh kan awm em? Awle, kan chawl rih ang a, dar 2:00 P.M ah kan tan leh dawn nia.

The sitting is adjourned at 12:50 P.M.

**2:00 P.M.**

**DEPUTY SPEAKER** : Le, chawhnu session kan tan leh tawh ang a. Chawhma lam khan kan sawi nual tawh a. Tunge chawhnu lamah han tan leh ang le? Pu C. Ramhluna i lo sawm ang.

**Pu C. RAMHLUNA** : Pu Deputy Speaker, ka lawm e. Demand No.21-ah hian kan tan ang a. Higher & Technical Education ah hian, kumin ah hian an Budget hi nuai 1106 lai maia hniam niin ka hria, Demand for Grant kan en hian. Hei hi tuna kan Plan thanna 20% increased atang pawh hian lo tih belh dawn ta pawh ni ilangin, a pha lo viau in ka hria nikum kha. Hei hi enchian atan a tha viau in ka hria.

Chu bakah chuan Salary component ah hian 48% a awm a. Tin, Scholarship component ah hian 43% a ni a. Hemi te pahnih belhkhawm hi 91% a tling daih mai a. A dang thawh tur a tlem hle dawnin ka hria a. Chu chu ka'n tarlang duh bawk a.

Tin, Scholarship chungchang thu hrim hrimah hian Pu Deputy Speaker, sawi duh ka neih chu, tunhma atang khan Post Matric Scholarship hi Board fumfe tak siam a pek thin kha a ni a. Board Member te pawh 9 lai an awm thin a. An Chairman te pawh Commissioner Secretary niin Board Member Secretary te pawh an lo awm thin a. Hei hian B.A te, BSc., B.Com. te M.Com. Scholarship te an lo ngaihtuah thin a ni a. Mahse engemaw chin atang khan Centralization hi tih tumna a awm a. Chumi awmzia chu Department hrang hrang Technical Department tena a hran a hraia stipend te, scho. te an lo pek ang thin a kha, hemi Board ah hian merge tumna a awm niin ka hria a. Chumi pawh chu kan hriat sual loh chuan 2<sup>nd</sup> December, 2009 ah khan Cabinet khan a approved tawh niin kan hria a. Chumi atana Rules siam turin Higher & Technical Education Department kha tunah hian tih tir mek an ni. Mahse khami Rule chhuah hma si khan he Centralization hi kawng danga kal tir niin a lang a. Hemi Member Secretary hi Higher & Technical Education Department-a Joint

Director junior ber kha Director ang deuh thawa function-in a tirah phei chuan Chief Minister Secretariat ah dah niin, a hnuah Secretary Higher & Technical Education ah khan dah leh a ni a. Tichuan Director of Higher & Technical Education kha a kal hlen ta daih mai a. Ama hriat loh in thil a kal vek a, Secretary atangin sanction kha pek a ni ta a. Tunhma chuan Board hian Scholarship hmu tur kha a lo ngaihtuah a, an thlan fel hnuah Director, Higher & Technical Education Department khan a lo sanction mai kha a ni a. Khami sanction tur khan Sanctioning Authority khan a pek a ni a. Mahse deligation of financial powers kha siam that ni chuang silo khan tunah hian Secretary khanin Sanctioning Authority kha a lo enjoy ta tihna a ni. Tichuan Secretary leh Board Secretary khan Scholarship kha an lo chalai ta a. An Budget hi a lian thiam viau leh nghal a. 43% of the budget total kha an control tihna a ni a. Hemi hi Director hriat loh a thil kal hi a dik lo niin a lang a. Directorate hran siam deuh thaw ang khan a lang ta a. Hei hi enchian deuh a thain ka hria a.

Tin, chubakah hemi centralization hi a fel ber em aw ! tih hi ngaihtuah a tulin ka hria a. A chhan chu Technical Department hrang hrangte entiman – BE te, MBBS te leh BSc. Agri. te, BSc. Forestry thleng khan mahni Department theuh kha tunhma chuan an stipend leh scholarship kha pek thin a ni a. Hetianga han pawhkhawm kher kher hi a tulna a awm pawhin a lang lova. A chhan chu hei hian harsatna tam tak a thlen thei tlat a. Department hrang hrang Budget kha lakkhawm a nih dawn avang khan han puk khawm a, sanction han move vel pawh kha thil buaithlak a ni dawn tlat a. Chuvang chuan he Centralization hi tih loh ni sela thain ka hria a, Pu Speaker.

Tin, chubakah chuan Higher & Technical Education-a Director hriat loh a Joint Director pakhatin he scholarship a lo chalai a, direct-a Head of Department anga Secretary hnena file a put-up hi thil fel a ni lo tlat a. Department kalphung niin a lang lo tlat a. Hei hian deligation of financial power a khawih a, lo enchian deuh atan a thain ka hria a. Chu chu ka han pulut duh a ni.

Tin, Demand No.20-ah khan School Education-ah an Budget kha nikum ai khan nuai 590.6 ai khan a hniam a. Hei hi kan sawi tak ang khan 20% increase ang khan engemaw zat pek belh theih tur angah ka ngai a. Chu chu tihpun nise thain ka hria a.

Tin, thil pakhat lawmawm deuha ka hriat chu Supplementary Grants ka'n en khan 'lumpsum for Grants-in-aid' tih te kha a lo lang ta a. Kumin ah nuai 872.68 lakh hi Middle School te, High School te leh Higher Secondary School te, Non-Government ho kha hemi atang hian pek theih tur awm a langin ka hria a, a lawmawm hlein ka hria. Kumin chung ngei hian han pek theih a ni ang em ? tih te ka'n hre duh a. Tute nge, engzat nge an pek dawn ? tih te pawh kha hriat theih ni sela a van tha dawn e, tih te ka rilruah a awm a. Chu chu ka han ngen duh deuh bawk a. Tin, 2010-2011 ah hian Non-Government School ho tan khan Grant nuai 2827 lai kha dah awmin ka hria a, a lawmawm hlein ka hria, lawmthu ka sawi a.

Thil pakhat ka sawi leh duh, Hindi Teachers ho hi tunah hian lak tumna a awm niin kan hria a. District Council ah te pawh pek an ni a. Middle School atan hian Hindi B.A. a ngai kher nia hriatna kan neih lai khan, Hindi Matric pawh kha a tawk e, tia sawina awm niin kan hria a, helai hi min hrilhfhiah thei sela a thain ka hria a. M.E. School tan hian Hindi B.A. nge nia qualification atan hian matric tih lai a kha ka han zawt duh bawk a ni.

Tin, ka bial chhungah kal ta ila. Hmawngbu High School hi MBSE atan hian affiliation hi kan dil ve mek a, chu pawh chu min ngaihtuah sak sela a thain ka hria a. Tin, Hmawngbu Kawnpui hian hemi lumpsum Grant-in-Aid atan khan pawisa an mamawh tam khawp mai a, kum li lai mai High School an lo run ve tawh a; anmahni khan an inpe ve mawlh mawlh mai kha a ni a. Kha kha min ngaihtuah sak sela a thain ka hria a.

Tin, Medical & Public Health ah hian han sawi duh ka nei a, Pu Speaker. Health Care Scheme hi kan nghak rei ta hle mai a, khawngaih takin hei hi tih hma sak theih hram se a thain ka hria a. A bik takin thingtlang lam bialtu tan chuan a luhai thlak hle tawh mai a. Hei Gazette ah hian in chhuah kuau a, May 21<sup>st</sup> 2009 ah khan, July 1<sup>st</sup> 2009 atanga implement tan tura tih kha a ni si a. Vawiin hi March 29<sup>th</sup> 2010 kan thleng a ni tawh si a, vawiin ni thlengin 'la tih theih loh' tih reng mai hi, Thingtlang mipui tan a hrehawm hle a, nitin damlo hi keini ho chuan kan buaipui a ni mai a. Hei hi engtikah nge min tihhlawhtlin sak theih ang aw, tih hi kan lo thlir reng mai a ni. 'Pawisa hi Asian Development Bank atangin ka la hmu lova, churang chuan a ni e, tia chhanna te kha kan hmu a. Mahse ADB atanga pawisa kan puk te pawh hi sorkar ho hnathawk hlawh atan te khan hman ni anga hriatna te kha kan nei a. Kha kha a dik em? tih te pawh kha kan hre duh a. Chutiang te a nih lek phei chuan mipui tan hian chan tur a tlem lutuk dawnin ka hria a. Churang chuan he Health Care Scheme hi kan Minister zahawm tak hian min tih hma sak thei lawm ni? Engtikah nge min tih sak theih dawn? ADB atangin loan pawh chu a thleng tawhin kan hria.

Tin, chubakah chuan Ministry hmasa a an lo dah vaibelchhe sawm nuai sang khat kha a pung nen phei chuan a lo tam viau tawh a, a pung kha nuai 12 tling tawh a ni a. Churang chuan khangte pawh kha hman tangkai theih a ni lawm ni, tih kha tunah hian ka han ngen a. Kan Minister zahawm tak hi ka han chah duh bawk a ni e.

**DEPUTY SPEAKER** : Tunge sawi leh ang? Parukin kan sawi tawh a. Kan duh tawk dawn em ni? Kan duh tawk chuan Minister khan han wind-up mai sela.

Pu B. Lalthlengliana i lo sawm ang. A hnung lama sawi turin ruling lam kan inkhek deuh a ni ang e.

**Pu B. LALTHLENGLIANA** : Pu Deputy Speaker, a hmasa bera ka sawi duh chu Law & Judicial, Demand No.4-na kha tawite sawi ka duh a. A chhan chu Judiciary leh Executive a hran hnu hian, Executive hi Court rorelna ah a inrawlh loh chungchang hi sawi tur pawh awmin ka hre lova. Amaherawhchu, hmanni khan kan Law Minister zahawm tak khan kan House Leader zahawm tak case chungchangah sorkar hmasa kha inrawlh ang lek leka sawina a rawn neiin ka hria a. Vawiin ah kan Law Commission Chairman khan a rawn sawi lang leh a. Chuvang chuan tawite sawi ka duh a.

Pu Deputy Speaker, he sorkar a lo din phat khan policy pawimawh ber nia kan hriat chu Flagship Policy NLUP kha a ni a. Chumi ah chuan hma chak takin an la dawn emaw tih laiin House Leader zahawm tak case chungchangah hian sorkar a rawn inrawlhna a lo lang a, zawhna ah pawh ka zawt tawh a, Kan Law Minister zahawm tak pawhin min chhang tawh a.

Public Prosecutor hi Political Appointment a ni a, sorkar tharin ban a duh chuan a ban thei a ni. Amaherawhchu, hmanhmawh tak maia ban an han ni chhova. Sorkar hian bang turin a ngen hmanhmawh hle a, bang duh lo Public Prosecutor kha ban nghal a ni a. Midang Additional Public Prosecutor te, Assistant Public Prosecutor te banna chu tlai khawhnu deuh ah pawm a ni a. Sorkarin bang tura a tih, banna thehluh tawh te chu Court-a ding tura ti lehin Pu Hawla thubuai ah hian din tir leh an ni a. Chuta ding tura an tih hnu chuan kan Tlabung leh Tuipang lui Hydel Project hna thawhna ah kan Chief Minister eirua puhna thubuai chu sawiin Special Court chuan he thubuai chargesheet tawh chu thil tling lovah ngaiin, February thla chawhnu lam khan charge frame lovin a ti tawp ta a.

Tin, Income Tax hovin hnam dang sumdawng chenna in leh an dawr te 1995-a an dap tuma politician thenkhat Chief Minister tiama an in hnamhnawih nia an puhna leh chumi behchhana chanchinbua thuchhuak kal zel tlawhchhanin, Rev. Zairema leh Pu Bualhranga te thubuai thehluh kal zel pawh chu kumin 26<sup>th</sup> February khan tih tawp a lo ni ta bawk a. Court thutlukna hi sawisel chi a ni lova, mahse hei erawh hi chu a chiang khawpin ka hria a. Tuna sorkar aiawha Lawyer ding zinga hotupa ber Special Public Prosecutor hi Pu Hawla Ukil hotupa ber kha a ni a. Public Prosecutor dang thenkhat pawh hemi case-a Ukil hman thin te tho a ni hlawm a. Amah chhantu Ukil rawih te chuan he thubuai hi an sawi ta a, thiamloh chan ngaihna a awm thei tawh lo a ni.

Chuvang chu a ni ang Special Judge-in (Pu Lalsawta – khatih laiah kha chuan separation of judiciary a awm a, Ministry lam emaw Executive lam emaw khan an inrawlh lo tih kha Member ten hria se) Pu Deputy Speaker, ka hriat ang ka sawi ve mai dawn a ni.

**Pu LALSAWTA, MINISTER** : Member zahawm tak Pu Lalthlengliana'n he case hi a tuipui hle a. Tuna a sawi te kha sawi thiang lo leh thu dik per san a ni. A tuipui khawp a, a tui anga awm ta lo hi a

beidawng a ni ang tih ka hlau a. Tuna a sawi te kha Law Commission Member zahawm tak Pu Rinmawia sawi kha thudik vek a ni. Public Prosecutor te kha a dependant lamah an ding thiango tih kha Member te chuan hriat ve awm tak a ni. Khati lai kha chu sawi tawh lo ula, Judiciary kha chu a hrang a ni.

**Pu B. LALTHLENGLIANA** : Pu Deputy Speaker, a kaihnawih thil a nih chuan kan sawi thei dawn lawm ni ?

**Pu LALSAWTA, MINISTER** : Member ten kan hriat ngai chu Court judgement ah khan an lungawi lo a nih chuan a chungah Appellate Court a awm zel a, Supreme Court thleng an kal thei a. Helaia sawi tur chi niin ka hre lo.

**DEPUTY SPEAKER** : Kan dan hre mi te, kan Law Minister te sawi ang khan, kha kha chu heti laiah sawi tawh lo ila, in duh a nih chuan Higher Court ah a kal zel theih tho a. I duh tawk ang.

**Pu B. LALTHLENGLIANA** : Pu Deputy Speaker, ka hriat dan chuan a lawmpui ber te zing ami ka nih ka ring. Politician hi corrupt ber leh chhe ber anga sawi kan ni a. Hetiang sawiselna kara thiam a chang kha politician kan nihna angin ka lawmpui a ni. Amaherawhchu, a lawmawm a khalai thilah khan a thiam channa kha, appeal tur chuan mipui aiawha ding Public Prosecutor te kha appeal tur chu ni awm tak a ni. Mahse an appeal dawn silo kha, Justice a awm thei dawn em ni ? tih lai kha ka sawi lang duh a ni, Pu Dy. Speaker.

A sa huata han khawih deuh chuan in te leh hlur mai thin a. A sa huat loh lam deuhah ka'n kal ang e. Pu Deputy Speaker, khalai min tih buaina kha chu hun min pe turah ka ngai a, min interrupt nasa em mai.

Medical & Public Health Services, Demand No.24-ah hian Aizawl Civil Hospital OPD Building bo chungchang leh Mobile Medical Unit hlui leh thar tih chungchang kha, zawhna ah kan zawt thin a. 'Chhui mek a ni' tih a ni a. Hei hi chu thil ho tak niin ka hria a, chhui tur pawh a awmin ka ring lova, Mobile Medical Unit te hi a hlui a nih chuan a hlui ti mai sela, a thar a nih chuan a thar a lo ni e, tih mai kha a tha mai lawm ni ?

Tin, OPD building bo pawh estimate a awm vek a, a chhawng sak tur zat a awm vek a. Khalai a sa tling lova a bo a nih chuan a lo bo a ni a, heti zat a kim lo, tih mai kha kan hriat duh chu a ni. Amaherawhchu, wawin thlenga kan Minister zahawm takina min chhang fiah thei lo hi a paw ka ti a, hei hi chu khawngaih takin a rang thei ang berin thudik duh tlang kan nih avangin a dikna hi chu lang se a thain ka hria a.



Tin, Pu Deputy Speaker, Health Care chungchangah hian zawhna kan zawt a, hei pawh hi market rate a danglam avangin a interest min hrilh thei lova. Market rate kha eng ang pawhin danglam sela, kan zawhna chhan hun laia a pung zat kha min hrilh mai se. SBI-a a pung erawh kha chu Rs.12,00,000/- (nuai sawmpahnih) something a nih thu min hrilh a. Health Care ami pawh hi a pung hi cheng vaibelchhe thum nuai sawmriat pali singriat sangnga zaruk sawmriat pariat, pawisa sawmkua pakua (Rs.3,84,85,688.99) kan zawh lai vela pung awm chu a ni.

Hemi chungchangah hian Pu Deputy Speaker, market rate a fluctuate avangin hei hi a effect thei a ni tih kan hria a. Market rate fluctuate avanga tlahniam lo turin fund hi switch theih a ni, fund hi paruk lai duh duha thlak kual theih tur a ni a. Company pawhin society hi ziakin a hrilh tawh a, market rate tlahniam pawha tla ve lo tur fund thlakna pawh hi pek an ni a. Fund hi equity fund atangin bond segment-ah an freeze anga market that leh hunah fund perform .. (Pu H. Zothangliana : Pu Deputy Speaker, a ziak chhiar kha in awih lo emaw ka ti a) Ngawi rawh, he House ah hian kum 20 dawn lai kan awm chho dawn tawh a, ziak kan chhiar lova, kan sawi mai a ni. Pu Deputy Speaker, i hriat thin kha. Perform pung sang chak berah dah leh tur a ni. Hemi ti tur hian a neituin fun switching form a sign a ngai a, a phalna a pek a ngaih avangin Mizoram State Health Care Society signature January, 2010 ah khan dil a ni a. Vawiin thlengin phalsak a la ni lo a. Pawisa pun tam hi sorkarin a hlau nge? Engati nge hei hi a tih hreh em em! Phalsak ula, he Health Care sum Bajaj-a an dah hi kum thum hnuah a pung a tam chuan he sorkar hi a tel tu tur a nih dawn avangin he thil hi chu tih sak hram nise thain ka hria. Tin, chubakah chuan Pu Deputy Speaker, Health Care kan tih loh avanga mirethei tam takin an tawrh bakah Bajaj Alliance Mizo thawk tam tak hian hlawnh la thei lovin an awm phah a. Chuvangin hei hi chu kan Minister zahawm tak hian min hriat sak sela.

Tichuan, Pu Deputy Speaker, min tihbuai chhung kha a rei em mai a. Ka bial chhung Farkawn PHE ah Doctor an nei lo reng a, hei hi khawngaih takin kan Health Minister hian min hriat sak se ka duh a.

Tin, pakhat ka zeh zawk duh chu damdawi In area-a Recreation Centre siam tum tlat mai saw, a hmun a chep tawh si a, Police Station te saw kan acquire phei thei a; a hmun kan zauh a nih loh chuan hei hi kan hnam kal zelah a that ka ring lova. Chu chu kan sorkar hian decision a lo siam tawh a nih pawhin min ngaihtuah nawn sak leh thei se, tih ka sawi duh a.

Tin, damdawi ina gas pipeline Pu Deputy Speaker, a pawimawh em avangin gas pipeline ward tinah, khum tina mamawhtu te hnena bur hnuh rik rum rum ngai lova pek mai theih tura pipe fit vek tawh, gas siamna pawh peih fel vek tawh, chumi in a mamawh power pawh Power Department-in an siam sak vek tawh nia a lang hi a rang thei ang berin kan Health Minister hian ti puitling se, tih kha ka'n ngen duh a ni. Ka lawm e.

**DEPUTY SPEAKER** : Member ten in hriat tur, hman niah khan kan sawi tawh a, kan thusawi tih fiah nan emaw, tih chian nan emaw lehkha han chhiar duh kan nei a nih pawhin Chair kaltlanga chhiar tur a ni, kan tih kha. Kha kha kan sawi nawn leh ni sela. Tunge tunah han sawi leh ang le?

**Pu NIRUPAM CHAKMA** : Pu Deputy Speaker, ka lawm e. Hei Department 8 lai sawi tur a ni a, minute 10 chhungin kan sawi hman dawn si lova, a pawl khawp mai.

A hmasa berah Law & Judicial Department chungchangah – nichinah kan Member zahawm tak, ka hmaa thusawitu khan engemaw a sawi ve a, gas chungchangah te khan. Ka sawi duh chu Public Prosecutor te, Advocate General te, Attorney General te khu sorkar lam Ukil an ni a, sorkar inthlak veleh an resign tur a ni. Chu chu hria se khatiang a awm tih hriat kha chuan stepdown hial te a ngai tur a ni. Nakinah an sorkar leh chuan, an sorkar leh thei a nih chuan, kha kha chu tih tur ni awm tak a ni. Chuvang chuan he thilah hian duhsakna thilah emaw engnge ni, with ulterior motive chu a ni lo a ni tih kha kan sorkar thil tih danah hian a Chiang a ni a. Tin, a case hrim hrim hi corruption case chu fast track court-ah trial a ni a. Chuvang chuan rei tak a awm chuan sorkarin a nawr loh chuan emaw, prosecution lam atangin nawr a nih loh chuan case hi delay-in a awm zel a. Chuvang chuan eng case pawh (sorkar lam atangin tunah hei Congress sorkar a ni a.) corruption pawh engemaw chu a awm a, chuvang chuan public prosecution lam atangin hetiang thilah chuan chak takin hma la sela, tih kha ka sawi duh a ni.

Tin, Gram Nyayalayas hi bill kan pass a, kan minister chak tak hian he thilah hian implement dan a rang thei ang bera he dan hi hman theihin bawhzui sela ka duh a. Tin, Pu Deputy Speaker, court hi Lawngtlai ah kan nei lova, Lunglei ah lo kal zel a ngai a. Chuvang chuan a rang thei ang bera court hi dah theih dan awm sela, tih hi ka sawi duh a. Tin, Sub-Division level thlengin, Chawngte ah te pawh Sub-Division Court kha min dah sak sela, tih kha ka sawi duh a. Tin, Law & Judicial Department chungchangah chuan Mizoram Court, tuna volume pali thleng siam hman tawh a ni tih tarlan a ni a, chuvang chuan lawmthu ka sawi duh a.

Health Department chungchangah khan Pu Deputy Speaker, Mizoram Health Care Scheme hi kan zavaiin tha kan ti a, implement zel se pawh kan duh a. Amaherawhchu, thil kal tawh atangin tih fuh loh pakhat awm chu kan hre vek a. Bajaj Alliance-a investment kha, investment chu sorkar atangin tih theih a ni. Mahse mimal hminga sorkar pawisa dah kha dan lo a ni, chuvang chuan sorkar kalta te khan mimal hminga investment an siam kha dan lo in an ti a ni. Legal lam atanga sawisel theihna pawh kha kha a ni a. Engatinge sorkar pawisa hi mimal hminga invest a nih ang? Hming that duh vang a nih chuan ka hming pawhin dah rawh se, ka remti alawm, anmahni ringawt an ni lo a nia. Tuna kan Chief Minister pawn a duh ang, hmingthat tur a nih chuan. Amaherawhchu, dan lo a ni, kha kha.

Chuvang chuan thil tihna zelah dan hi hre ve se, tih ka sawi duh a ni. Tin, he scheme hi ADP sum hmuh veleh ti thei sela mipui tan a tha ang, Pu Deputy Speaker. A dik takin thingtlang amite tan a tha lehzuah dawn a. Tin, Health Department chungchanga ka sawi duh pakhat chu, Health Care hi mitin mamawh a ni a, mahse Mizoram ah chuan Health Care Scheme pawisa tam zawk chu town ah hman a ni. Thingtlang lamah eng percentage nge kan hman? tih kan ngaihtuah a ngai. Sorkar pawisa investment hi thingtlang lamah 50% pawh a tling lovang, ka rindan in. A chhan chu programme reng reng hi town ah District Hospital ah te, programme hrang hrang advantage lak theih a ni a. Chuvang chuan kan Minister pawh ka ngen duh a, thingtlang lam hawiin programme siam rawh se; thingtlang lamah Health Care kan mamawh. Tin, kan Chief Minister te chungah pawh lawmthu ka sawi duh a. Borapansuri ah NRHM atangin Primary Health Centre min dah sak dawn a, a building te pawh zawh tep a ni tawh a ni. Chuvang chuan a lawmawm hle a ni. Tin, hmun dangah te pawh min dah sak an tum niin ka hria a, chuvang chuan lawmna tur hlir niin ka hria. Tin, Parva ah te pawh kan mamawh a, Parva te chu hmun pawimawh a ni a, Mizoram ah phei chuan the last corner a ni. Chuvang chuan Parva ah te pawh min ngaihtuah sak sela. Tin, NRHM hi Dual Finance Commission lam atangin, Health Sub-Centre sak tur atangin, a bik takin border area lamah hma min lakpui se, tih hi ka sawi duh a ni, Pu Deputy Speaker.

School chungchangah khan kan Minister zahawm takin bialtu ka nihna angin ka'n sawi ve ang a. Parva ah ka zin ve a, an High School ka tlawh a, kan Chief Minister te kan District Council hruaitute nen. School ah chuan bench pakhat mah a awm lo a, zirtirtu pahnih ka kal hmian an lo thleng a, L.D.C. pakhat nen, Chair pahnih chiah a lo awm a ni. Chuvangin a rang thei ang berin lo hawng rawh u, ka ti a. MLA fund atangin estimate twenty nine thousand chu ka pek sak ringawt a ni. Tuna Minister nilo, a hma ami in Govt. School a enkawl dan a ni a, Pu Deputy Speaker. A hma ami ka sawi rualin kan present Minister hian a feel ang tih ka hlau a. Amaherawhchu, ama enkawl zui a nih avangin sikul en dan chu inspection awm loh chuan khatiang kha a awm a ni. An seal te pawh Sazuin a ei an ti, sikul seal hi, mak deuh a nia. Mautam vang em ni? Chuvang chuan ka sawi duh chu sikul tha kan duh chuan a bik takin thingtlang lamah inspection hi ngai pawimawh sela. Tin, Minister zahawm tak hmalakna zarah HSLC result te pawh a tha 66.6% hial pass kan hmu ta a. Keini awmna lam Kamalanagar lamah pawh an ti tha a. Pathumna chu Kamalanagar New Angel School a ni a. Amaherawhchu, tlem ka feel ve a ni result chhuah ni khan. New Angel School, Lawngtlai angin kan dah sak a. Kamalanagar chu a lang tawh lo reng reng, kan veng a ni si. Pathumna ah Mizoram awm tirh atangin Board-ah Top 10 ah a tling ve a ni a. Mahse kan veng lang ta lo chu kan rilru chu a na a ni, chu chu Minister pawh ka hrilh a. Engpawh nise hei hi chu siam that dan a awm leh ang, Kamalanagar lang hrim hrim chu moral boasting a ni a. Chuvang chuan New Angel School, Lawngtlai angin engtik atangin nge a chhuah? Inadvertent mistake chu a ni lovang a, enge ni, thil dang a awm em ni? tih kha ka ngaihtuah a ni.

Pu Deputy Speaker, point pakhat chiah ka sawi leh ang. Trade & Commerce chungchangah khan kan hre vek a, investment contract te kan nei a.

Tin, Burma leh Bangladesh nen sumdawna awm thei turin kan Chief Minister leh kan Minister zahawm takin an Officer te telin nasa takin hma an lakna azarah Tlabung lamah sumdawna awm thei tur dinhmunah kan ding a ni, chuang chuan lawmthu ka hrilh a. Pu Deputy Speaker, tam tak sawi tur a awm chungin hun a tlem avangin ka sawi tawh lo mai ang. Tin, khaikhawmna tur atan chuan heng Minister pahnihte hi distinction ah an pass a ni, an ti tha lutuk ka ti. Tam tak kan sawi dawn lo, achievement tam tak sawi tur a awm, mahse hun chep vangin ka sawi hman lo a ni. Pu Deputy Speaker, ka lawm e.

**DEPUTY SPEAKER** : Tunge sawi leh ang, sawi tur in awm loh chuan kan discussion kan ti tawp mai ang. Kan Minister kan ko mai dawn em ni? A sawi tur hi chuan sawi mai ula, kan innghak a, a tawpah “hun min pek belh rawh”, kan ti leh a. A sawi kha chuan sawi vat vat ila, chumi a nih loh chuan Minister te kha wind-up turin ko mai ila.

**Dr. R. LALTHANGLIANA** : Pu Deputy Speaker, ka lawm e. A hmasa bera ka sawi duh chu, Demand No.21-na Higher & Technical Education ah hian, kan Finance Minister Budget Speech ah khan nuai 400.3 khan nikum Budget kha kan phalo in ka hria a. He Department hi a pawimawh khawp mai a, Higher hi kum kalta, tunhma ka thlir pawhin indaih lo reng rengin an khawsa a, he India ram hian kalphung tur tha a ka ngaihdan chuan, hemi State Budget share an neih dan tur 6% tal hi chu tling thei sela tih a nih lain, 2% bawr velah hian waviin ah te pawh hian kan la thu niin ka hria a. Hei hi enchian a pawimawh khawpin ka hria a.

Tuna kan sorkar kal chho mek pawh hian kan Higher bik a hi ngaih pawimawha kan neih tak tak loh chuan heta Elementary lampang, School Education lampang kan uar viau ruala heta a chhip ler puitling a nih tak taka an zirlai lam a hi ngaih pawimawh a tulin ka hria a, tih ka sawi duh a. Heng a nih avang hian kan College infrastructure pawh hi a chhe viau mai a, a pawi khawp mai. Building hmuh tlak lutuk hi kan nei lo a ni ber mai a. Tin, heng hian Library te, furniture te, thil tam tak kan mamawh ang chi kha kalpui hleih theih lohin a khawih bawk a.

Tin, kan zirlai naupangte excursion an kalna tur te leh field trip an neihna tur te leh khang thil chi hrang hrang a kha waviin niah hian rual awt tak maiin kan zirlai, a bikin kan higher lampangin a enkawl ho hi an awm a ni tih hi kan hriat te kha a tha viau a.

Tin, kan Higher Department lam hi Recruitment Rules and Service lam khi waviin ni thleng hian la chinfel loh niin ka hria a. (Ka hriat sual loh chuan) Vawiina kan Officer, a top-a awm te pawh hi a kum khawi zawk nge ni hman tur tih pawh Chiang mang lovin, waviin ah hian kan la awm tir reng mai a, a fel lo khawp mai a. Hei hi kan Minister pawhin chak taka min kalpui a tul hlein ka hria a, ka'n tarlang duh a ni.

Tin, chumi rualin Higher & Technical Education ah hian lecturer kan neih hi 600-700 inkar vel Mizoram ah hian State Government lecturer kan neiin ka hria a. Anni hi an pawimawh khawp mai a. 4<sup>th</sup> pay leh 5<sup>th</sup> pay ah khan UGC scale ti mai ang, UGC ina ruahmanna a siam ang khan hlawhte pawh hi an hmang ni khan a hriat theih a. Chutih lai chuan hei vawiin ah UGC pay scale leh norms an hmanna tur atan ruahmanna kan la siam fel thei tlat lo mai hi pawl ka ti a. Cabinet-in hei hi vawiin niah hian kan la chingfel lo niin ka hria a. Kawng leh lamah an arrear 1.1.2006 atanga an lak tur anga kan beisei 80% te phei hi chu State Cabinet-in fel taka ro kan rel chuan Central Sorkar-in a tum tur tho tho kha a ni mai a, UGC hi kawng leh lamah chuan an thil phal viau a ni. Chuvangin vawiina Cabinet decision awm lova, ka hriat dan phei chuan Delhi-ah MCPA ho kha an in tir niin ka hria a, Delhi thleng thla a an thiam ang anga zuk nawr te an tum a ni awm a. Mahse tun thla chhunga chingfel tur nihnih emaw lek ngai si, kan la ching fello hi a pawl ka ti ang reng viau mai a, ka'n sawi duh hrim hrim a. Special Attention kan Minister pawhin a pek a thain ka hria a.

Tin, facilities dang zirtirtute hian an neilo a ni tih kan hriat vek a ni a. Hemi kara duhsak theih tur ang chi Group 'A' Rs.8000/- in an tan a, tunah hian Mizoram sorkar-a kan Gruoup 'A' te hi Rs.10000/- ka hriat sual loh chuan an thu deuh vek tawh niin ka hria a. Hemi kara anni kan la chingfel thei lo hi a pawl ka ti a. Chutih rualin Qualification chungchangah hian University hi a strict em em tawh a. M.A kha College ah a luh ngawt theih tawh lo tih kan hre vek a, NET through loh leh thiamna bik neilo tan phei chuan luhna chance a awm lo a ni. Chutiang khawp zirtirtu, a bikin College ah tlin a har viau lai a, an dinhmun kan la siam fel thei lo hi sorkar hian en uluk sela, tih hi ka sawi duh a ni.

Tin, Demand No.4-na Law & Judicial ah khan, hmanni ah D.C Office ah kan han kal a, Pu Deputy Speaker, Birth Certificate tih tur thila tlema harsatna engnge an neih hriat fiah deuh tumin ka han kal a. A buaithlak ta riau chu, tunhma in Deputy Commissioner-a kan tih mai thin kha tunah chuan a lo ni ta mang lova, Law & Judicial khan a lo khawih ta a. Engemaw thil tih neuh neuh tur, chawi vel ngai te kha a lo tam mai a, thingtlang atanga lo kal te leh lehkha thiamlo tan phei chuan a buaithlak na lai riau mai Pu Deputy Speaker, a lo awm tawh a.

Tin, chumi rual chuan hemi Property Registration tih te, Wills kan han tih ang te, tin, HBA pawh sorkar hnathawkin emaw la dawn ta ang se. Entirnan-2,50,000/-la tur chin angah phei chuan an Registration Fee pek ngai a kha Rs.5,000/- a lo ngai der tawh mai a. Tin, 25,000/- hnuai lampang tan 2% chawi a lo ngai a. Hetah tunhmaa D.C. Office-a a aia tam kan han tih a kha kawng leh lamah, helam ah harsatna tunah khian an nei mek niin ka hria a, pawl ka ti khawp mai a. D.C. Office tinah kan Executive Magistrate te ina an tih leh mai thin, tunhmaa an tih ang thin kha kalpui dan hi a awm mai lawm ni aw ! hetiang a nih chuan mipuiin harsatna kan tawh a. Tin, a sorkar hnathawk ang tak pawha harsatna kan tawh theih chi hi awmin ka hria a, ka'n tarlang duh a ni.

Taxation hi Demand No.8 a ni a. Tah hian ka'n sawi duh lawk chu, hei Mizoram chhungah hian State Government Employee nilo, Central Government Employees Mizoram University-ah te pawh thawk engemaw zah an awm a. Tin, Central Government Employee hi engemaw zah an awm a. Tunah hian Income Tax Office hi Mizoram ah, Aizawl ah te pawh hian kan nei lo niin a lang a. Chuvang chuan a hnai ber Mizoram ri dep Silchar bawr velah khuan an zuk pe mai thin ni te pawhin a lang a. hei hi enfel a ngai khawp mai a. Tunhma pawhin ka vei ve deuh thin a, helai hi. Amaherawhchu, hei hi tun thleng hian kan la ngai pawimawh tawk lo deuh em ni chu aw ! ka ti a. Hei hi sawi hlawh lo tak mahse thil pawimawh tak si niin ka hria a, ka'n tarlang leh duh a ni.

Tichuan, Demand No.20 naah khan hei kan sorkar hmasa ina ruahmanna kan lo siam pakhat pawimawh kan tih em em Quality Education-na atana kan tih, hemi kan zirtirtu te anmahni duhthlan ngeia an retired theihna tur atan Golden Hand Shaker Scheme Voluntary Retirement Scheme kan han tih ang chi, Asian Development Band-a a project te siam a kan han thlen, a taka a hlawhtlin theihna tur atana tangka lo kal ta; tun sorkar pawhina tha ti a, kan han chhunzawm tur hi a lawmawm ka ti khawp mai a. Hei hian quality tak takah min hruaina tur atan kawng a su dawn niin ka hria a. Hei hi tha taka a kal theihna tur atan uluk taka hma lak hi tulin ka hria a, ka'n tarlang zawk duh a ni.

Tin, sorkar hmasa hun laia kan lo buaipui kan lo buaipui, kan Chief Minister bial tih lohah chuan District 7 danga kan neih loh Free School kan ti mai a. Hetiang ang kha District 7 ah tunah hian hmalak kha a kal chho mek a. Rs.20/30 crore tel a, District 1 atana kal a ni chho a. Hei hi kan tangkai pui a ni dawn a. A chhan chu free education a ni a. Tooth Paste te, towel te leh an ei tur zawng zawng leh text bu leh engkim mai kha a free vek a. Central sikul a nihna anga hei hian min tum sak ang tur chi, hma a lakna kal chho mekah, hmun tam takah chuan chak tak pawhin hma lak mek a ni a. Hei, kan bial ti mai ila, Lunglei lampangah pawh, Kawmzawl, Pukpui bulah an sa khir en un tawh a, ka lawm khawp mai a. Hmun dangah hian enge a an ka hre thui lutuk lova. Amaherawhchu, hei hi sorkar ang pawha keimahni State sorkar ina contract hna leh a hna kha kan va hriatpui lutuk loh a nih rual hian kan enpui ve deuh a tulin ka hria. Hei hi kan neih theih chuan District tinah hian awmze nei takin, za engemaw zat tel, mirethei fa tak tak te, zirna tha kan pek theihna tur a free-in a ni dawn a. Hei hi ka ngai pawimawh khawp mai a, ka'n tarlang leh duh bawk a ni.

Tin, chumi rualin thil pakhat ho tak anga lang, hmanni lawkah sikul games, Aizawl ah hian neih leh a ni a. Chu sikul games an neih dawn chuan Lunglei lam atanga lo kal tur zirtirtu thenkhatin min rawn phone a. "Hei, rawn thlen chu kan rawn thleng thei naw naw ang a, mahse hawna lampang tur a hi chu tihngaihna a awm mang dawn lo a ni" an ti a. Theih ang ang te in kan lo intanpui ve ringawt a. Hei hi tun hma atang khan a ni, kumin chauh pawh hi a ni lo. Tunhma atangin hetiang zirlai naupangte kan chah phei a, Mizoram, kan khawpui bera kan chah phei tawh si a nih hi chuan, fel deuh

hleka an hman theih tur ang chi, an hman tham ve deuh sum ruahmanna hi physical education lamah hian kan dah hi a pawimawhin ka hria.

**DEPUTY SPEAKER** : Ngawi lawk rawh aw. Minute 10 a liam tawh a, amaherawhchu, Group Leader i nihna angin, minute 5 ka pek belh ang che.

**Dr. R. LALTHANGLIANA** : Pu Deputy Speaker, ka zo hman ang. Hei hi ka ngai pawimawh khawp mai a. Sum indaih lo ti a kan MLA te leh Public Leader te, tu tute emaw khawn chawp sak ngai hliir maia kan ruahman hi a fel tawh lo in ka hria a. Chu chu ka sawi chipchiar hman lova, ka ngai pawimawh a, ka han tarlang lawk duh a ni.

Health chungchangah hian kan Chief Minister zahawm tak pawh a lo thleng leh tawh a, kan lo sawi nawk nawk a. Hmanni ah te pawh khan hei hi chu sawi nawn leh a ngaiin ka hria a. Kan Health Care Scheme hi nikum may thla bawr vel atang tawha kan beisei, a taka han hman ve kan duh a ni. Hei hi engemaw ti zawnga politics-a advantage ang zawng chuan helam pang chuan lak kan tum lo hrim hrim. Amaherawhchu, mirethei harsa te tana sorkar hi ding kan nih chuan, a harsatna kan puhrukna tur atan hian he scheme lo awm sa hi tlema a phuisui tawh lo deuh kan ti a nih pawhin siam thatna tur hun hi kan hmangral tam tawh tawhin ka hria a. Hei hi ngaih pawimawh a tulin ka hria, Pu Speaker.

Tin, chumi rualin kan bial lam han sawi loh theih loh ka neih chu, Lunglei Civil Hospital ah hian Cabin kan nei ve hlek lova, nikum lam pangah khan ka sawi tawh thin a, a buaithlak khawp mai a. Hei hi kan Minister zahawm takin min lo note sak sela ka duh khawp mai a. Tin, chumi rualin Nursing Station hi Lunglei ah kan nei lova, hei hi kan Lunglei Civil Hospital ina veng dang nena transformer kan intawm, kan han tih thin a hi kan enfel tawh em aw? Kan sawi thin a, hei hi power supply a chhiat chuan a buaithlak khawp mai, Hospital ah a bik takin tih ka'n tarlang leh duh a.

Tin, kan Aizawl Civil Hospital project, National Rural Health Mission (NRHM) atanga kan buatsaih vaibelchhe 54 niin ka hria a, ka chiang chiah lova. Kha kha engnge ni kan kalpui tum dan tak hi? Heta sorkar hmasa in a tum dan chuan kan Civil Hospital saw Pu Dy. Speaker, kan Doctor Quarter sawnglai bawr zawng zawngte saw khatiang ang atana hman tur tih bakah Police Thana te pawh. Anni saw hmun dangah sawn chhuah a, Aizawl kan hmun laili-a Civil Hospital saw a zim lutuk tawh tih ngaihtuahna sorkar hmasa khan a nei niin ka hria a. Chutih lai chuan chanchinbu ah te leh khawi khawi atangin emaw, sawlai kan Doctor ho awmna vel, thil danga hman tur anga a ram sahtlak tih ang chi te, boruak kan nei neuh neuh a, a pawh khawpin ka hria a. Heng mitin in kan mamawh tur awm chi, kan hmun tha lai te hi chu a nih dan tur ang hian kan hman chhoh hi a tha khawp mai. Chuvang chuan ennawn leh hi a pawimawh hlein ka hria a. Heng bak hi Aizawl ah Hospital laili leh hmun

tha kan nei dawn tawh chuang lo a ni. Pawi ka ti khawp mai a. Sum tam tak ruahmanna kan siam, a takin kan ti hlawhtling dawn lo niin ka hria a, ka'n tarlang duh a ni.

Demand No.44 naah hian Trade & Commerce ah - kan Minister hian engemaw ti zawng chuan hma a la chak viau dawnin ka hria a. Bangladesh ah te, khawi khawiah emaw a zuk kal in ka hria a. A bikin kan thlen chin hi hriat ka chak khawp mai a, Lunglei District mite sawn. Hei hi kan tih theih hun kan nghakhlel a ni, kan tih theih chuan vawiin ah hian a bikin kuthnathawk tam tak te kan inhnang fakna atana thil pawimawh tur chi a ni tih ka'n tarlang duh a. Chuvang chuan hemi kan Kawrpuichhuah laia kan thlen chin hi chianguang deuhin kan Minister zahawm tak hian min hriattir thei se, tih hi kan duh a ni.

A tawp berah chuan a khaikhawmna ang deuhin thil pakhat, sum hi a nih dan tur dika kan hman hi a pawimawh ka ti khawp mai. Centralised Sponsored Scheme tumna Department tam tak vawiin ah a bikin, Health Department te kan sawi mek lai hian thil hi uluk taka hman hi a pawimawh in ka hria a. Chumi rualin timely completion leh timely utilization fel tak nen kan kal theih hi ka duh khawp mai. Engemaw kam hnih/khat sawi tur pawh ka nei a, mahse ka sawi hman tawh lovang a. Tawite ka'n sawi duh a chu, thil hi a hun bithliah pangngaia tih chat chat chuan sorkar hi mumal takin kan kal thei ang, tih hi ka beisei a. Chuvang chaun vawiin niah a bik takin CSS tih loh hi chu inhnangfakna tak tak hi kan State sorkar eng Department enkawl tute tan pawh hian a awm hlei thei tawh lo a ni, tih hi kan hriat a thain ka hria a. Chuvang chuan hengah hian uluk taka kan kal chhoh hi a pawimawhin ka hria a, inthlahdah lova kan sum hmanna lamah pawh mumal tak a, awmze nei taka kan hman hi helam pang chuanin kan duh hle a ni tih kha ka'n tarlang a ni. Ka lawm e.

**DEPUTY SPEAKER** : Tunge hi han sawi leh ang le. Pu Lalduhawma i lo sawm ang. Ani pawh hi Group Leader a ni a, minute 15 kan pe ang a, pel lo sela a tha ang e.

**Pu LALDUHAWMA** : Pu Deputy Speaker, Taxation ah hian ka'n tan ang a. India ram pumpuiah Mizote tluka chhiah chawi nasa hi kan awm lo, direct-in chawi lo mah ila kan phur a rit ber a ni tih hrechiang em em tu Minister kan nei hi lawmawm ka ti a. Tunah hian Buhfai ah te, Chini ah te chhiah kan chawi lova, ama'rawhchu, Tel ah leh Dal ah hian kan chawi tlat mai a ni. Hei hi min exempt thei lawm ni? ka ti a ni. Min exempt pawhin mi ram aiin kan la lei to tho tho dawn a ni, a kal man te avang hian. Chuvangin heng item pahnih te hi mipui khawih deuh mai a ni a, exemption hi sorkarin ngaihtuah se ka duh hle mai.

Tin, Education ah kan lut ang a. Model piggery village Kawlkulh-II, Sairang ah khuan School Building a awm lova. Amaherawhchu, mipui khuan an khaw hminga zirtirtu hlawh la an awmin an hre tlat mai a, chu chu a dik



leh dik loh ka hre thei si lova, khawngaih takin hei hi min chhui chian sak se ka duh a. Tin, Champhai ah khian Co-ordinator, Inclusive Education, SSA hnuaiah lak a ni a. Hetah hian mi pathum in an dil a, heng zingah hian a qualified lo ber hi lak niin a lang a. Diltu dangte pawh hi vawiina kan hotu lawk tak tak ten an recommend vek tho an ni a. Qualified tak tak te an awm laia qualification nei chiah lo te lak kan tan leh mai hi chuan kan in chingfel leh chuangin ka ring lova. Hei hi lo enchian deuh nise, tih ka'n sawi duh bawk a.

Tin, Right of children to Free and Compulsory Education Act hi Government of India khan 2009 ah -a pass tawh a. Hei hi kan ram hian kan la hmang ve lo niin a lang a. Mizoram Education Act, 2003 section 25 ah khan hemi hmang ve tur hian notification chhuah a, tih tur a ni tih a ni a. Notification hi chhuah a la nilo niin a lang bawk a. India ram pumpuia hman tura an lo tih tawh a nih bawk avangin Free Compulsory Education hi kan introduce ve thei tawh lawm maw ni le? Engnge sum leh pai lamah te hian kan la harsa rih viau em? Engnge ni a awmzia hei hi ngaihtuah tan a tha ve tawh lo maw? tih ka sawi duh bawk a.

Tin, private leh Grant-in-Aid School ho engemaw zat kan neih te chungchangah hian Rules engemaw zat kan nei a. A dik chiah chuan kan Rules ho hi han thlir ilangin, a tha lo a ni, a nep a ni. A duangtu te chu tupawh ni rawh se, Rules pawh hi ang ka ti em em lo. Chuvangin heng zawng zawng hi kan Minister zahawm tak nen pawh kan sawi dun tawh a. Revise a hunin ka hria. Revise ila, privatization lamin kan kal tawh bawk a, Managing Committee kutah hian thuneihna tam ber hi i dah teh ang. Private School ah te hi chuan zirtirtu la tha rawh se, leave pe thei rawh se, ban thei rawh se, tichuan school a tha ngei ngei a ni. Chumi a nih loh chuan helam Education Department lam atanga an rawn khawihpui ve hian school hi a chhe ziah a ni. Tunah kan veng school te pawh khu kum 4 a ni tawh a, 100% kan la pass zar zar a ni. Thu kan nei tlem nachungin. Chuti chung chuan zirtirtu kan duh ang pawh kan la la thei lova, an duh ang zawng min rawn hnawn lui a ni. Hengah te hian school hi a that tur angin a tha thei miah lova, Rules hi siamthat a chakawm ka ti khawp mai a.

Tin, Education Department hi a pachhe hle niin an sawi a, envelope leina pawh an nei tawh lo, lehkha pawh an pe chhuak ngai tawh lo, a hmuna kal thei lo tan chuan. School tam tak hian lehkha thawn hi an dawng thei tawh mang lo an ti tlat a ni. Hengte hi kan hotute beng a thleng pha em, ka hre lo a, a dikna chin a awm niin ka hria a. Chuti em ema han pachhiat chu a dik thei dawn em ni? tih ka sawilang duh a.

Tin, Trade & Commerce ah hian a changtu Minister khanin a Demand zawng zawng kha a rawn byheart chhuak leh a. Nikum ah khan a ti tawh bawk a, ka thu chu nise pawisa hi pek belh tlak niin ka hria. Heti khawp maia mahni Demand hrechiang hi a lawmawm hranpa ve reng reng ka ti a.

Tin, a hrim hrim ah MLA te tan hian thil chiang lo a awm a. Entirnan – Trade & Commerce chan leh Industry chan te pawh hi a in kaltheh a. Zawhna hi zawt ila min chhang ve ve bawk si a. A eng hian nge chang zawk tih hi chiang lo subject engemaw zat a awm a. Tin, thildang te pawh ILP te pawh GAD ah han zawt ila min chhang tho a. Home ah zawt ila min chhang tho a. District Council chungchang pawh hi Home ah zawt ila min chhang tho a. LAD ah ti ila min chhang tho bawk a. Khatiang kha a nia, a Demand pawh a in kaltheh deuh a. Heng hi chinfel thain ka hria a, thu penhle deuh ka'n sawi a nih chu.

Tin, ka Starred Question No.56-na chhanna kha ka hmuh khan “E min chhang sual a ni a, a chiang lo a nih hi”, ka ti a, sawi pawh ka tum hranpa lem lova. Amaherawhchu, ka sawi ngai lovin a tih dikna an rawn pe leh thlap mai a. A lawmawm ka ti khawp mai.

Myanmar nena kan in sumdawna chungchangah hian Border Trade Agreement January, 21.1994-a Government India leh Myanmar-in an sighed kha kan la ring reng em aw? A thar deuh hlekin Zokhawthara kan hman tur atan te hian Agreement hranpa, State level emaw, Chamber of Commerce ah te emaw hian tih theih dan a awm em? A hlui bawk kha em ni kan la rin tih hi ka sawi duh bawk a. Tin, nikum Budget Session ah khan October thla ah khan zawhna chhanna ah khan, Minister zahawm tak hian Aieng leh Sawthing hi Bangladesh ah thawn theih tura peih a ni tawh a, a rate a la fello deuh chauh a ni, tih kha ziakin chhanna a pe a. Tichuan, an thawn theih dawn chu tih nak a laiin tun tum session ah hian Protocol of Mutual Co-operation an signed pui Bangladesh ami kha biak pawh kan be thei lo; lehkha pawh kan thawn thlang zo lo, Email pawh tih kha waviin nia kan chhanna hmuh chu a ni leh ta a. Kuthnathawktu te tan chuan a beidawn thlak hle dawn niin ka hria a. Hmanni ah te khan Bangladesh ah te khan an zin a ni si a, khang Agreement leh Mutual Co-operative te kha kan signed pui tawh bawk si a, Nitol-Niloy Group an tih nen khan an representative te an lo kal lo em ni? Kan be pawp thei lo a nih chuan engatinge kan aiawh te pawh kan tirh thlak mai loh, mipuiin kan nghahhlelh tawh laia a tawpa “Kan inbe thei lo, a tlang zo lo”, tih mai mai chi em ni? Hetiang hi a zuih ral dan tur niin ka hre lova. Hei hi ka ngai pawimawh a, ka'n sawilang duh bawk a.

Tin, Bamboo chip Industries pakua din mek a ni a. December, 2009 hmaa thawh tana peih theih tur a ni a. Bangladesh-a thawn turin custom te nen kan thlir mek a ni tih kha, nikum kan zawhna chhanna a ni a. Hei hian enge a thlen tawh? tih hi wind-up naah min hrilh thei seng ka duh a. Chop stick te pawh hi a hlawk hlein an sawi a, helam te hi kan hawi thei ve em? Tin, Sapthei leina tur hi ka sawi leh hram ang a. Industry chan zawk nge ka hre lova. A leina tur hi Budget ah kan dah ngai lova, Tuivawl bialtu zahawm tak kha a awm ta lova, ‘DAH’ kha a pawimawh ber a, ani khan min rawn ngaih pawimawh pui a, ka lawm khawp mai a. ‘DAH’ a nih loh avangin kan tuar rei lutuk tawh a. 2007-2008 ah khan Market Intervention Scheme atangin Government of India atangin pek a ni a, a tlachawp in, an mangang hman em em a. 2009-2010 ah hian Reviews Estimate atanga pek a ni leh a. Khatiang a

tlachawpa ngaihtuah chawp, nawrchawp ngai kha a tawh lo. A season ah chuan kar khat chhung an hralh theih loh chuan an chhe hman a ni. Chu chu tunah te hian kan veng tha tawh em? Provision fel tak neiin kan dah ve tawh em? tih hi ka zawt duh bawh a ni.

Tin, Health Department ah hian kan kai ang a. Health Care chungchang hi ka sawi duh a, a buai dan kha kan hria a. Kan Health Minister khan a wind up naah a history hi chiang takin min hrih se ka phut a ni. A sawi daw tan chho riau hian ka hre mai a, a zung hian a khup thleng hi a rawn zem ve ta mai em ni aw, ka ti a; ka ngaih hi a tha lo lek lek tawh a nia. Bajaj Alliance-a 10 crore an lo va dah kha thahnemngaihna avanga a interest uma lo va dah nge an nih a, a commission it-in tih te pawh min hrih chiang teh se. Tin, kha 10 crore kha mimal hminga dah a ni a, lo mature ta sela, an draw hunah khan midang, khawvelah hian draw theitu pakhat mah an awm lova, khami te lo kha chu. Khami te khan an va draw ang a, an mimal hminga an deposit a ni si a, ak hawng daih se, sorkar ah hian theh lut lo sela a theih a ni lawm ni? Kan sorkar sum tam tak kha mimal hian an ah hawn duh chuan khing mah ila kan khing hneh hauh dawn lo a nia. Khami chungchangah khan sorkar hian eng ngaihtuahna nge a hman? tih hi ka zawt duh bawh a.

Tin, SBI ah hian Rs.10 crore dang kha deposit niin a lang a. Tun tuma zawhna ah hian a interest hi 12 lakhs vel a tling tawh tih a ni a, a va tlem ve. 10 crore interest chu tunlaia a rate chu 6% vel niin ka hria a, a tlem ber ah 50 lakhs te chu nih ve tawh awm. Engtik atanga dah nge? Engnge a interest? Vawiin ah hian engzah nge tlingkhawm tawh? tih hi ka zawt duh bawh a. Tin, hetia kan lo va dah hi eng atana hman tur nge? Tuna a bill tang mek, 5 crore vel tang mek pek nan te hian draw chhuah a hman theih a ni mai lawm ni? Engatinge heti taka rei mipui hi kan nghah tir a, engmah ngaihtuah thei lova hetia kan awm reng? Chung atan te chuan a hman theih em? tih ka'n hre duh bawh a.

Tin, Reliance kha engzah chiah nge sorkar khan an lo pek reng reng? Chuta tang chuan damlo bill ah engzah chiah nge an pek a, pawisa pek bang, an kuta la awm, an pek tur hi a la awm em? Chu chu cheng engzah nge? Engatinge an pek tlak loh bill heti zat zat hi a la tan reng? Engvangin nge an pek tlak duh loh? Pe tla turin kan nawr thei lo em ni?

Tin, "An chan tur atanga 5% kha Department-in a cut sak" tiin sawi a ni a. 5% of Rs.29 crore chu a tam ve viau ang a. 'one crore something' vel a nih ka ring a. Khawiah nge kha sum kha tunah a awm? A nih dan takah chuan thil a fel vek hnu chuan a company hnena pek tur kha a ni. An rawn claim ang a, kan pe tur a ni tlat a ni. Mahse tunah hian rawn claim ta se pe dawn ta ila, pek tur a awm tawh lo, an hmang zo vek tawh, tih hi ka thu hriat a ni tlat. An hmang zo a nih chuan eng atan nge an hman? Tu thuin nge an hman? An la hmang lo a nih chuan khawiah nge? Tu in nge kawh? Engzahnge? tih hi ka hre duh. Zoram mipui hian an hre ngei tur a ni. Tin, a scheme thar hi engtikah nge a chhuah ang? Tunah kan pe tla thei lo a nih pawhin, Bank-a

kan deposit atang te hian kan pe tla thei lo a nih pawhin a scheme thar a lo awm hunah tal scheme hluia bill tang ho kha kan clear sak thei ang em ? Khangho khan an hmu lo kumkhua mai dawn em ni ? Scheme thar chuan an tan fun tel a nei ve em ? tih ka'n hre duh bawk a.

Tin, cancer patient fund hi tunhnaiah kan Minister zahawm tak hian a rawn ti chhuak a, MLA min han hrilh diat diat a, tiang hi a awm tih pawh kan lo hre ngai lova, a lawmawm khawp mai a. Mahse a tlem deuh a ni, Rs. 4500/- an dawng a chumi dawng tur chuan an vah ve tang tang a ngai a, income certificate tih vel zawng zawng kha thil tel a ngai ve bawk si a. Hei hi thil tha tak ani a, cancer hi khawvela a ber kan kaina ani a. Cheraw tih vel kan sawi a, khawvel a a ber kan kaina, cancer chi hrang sawm velah kan nei ani a, kan ber kai ve na ani miau va. Govt. of India ah hian hemi cancer patient fund hi kan sorkar hian a dil belh thei lawm maw ni le ? Rs. 10,000/- theuh tal a an in enkawl na tur hi, Mizoram hi a tam berna kan ni a kei chu a awm ka ti.

Tin, Pu Deputy Speaker, dil belh lo che a zawh hram kan tum anga, NRHM sum hi Aizawl Civil Hospital Upgrade na tur hi chanchinbu a kan lo hmuh dan chuan Rs. 54.23 crore vel ni a sawi ani a, Health Minister statement a a lan dan chuan. Mahse Under Secretary, North East Division New Delhi lehkha 25/11/2009 kan en chuan Rs. 16.50 chauh hi approved niin a lang a. Chuta tang chuan Rs. 10 crore chu 2007 ah an rawn released tawh a, chu lehkha ah chuan, "Statement of Account hi detail in rawn thehlut ula, ala bang Rs. 6.5 crore hi SPIP through in kan rawn release ang", an ti a ni a. Engatinge in puh nan kan hman kan hman le ? Rs. 6.5 crore hi la hmuh loh hrim hrim a ni si a. Khawiah nge a awm, "A bo", ti a in puh tawn vak vak mai leh a chhang let tu lahin keini pawh kan lu a hai khawp mai, khawnge a awm kan hre bik lo, han tih vel kual hi engemaw a tulna a awm le ? Anih na tak hi sawi ila tawh mai sela tih hi ka duhdan a ni.

Nichina MLA zahwm tak Pu Liantlinga'n a sawi te pawh kha mimal inchirh thehna ang a nilova, amaherawhchu, a diklo ti a hmana an sawi thin, han zawh chian dawna a result mumal tak chhanna a awm leh ngai si lo hi chu thil diklo kha kan lo in puh mai mai ang leh intihmingchhiat duhna anga ngaih theih a ni mai dawn e a tihna a ni a, a dik chiah a ni. Khatiang khan thil hi a kal ang tih ka hlau a, khangte pawh kha fiah taka min rawn hrilh theih chuan a lawmawm hle ang. Ka lawm e.

**PU T.T. ZOTHANSANGA :** Pu Deputy Speaker, ka lawm e. Vawiinah hian kan demand ho hi Chiang taka sawi a chakawm hle a. Mahse ka hma a miten a nilo lam deuh hlek kha an rawn sawi tel thin a. Vawiina kan sawiho hi a pawimawh hle hlawm a. School Education leh Medical hi pawimawh ka ti zual a. Tu department nge lian zawk tihte ka ngaihtuah a, Sikul department ka han sawi hmasa anga.

Tunlain lehkha zir kan uar ta hle a. Helai a thu te hi kum 30 hnuah chuan kan awm kim tawh dawn lo a. Chumi hnu a khawvel la rochun zel tur kan nau/kan fa/ kan tute hmakhua a tan chuan vawiin a kan thil sawi hian hma a sial dawn a ni. “Naupang chu a kalna awm kawngah zirtir ula, a puitlin hun pawhin a thlah lovang” tih a ni a. Vawiinniah hian kan Education system hi kan siamthat a pawimawh a. Kan hotute pawhin reform commission te an ti a, finchhuahna tur lam tak a awm ang.

Hei, nimin lawk khan matric result a chhuak a, School tam tak result ‘Nil’ a awm te kha a na ka ti hle a, chhinchhiah turah ka ngai a. Tin, zirtirtu hrim hrim pawh hi training tha ka ti a, Mizoramah hian mahni fate mahni ram school ah kan dah tha duh tawh lova, awmthei fa deuh tan. Tin, zirtirtu pawh kan inthlahdah deuh, zirtirtu fel leh vengva deuh ho hi chu a nghet lo an ni zel lehngal a. An ngheh deuh hnu hian an ngeng deuh emawni. Chubakah, transfer syndrome ah an awm ka ti mai a. Transfer hi an dil sup sup a, khatiang khawvelah tunah kan khawsa mek a. A harsa hle a, kan hotute tan pawh hian rorel hi a harsa awm mange ka ti a ni. SSA ang te pawh kan han ti a, zirtirtu training sa, thiam sa kha office ah kan khungkhawm ruih mai a, a thiam lo tlem tlem kan la thar leh mai a, heng hian kan education system hi a tichhia in kei chuan ka hria. Chuvang chuan lu let a kan ngaihtuah hi kei chuan ngaiin ka hria a ni.

Education hianin kan nun pumpui hi a cover tak tak a, engmah hi education tel lo hian a kim lo a ni. Chuvang chuan kan ngaihpawimawh hi a thain ka hria. Vanneihthlak deuhin Champhai ah kan leader chungah, kan Chief Minister chungah hian lawmthu han sawi ka duh a, Champhai Govt. College tan NLCPR ah 10.75 crore hmanni ah min han retain sak a, khangte kha lawmawm ka ti a, hmannah chuan ka sawi thawi tawh tho a, Nepoleana hneha a awm khanin “Wellington a i hneh lo a ni maw?” an ti a. Nepolean a chuan “E khai, Wellington a ka hneh lo a nilo, England-a Eton College khua ka hneh lo a ni” a ti a.

College hi a pawimawh a, kan duat pawh a ngai a. Group leader zahawm tak Pu Thangtea khanin UGC hman loh tihte, Higher ho rule la chinfel loh chungchang te pawh kha arawn sawi a, a tha ka ti khawp mai a. Amaherawhchu, kum sawm (10) zet an lo lal chhung khan an lo ti fel lo a, han tihfelna hman chu a awm awm si a, an harh tlai deuh mange te ka ti a.

Education chungchangah hian tumah han in puh mawh hman kan ni lova, kan fate, kan tute Education ah an hmakhua thatna tur hian theihtawp kan chhuah hi a thain ka hria.

Tin, Pu Chairman, OPD leh Mobile Unit Van chungchang hi kan sawi kan sawi mai a. Party anga kan inbeih lai hun te kha chu awm thin mahsela, tunah chuan engemaw chenah kan han chawl thawkhat tawh a, ka rilru ah thil pahnih/khat te chu a lo lut a, a pakhatna ah chuan – hma hi han la deuh rup rup ta ila “Ekhai phuba an la a ni maw, an chet dan rup rup chu, mitdel fei pek ang far far an ni” min tih te hi kan hlau ve a. Tin, kawng leh lamah

chuan anmahni thawhpuite nen hian an inmil chiah lo anga, rem leh rem lo hian anrawn phawrh anrawn phawrh emaw ni chu aw tihthe ka rilruah chuan a awm a ni.

A chhan chu zawhna helai a kan chhan chi loh leh ziaka kan han dah chi ang khanin helai pahnih hi a subject tam berte zinga mi a ni a. Chuvang chuan an thawhpui pa kan zingah awm ta lo, han sawi a rem chiah silova, khatiang tena mark chhe deuh a an han hmuh theihna tura sawi chhuak tur hian min nawr ni hian ka hre deuh a. A chhuitu te an awm a, an kut ah a awm e an tih tawh chuan ngaihtha takin awm ve mai sela a tha awm mange ka ti a.

Kan leader kha, a case fel chungchangah khan Tuipui 'E' bialtu zahawm tak khan ka lawmpui viau ani a ti a. Lawmpuina mak tak mai chu a lo ni, ka ti a. Keinin a kan lawm dan nen kha chuan a inang lo deuhin ka hria. Thil fello tam tak a awm a, hman atang khanin. Tunah hian sawi tur tam tak ka hria a, sawi hun a ni tawh silo. Hemi Sorkar ukil bik chungchangah kha chuan keipawh sorkar ukil ka lo ni ve thin tawh a, chuvang chuanin hemi Sorkar a inthlak ve tura ngaih tur a ni. Resignation kha an thehlut ve anga, Sorkarin an duh chuan "E, an la leh mai ang. Khatiang kha an tum lem lova, mifing var chin tawka kan lo ngaihte pawh hianin a ngaihna hi an lo hre lo thin emaw ni chu aw tiin ka ngaihtuah a ni.

Tin, ka'n sawi tel duh chu Health Education chungchangah khanin, doctor keini Champhai lam khan kan nei tha lo khawp mai a, Champhai nilovin, Mizoram as a whole angin a ni a, hmun hrang hrangah building te kan sa a, theihtawpin kan Health Minister chak takin hma a la chho zel a ni. Amaherawhchu, a building tha hmu hman lovin mi tam tak hi kan ti hman ang tih kan hlau ve a. Chuvang chuanin kan doctor thiam tak takte hi kan hmuh phak leh kan koh phakah awm ve sela kan duh khawp mai. Ka rilrua awm dan ve takah phei chuanin mi tam zawk hmangaihna hi a dai ve ta emaw ni le ? Thingtlang kan retheih ngaiin kan rethei reng a, damdawi kan mamawh ngaiin kan mamawh reng a, kan la hrisel lovin kan chak lo si a, kan bawrsawm em em reng mai si a. Doctor lah chu kan mamawh angin kan nei thei mai si lo a, chuvang chuan harsatna kan tawka, Champhai angah te chuan inzai dawn ila, hnimhlum pe tu a changin kan nei lo a, a changing a engemaw, post pawimawh bera kha a lo awm lo hman ve fo si a. Khatiang a nih avang khanin, engemaw tawng mawilo ni lo sela Aizawlah hian kan thi kan thi ve ta mai a khatiang te kha kan hotupa in min lo hriat sak se kan duh a. Tin, kan doctor unaute pawh doctor missionary hi a nih ve theih a ni tih kha ka'n sawi nawn leh duh a. Mi harsa te hmangaihna tak tak rilru leh thinlung an pu thei hram a nih chuan Zokhaw lam a kan unaute chhanchhuak turte, tidam turte, lo tawiawm tur te khanin inpekna sang lehzual han nei se tiin kan doctor unau te pawh kha ka rilru chuan a beisei a ni. Hospital building kan neih fel law law ah kanrawn pe ang che in tihna te chu a awm lo na a, kan building han sak lah hi a hun chhunga han sak zawh hi a eng a mah hi a awm ngai mang si lova. Chuvang chuan a theihna chin apiangah min hmanhmawh sak thei hram se, a mihring lam intuum damna lam khi ka han sawi tel duh bawka a ni.

Tin, kan Health Care chungchang hi an rawn sawi leh thin a. Hei pawh hi ka rilruah chuan a ti chhe te te a, “Rawn tuam dam rawh u”, an ti te hi a ang deuh riau in kan hria.

Vawiin ah hian sawi tur a tam khawp mai a. Labour & Employment te, Trade & Commerce chungchang te, Law & Judicial chungchangah te phei chuan Ukil thiam tak ve ve kha a head an nih avang khan ka ngaihtuah lo hrim hrim a, mahse tlemin ka rawn sawi tel ve zawk chauh a ni. Vawiina kan pass tur Department-ah hian mite hmangaihna tak tak thinlung hi kan neih a tul zual bik a, naupang lo la kal chho zel tur te hmakhua sialtu leh mipui mimir hriselna chungchanga mawhphurtu ber ber te an ni a. Mi rawn sawi chhياتna leh engemaw-a an rawn beihna ah thil dik lo leh dik pawh thliar hlei thei lova an awm hi a thiang ve lova, chuvang chuan an chhia leh tha hriatna thianghlim nana mipui tam Zoram kan lo survive chhoh zelna tura an hmalak chhoh naah hian huaisen hi an mamawh bik a ni. Tichuan, an Demand hi a tam lo bawk a, tin, a tha thei ang bera hmang chho turah pawh kan ngai ang a. Chu chu an Demand hi pass pui hi ka rawn rawt a ni. Ka lawm e.

**DEPUTY SPEAKER** : Sawi tur kan la awm em le, sawi tur kan awm tawh loh chuan, la awm maw, nakinah ziaka dah dan kan neih chiah lem loh, kan Member te tena kan hriat ve mai mai atana tha a ka hriat chu – Group Leader ten an rawn sawi tawh hi chuan a hnunung lampang deuh hlek hi an chang ve deuh thin a. A hma deuh khan sawi tum ta ula, Group Leader te hi chu kan han dah hnung ve deuh thin kha a ni a. Chuvangin ka rilru chuanin rawn wind up kha a tum deuh tawh a. Mahse a theih loh tihna ni chuang lovin, Pu S. Laldingliana i lo sawm ang.

**Pu S. LALDINGLIANA** : Pu Deputy Speaker, ka lawm e, ka sawi rei lovang. Demand No.24-na Health and Family Welfare-ah khan i veilama thute thenkhat khan, thawktute a nghet lova lak M.R. Contract basis-a lak tih kha an rawn sawi a, a dik a kha kha. Hei hi sum indaih lohna avangin Health Department-ah chauh pawh hian a ni lova, Department hrang hrangah sum indaih lohna avangin regular-a a thawktute lak theih a ni lo a ni tih kha chu kan hriat chian sa a ni a. Tin, chutiang a nih avang chuan kar hmasa lamah pawh khan Pu Deputy Speaker, a bik takin Tourism Department te pawh kha an ti tha hle a ni. An thawk tha hle a, revenue pawh an chhunglut tha hle a ni kan tih lai khan thawktu chu hmun li-a thena hmun thum kha M.R. an ni tih kha kan sawilan tawh kha. Chutiang tho chuan Health and Family Welfare-ah pawh hian a ni a, Community Health Centre kan tih angah te hian Doctor 6 awm tur an ni a, chumi piah lamah chuan Specialist te pawh awm tur an ni a. Tin, Nurse te pawh 10-12 lai an nih laiah khan, a tlangpuiin Doctor 4, Nurse 5-6 te kan dah thei chauh a ni.

Chutiang zel chuan Primary Health Centre-ah te pawh Doctor 1, Nurse 4 vel awm tur an nih lain, tunah hian PHC 7 ah hian Doctor kan dah

thei lova, tin, Nurse dah theih miah lohna te pawh kan la nei a ni. Chutianga sorkar ina sum harsatna a tawh lai si ah chuan Pu Deputy Speaker, mak ka tih deuh a chu kan Art and Culture changtu Minister zahawm tak khan tun Printing & Stationary Department-ah hian cheng nuai zahnih leh sawmsarih zet mai material lei tawh sa hmantlak si loh, chung 270 zingah chuan nuai 26 man chauh kha hmantlak a awm a ni, a bak zawng zawng kha chu paih mai a ngai a ni, tih kha a rawn sawi chhuak a. Hei hi a mak ka ti a, mipui sum heti zozai mai awmze nei lova tih chingpen hi a pawiin ka hria. Engtik hun lai ami nge ni a, tu hun lai ami nge ? tih hi hriat a chakawm in ka hria a ni.

Pu Deputy Speaker, Demand No.21 naah khan kan lut leh zawk ang a. Kan Education chungchang thua hian kan Minister zahawm tak thawhrimna hi lawmawm ka ti a. Kan education quality te siamthat ngai tam tak a awm tih hria in, tunah hian Education Reform Commission te an rawn din chho a, ngawrh takin he Commission hian a thawk a. Nakin lawkah chuan rah duhawm tak a chhuah turah kan ngai a. A bik takin Higher and Technical Education Directorate hi enchian deuh a ngai em aw ! ka ti a. Tunah hian sorkar College sawmhni kan nei a, Deficit College hi 2 kan nei mek a. Tunlaia kan kal chhoh danah hi chuan Conventional Education System kan tih hi chu awmzia a nei ta vak lo deuh a. Tin, sorkar pawh Technical Education lama hma la turin a inpuahchah chho mek a. National Institute of Technology te kan nei dawn a. Tin, Polytechnic te pawh a dang 4 kan neih belh dawn a ni a. Heng College 20 zet kan neih te hi kan downsize ngam lo a mi le ? 20 atang hian 16/15 ah te tla thla ta ila, a pawisa hi technical lam uarna atan Job Oriented Education ah hian divert ngam ta ila a tha lawm ni aw !, tih te kha ngaihtuahna ah chuan a awm a.

Tin, chubakah Pu Deputy Speaker, Higher & Technical Directorate chiri lutuk ta mai hi kan chingfel thei lawm maw le, tih hi ka sawi duh a ni. Hei, Director nghet kan nei lova, Joint Director nghet emaw, Deputy Director nghet kan nei lova. College hrang hrang ni sela, Principal nghet kan nei lova, Adhoc Appointees vek mai hi an ni a. Heng zawng zawng chingfel nan hian Higher & Technical Education Services te hi siam ve a hun tawh lawm ni ? Siam thei ila, tuna a incumbent kan neih ho hi option pe ta ila, a duh lut sela, a duh lo lut lo ta mai sela. Tiang chuan once for all a settle dan te hi a awm thei em aw, tih te kha rilruah chuan a awm deuh a.

Tin, chumi piah lamah UGC chungchang te pawh kan sawilang a. Hei, UGC Norms kan hmang a, hei hi thil tha tak mai a ni a. Amaherawhchu, kan hman dan leh tuna kan existing R.R. hi a in mil lo lai tam tak a awm a ni. Entirnan – Principal lak dan chungchangah te pawh Pu Deputy Speaker, kei pawh College-ah kum 27 zet ka awm ve a, engemaw chen hi ka hria a ni. Principal lak chungchang thua pawh hian kan buai reng mai a, a seniority ang leh R.R. anga lak mai tur a nih lai hian kan la thei si lova. College pakhata Principal a pension chuan a senior most a kha charge kan lak tir leh ringawt mai a, proper appointment kan pe thei bawk si lova. Heng UGC Norms hi 100% a kan hmang thei a nih chuan a lawmawm lutuk a, kan thei si lo a nih chuan kan R.R. a awmlai nen hian siamrem dan a awm thei lawm ni ? Chutianga



a nih loh chuan UGC Norms ah chuan, Principal la tur chuan a qualification ah M.A a ni tur a ni a, a tlem berah kum 10 College ah service a nei tur a ni a, Phd. Degree a nei tur a ni tih a nih lain, kan R.R. in a sawi chu he post hi 100% promotion post a ni a rawn ti leh kalh bawk si a, a inkalh tlat a ni. Hei hi siamrem dan awm thei sela, tih kha rilruah a awm deuh hlek a, ka'n sawi ve thuak thuak a ni.

Tin, Trade & Commerce Demand No.44 naah khan sawi tur a awm nual a. A bik takin hei kan hriat angin, he Department hi Department te reuh te a ni a. Mahse chutih lai chuan Revenue-a chhun luh te hi a tha ve viau reuh mai a. Kum 2009-2010 chhung khan market hrang hrang 13 zet sak a ni a, tin, check gate pawh Mizoram hmun li ah enkawl mek a ni. Heng check gate atangte leh market atang hian kum kalta ah khan nuai 60 zet mai revenue an chhung lut a. Tin, tun kum kal mekah hian nuai 75 an chhung lut a, kum lo awm leh tur 2010-2011 ah hian nuai 100 revenue chhunglut tura beisei an ni. Chutih lai si ah chuan he Department Budget hi a tlem em em mai a, 4 crore leh 69 lakh emaw chauh a ni ta a ni. Hetiang a nih avang hian Revenue earning Department te hi chu phuisui zawk hian sorkar hian thuam thei ta ila, nasa zawkin revenue te pawh hi an chhung lut thei ang tih ka rilruah a awm tel a. Chu chu ka'n sawi lang bawk a ni.

Tin, Health Department chungchang thuah khan kir leh ta ila. Health Care Scheme chungchang hi kan sawi a, kan inbat kan inbat ringawt mai a. Hei hi i sawi tawh lo hial teh ang u a, nakinah kan Minister zahawm takin a rawn wind up ang a, a chiang tawkin ka hria Pu Deputy Speaker. Thil dik lo, sorkar hmasa hunah khan thil tha tak anga lang, amaherawhchu, a pawisa hmin si lovin Plan Fund atangin khati zat kha pawisa pawt chhuakin mipui tana tha deuh angin an kalpui a. Mahse a tha lo a ni tih he sorkar thar lo piang hian a hriat chian si avangin huaisen takin a ti tawp a.

Tin, tunah hian Asian Development Bank atanga sum kan hmuh atang hian mipui tan a tha thei ang ber turin sorkarin a rawn kalpui mai dawn a ni. Chuvangin, inbauh inbauh kha a hun tawhin ka hre lo a ni. A awmzia zawkah chuan Department hian ram tana a thawhte pawh hi kan en ve a thain ka hria a. Kan House Leader zahawm tak hian a sawi thin a. District tin Hospital te hi kan upgrade a ngai, thihna tlak Hospital-a kan siam a ngai a ti a, chumi atan chuan kan Minister chak tak hian hma a la a. Kan hriat angin thildang kan sawi vak hman lovang a. Tunah hian hmalak chhoh mek neiin District hrang hrangah Lawngtlaiah te, Serchhipah te, Champhaiah te, Lungleiah te, Kolasibah te Ten-bedded AYUSH building sak chhoh a ni a. Tin, Eye Unit te pawh Aizawl ah sak fel a ni tawh a, Serchhip ah sak mek a ni a, Lunglei ah sak leh tur a ni a, tunah fund a lo thleng leh tep tawh a. Chutiang chuan a Department zawk ina tangkai taka mipui tana hma a lak chhohna te pawh hi enpui ila, hriatpui ve zawk ta ila. Tul lova inbauh inbauh hi sim tawh ila a thain ka hria a ni. Awle, khangte kha pu Deputy Speaker, ka ngaih pawimawh zual ka'n sawi theih te a ni. Ka lawm e.

**DEPUTY SPEAKER** : Sawi duh kan la awm em le ? A sawi theih loh ka tihna a nilo a nia. Nichin ah khan kan Opposition Group Leader kha kan phutchhuak lek lek tawh a. Tumah kha in ding mang si lova, ka tihna deuh a nia. Sawi duh kan la awm chuan sawi ila. Kan duh tawk mai dawn em ni, kan discussion ? Minister i sawm tawh mai ang aw. A nih leh kan sawihona kan duh tawk ang a. Tunah chuan kan Minister zahawm tak Pu Lalsawta, a Demand te rawn wind up a, pass rawn dil nghal turin i lo sawm ang.

**Pu LALSAWTA, MINISTER** : Pu Deputy Speaker, Member 12 in min sawipui a, ka Department min tuipei hle niin ka hria a, ka lawm khawp mai. An zavai hian han chhan pawh ka duh deuh a, a pawimawh hlawm em mai a. Tin, chubakah an hriat tur tam tak hi sawi ngai te pawh a awmin ka hria. A hmasa in Pu Deputy Speaker, vawiin ang hun hi Department mawhphurtu tan chuan hun tha a nih ve na laite a awm a. Tunah hian dar 3:30 p.m. a ni a, tlema hun ka lo la rei deuh a nih pawhin Member te pawhin min lo hriatthiam ka'n dil nghal duh baw k a.

Member ten sorkar kalphungah leh mipui kan enkawlina chungchangah te leh hma kan lak zelna turah te an rawn sawiin an ngaih pawimawh han chhan loh emaw, han 'react' miah loh hi a fel lo in ka hria a. Chuvang chuan ka sawi ang khan hun pawh ka la rei deuh a nih pawhin min hriatthiam ka ngai dawnin ka hria.

Kan Member zahawm tak Pu Rinawma khan Vairengte check gate pumpelha Serkhan lamah te kal theihna a awm a, tih chungchang a sawi kha Department-in kan hria a, an put ru thei a ni. Thawkkhat lai deuh phei kha chuan fertilizer te pawh an lo phur nual a, man te pawh kan han in man a, man kan neih hi chuan kan man loh tam tak an awm hi a rin theih tlat a; Chuvang chaun hei hi Department-in kan ngai pawimawh a. Amaherawhchu, thawktu lampangah kan in daih lo em em a, tunah hian kan ngaih pawimawhte zingah a tel a, kan lo chhinchhiahin kan lo enzui zel ang e.

Tin, Parliamentary Affairs chungchangah zirlaiten House-a rorel dan phung te, debate dan phungte 'Youth Parliament' an tih a an lo training ve chungchang a han sawi kha a pawimawh a. A chhan chu inhnial hrat lampang ringawt a ni lova, mi hi kan thusawi hmanga kan hnial lo a nih chuan kawng dang hi a vang tawh khawp mai a. Kan nungchang ang zawng te pawh han tih dawnin kan lo hmu reng bik lova, chuvang chuan Rhetoric te, Debate te hi a pawimawh em em a. Kan naupang te, zirlaite Youth Parliament hmanga engemaw chen train tur hian Parliamentary Affairs Department atang hian kum 2007 atang khan hma te pawh kan han la a. Ama'rawhchu, pawisa te hi a tlem tham a, kum 1 ah India ram pum pattern-in-grant min pek theih chin a hi keini ang State te ah hian nuai 3 chauh a ni a. Mahse, heti chung hian Mizoramah hian kan thiam ang ang hian kan han ti ve a, kan tangkai pui khawp mai. Tun kum tir pawh khan kan zu kal ve a. Ama'rawhchu, a hnu lawkah Lok Sabha Session te kan han thlir a, a tak takah hi chuan min zirtirtu te khuan keimahni Mizoram atang hian zir zawk se, a tul a nih hi mawle, kan ti a. Helaiia kan

Speaker zahawm tak hova ro kan rel dan hmang a hi Lok Sabha te, Rajya Sabha te pawh khuan rawn zir zawk se, a tul a nih hi mawle, te pawh kan ti fiam nual a. Chutiang khawp chuan Mizorama kan rorelna sang ber hi entawn tlak niin kan hria a. Kan naupang te, zirlai tena an College ah te pawh Youth Parliament an tih chhoh zelna tur atan hian hma kan thiam ang tawkin kan la, tih kha ka rawn sawi duh a.

Tin, Law Department ah hian Mizoram Judicial Service Officers engemaw zat kan la thar chho a, mithiam tak tak kan la a, an qualified tha a. Tin, kan lo sawi fo tawh thin angin anni ho hi mahni puala thu pawimawh tak tak ngaihtuah tur an nih avang hian, Department danga Officer te an pawimawh lo kan tihna ni lovin, an pawimawh leh zual bik hian kan hria a. Mi nun khua an chhiat vek theihna emaw, an dinchan theihna emaw thleng pawh a, an chungang roreltu an nihna ah hian vawiina kan lak ang hote hi chu mimal ang tak pawhin chhui tlak vek khawpa mithiam, mifel niin kan hria a. Heng kawnga hmalakna hi a tha kan ti a, a nihna takah chuan heng hi sorkar hmasa lo lak tawh te kha an ni a. Mitha tak tak an lo la a, keini pawn kan lak ve leh hun zelang chuan a hma ang bawkin mitha tak tak lak zel kan tum a ni, tih kha kan sawi chho duh bawk a. Tin, thingtlang khaw 12 ah, Village Court kan tih hmun khat zela nuai 18-a kan la buatsaih tur, tun atanga kum 3 kum 4 chhunga kan la tihpuitlin tur a hi a pawimawh khawp mai a. Zep thu a awm lova, tuna kan Village Council tena thu pawipang chungchanga an rorelna hi chu a tawk lo a ni. Mahse, Aizawl emaw, Lunglei emaw ringawt atanga rorel tur hian kan ram hi a zau ve a, keimahni tawk te ah. Chuvangin thingtlang amite, anmahni mamawh ang leh anmahni doorstep-a rorel saktu hi theih ang tawka tih hi kan han tum chho a. Gram Nayalayash an ti a, chu chu kan buatsaih chho ve mek a. Hei hi tunah chuan a bul kan tan dawn a ni chauh a, tun kum thar tur atang hian a hmun hmata kan han ti ang a. Hetiang atan pawh hian MJS Officer ang chi lak kha a ngai a, LLB an nih pawh a ngai dawn a, motor pawh an nei ve ang a. Circuit Court ang deuh hlek hian anmahni bial chhungah khan an zin a ngai a, Time Table te siamin thingtlang mite harsatna an thubuai, hlabuai ah an cheng vel thin dawn a ni.

Tin, Member zahawm tak Pu Zothangliana rawn sawi kha tawite han sawi chho leh ila. Geography Subject chungchang hi helai lovah kan pahnih pawn kan sawi tawh thin a, kan Member zahawm tak nen hian. Mahse, sum harsat hrim hrim bakah hian Education bik hi thil harsa tak hi a lo tam khawp mai a. Keimahni lampang a College emaw, a School emaw lampang pawh hi lo inpeih thin mah ilangin zirlai neih te an lo ngai a. Tin, zirlai neih hian pakhat nge kan neih dawn a 100 tih pawh hian thui lutukin a khawih vek zel a. Tin, Subject ang te kha chi hrang hrang Geography, Mathematics, Science, English, Mizo, khatiang khan thil tam tak a kawh avang hian hetia han ngaihtuah mai a; hetiang hi kan duh ve a ni, hetiang hi min han buatsaih rawh u, tih ang a hi a awl vak lo a ni, a thu leh hla hi. Harsa ang reng deuh mai, chutiang chu a nih avang chuan a policy ang deuh pawh hian kan Chief Minister ho hian kan lo sawi tawh a. Education Policy hi sorkar hmasa atang pawh khan a la nei thei lova, vawiin thleng pawh hian keini pawh hian kan la nei thei lova. Amaherawhchu, keini chuan Education policy atana thil awm thei tura kan duh

chu zirlaite hi an pawimawh ber phawt a, zirlaite tana rawng kan bawl sak theihna tur atan hian enge tha ber ang ? Tunah hian thingtlang pa tam tak kan Office ah te an lo kal a, Directorate lamah te an kal a, thahnemngai em emin an khua tana an theih ang tawk tawk leh an thiam ang tawk tawka an thawk chhuak han hmuh hian zirna kan hlut zia, Mizo faten kan hlut zia leh kan ngaihsan zia hi a lang thin a. Amaherawhchu, chungah chuan sorkar ber hian policy mumal leh hetiang hian kan kal dawn a ni tih tur a hi kan neih a ngai tlat mai a. Chutiang nei tur chuan mipui zawng zawng duhzawng emaw, a tam ber duhzawng ang emaw pawha kal mai hleih theih loh chang, a tha ber tur kan ngaihtuahna lamah hi chuan a ngai dawn tlat mai a. Chuvangin a hard decision hi kan la siam a ngai dawn a. Tuna Member zahawm tak Pu Zothangliana'n a han sawi ang chi pawh kha kan ti lo ang kan tihna lam ni lovin, han ngaihtuah maia Geography Subject sawlaia han dah mai ang chi a kha lo ti thei pawh ni ilangin, permanent solution, solution tak a hi a la tling pha chuang lo a ni, tih kha ka sawi tel duh a.

Tin, Headmaster chungchang, High School ah te, Middle School ah te harsatna kan nei nasa em em a. Helai hi han sawifiah dawn ila, hun a duh rei dawn a. A tawi zawnga sawiah chuan seniority-a kal a ngaih si avang leh a senior a te hian hlawh ngai deuh reng si a, thingtlang kila mikhual ni tura Headmaster han nih leh thin te hi an lo hreh ve bawk avang hian, (hreh tur awm tak pawh hi a ni ve reng a) he harsatna hi namen lovin kan tawk a, heng ang hi kan thiam ang ang chuan a Department atangin heti zawk hian her rem deuh ta ilangin tih ten kan han ti ve nawk nawk a. Tunhnai maiah pawh Headmaster, lungsi taka kal thei tur 20 vel chu kan han remruat ve thei hram a. Kan tih chhoh theih zel pawh kan beisei a.

Tin, remruatna dang deuh hlek, ngaihtuahna pawh hi a ngai dawn a ni awm e, tih hriatna kan nei a. A senior ang ang hi kan tih zel hi chuan an duh leh duh loh kan nghah chhung hi a rei a. Mahse, kha sikul ami kha lungsi tak, lawm taka Headmaster charge la thei tura kan han buatsaih hi chuan a tha a ni lawm maw le, ti te hian kan han sawi khawm a. Mahse, mihring hi kan lo mak ang reng khawp a, khatiang anga kan han tih pawh khan tunhma lama an experience ah chuan Headmaster an han ni te te a, khawilai khaw kilah emaw mi awm duh loh naah an awm te te a, Headmaster an nih tawhna, an aia senior te an lehpelh tawhna supersede tawh hnuah khan Aizawla transfer emaw an rawn dil leh a, hnial hleih theih tawh bik si loh. Khatiang complication tam tak kha kan Department ah hian a awm a ni.

Tin, Pu H. Zothangliana sawi bawk, chhiah petu tena anmahni remchanna ang zawng min zawn puina tur atana hma in han la hi a lawmawm a, a tih kha. Hei hi kan Party Manifesto a nih vanga thil ti kan ni a. A chhan chu a petu zawk aia a pek tura tena thu kan neih a, mi remchanna lampang ngaihtuah miah lova, Office lampang kan thu lutuk hian mipui lam tan dawr kan harsa niin kan hria a. Pawisa dawng tur zawk si, a Department te hi chuan remchang hi a theih ang chinah chuan kan ngaihtuah dawn lawm ni le, kan ti a. Amaherawhchu, Taxation Department ngawt a lo ni bik lova, Revenue ah te, Transport Department ah te, Forest Department ah te, PHE ah Tui bill te,

Electric chungchangah khatiang khan Power & Electricity Department te a lo nih zel avang khan, kan senior Minister Pu J.H. Rothuama hovin kan thukhawm a. Mipuite tana awlsam, remchang bawk si, tin, sorkar tan pawh chhiah lut tam zawk bawk sia ruahmanna hi chu kan thiam angin kan buatsaih ve mek a ni, tih kha ka sawi duh a ni.

Tin, Member zahawm tak Pu Lalthansanga'n a han sawi, High Court ah hmun thar kan nei a. Chu chu engtikah nge min tan sak dawn le, a ti a. A mah ang bawka nghakhlel kha kan ni a. Tunah hian sawlai hmun saw Raj Bhawan atana tih New Secretariat Complex-a awm Khatla ami a ni a. Sawlai saw High Court Bench hmuna han neih theih hi chuan remchanna tam tak a awm dawn a ni tih bakah, helai Aizawl D.C. bula Judicial Buildings te hi an sak tawhna sum kan sen tawh, anni'n min pe lehin sawlai ah sawn Court lampang kha awm thiango ta selangin tih te ngaihtuahna kan nei mek a. Tunah hian harsatna awm thei chu a bik takin, Law Department ah hian harsatna awm thei chu kan thil tih tam zawk hi High Court nena tih tlan ngai leh, an remtihna leh an pawmpuina ngai a nih thin avang hian Pu Deputy Speaker, tum ang hian a kal chak theih lova. Anmahni chu hmanhmawh ber berah chuan an tang tho nain, High Court hi mak ve deuh mai chu rorel thiam tak tak awmkhawm an ni chung hian Official side, Administration side ah hi chuan an lo chak lutuk lo, keini ai hian an muang leh tlat thin a. Chuvangin kan Member zahawm tak Pu Lalthansanga'n a rawn zawhna a hmanhmawh ang chiah khan kan hmanhmawh a. Saw laiah sawn High Court rorelna hi nei thei ila chuan chanchinbu mi lam te, thubuai nei tur te pawh a remchang bakah chanchinbu mi tak pawh thu thar lak tur tam tak awmna tur a ni dawn a, remchang hlein kan hria a.

Taxation Offices chungchang, mihring kan indaih loh chungchang min hriatpui kha lawmawm kan ti a. School building chhe lutuk chungchang hi zin pawh kan zin tha ngam mang lo a nia, a hminga mawhphurtu tan chuan. Mit ngeiin a hmu a, awih loh theih loh khawpa school building chhia han hmuh hian, mahse tih ngaihna a awm lova. Tunah hian RMSA an tih hian Secondary School lampang chu zawi zawi hian a building te pawh kan rawn ti chho thei zel dawn a. SSA hian engemaw chen chu Elementary ah Middle School leh Primary School chu an rawn ti chho thei tawh a. Helai ah hian ka sawi duh chu waviin ah hian mi tam tak chuan SSA han ti bik ila, RMSA hi chu kumin atangin kan tan dawn chauh a. SSA te ang hi pawisa siamna khur ang deuha ngai ve tawp mai, chutiang khatiangin lung kan phun duh a, SSA atang hian tihdan min ngaihtuah pui teh, ti tawk mai te; a then chuan lehkhahu chhuah ve ka duh a, nuai 3 vel SSA atang hian engtin emaw han ti mai teh, an ti a. Seki buhchhuak ang deuha ngaihna an nei a. He House zahawm taka ka sawi duh chu SSA te, RMSA te hi Education atan hian a pawp lai thawmtu, a chak lo lai ti chaktu, mamawh lai puhruktu a ni lek fang a ni, tih hi kan hriat chian a ngaiin ka hria a. A Department-a thawk zawkte pawhin an va it na hmun tur leh sawlai ram hmun nuam zawk leh hmun ropui zawk tur anga ngaihtuahna hrim hrim hi hrisel lo kan ti a. Chuvang chuan chaw kan mamawh ang chiah hian vitamin ang lek a ni SSA te, RMSA te hi, tih hi he House zahawm takah hian ka sawi duh a. Chuti lova a ber anga kan ngaih a, hemi buaipui tur ang

leh hemi a awm chak riau anga kan awm hi chuan, chutianga awm chak riau te chu awm tur atana kan duh loh tak mi a niang, tih hi kan hlau tan tawh a ni. Chulai te chu ka sawichiang duh a.

Tin, SSA term chungchang leh a hmaa a lo awm tawhte in ti tawp dawn niin hriatna kan lo nei a, te an ti a. Term nei na na na chu keini pawh MLA kan ni a, kan term a tawp chuan kan bang tawp mai a, kan ni vekin ka hria a. Term nei na na na chu term a tawp chuan kan bang mai a. Term min petu a khanin a extend kha chuan thuhran a ni a. Chutiang deuh hlek chuan kan kal turah kan ngai a, term nei an nih kha chuan an term ang khan an kal ang a. Amaherawhchu, anmahni tho kha an la tlin a, an rawn dil leh kha chuan a thiam hlei hlei te pawh an ni thei a, kan lak leh tur ngei ngeite pawh an ni tho ang a. Amaherawhchu, khawvel kalhmangah chuan term nei kha chuan an term a tawp chuan khami chen a kha a ni ve phawt mai turah kan ngai a. Mitha tak takte kha chu kan thlakhlelh ngawih ngawih kha chu, anmahni pawhin term nei an nih miau avangin an term a tawp a, hun tha zawkah te an kal duh a nih phei kha chuan chelh pawh tum ila, kan chelh thei bik chuang lova.

Tin, Selection Grade chungchang thu kha tunah hian thil harsa tak a awm ve na lai chu, Sixth Pay Commission awm vel avang te leh heng avangte hian an rawn hmanhmawh a, thenkhatin Office lam atang erawh chuan harsatna a siam ve rih si a. Heng hi chu muangchang deuha ngaihtuah zawk nise tia thu inthial te pawh a awm ve a. Engpawh nise, Department-in tih awma a ngaih leh tih awma a tih kan lo in nawrna ang ho hi chu kan tih loh hi a awmin ka hre lova. Kan lo muanpui hret a nih pawhin kan zirtirtute hian an hrethiam viau zel a. Harsa awmin ka hre lo helai Selection Grade chungchang a ni emaw, engemaw chungchangah hi chuan. A lo awm a nih leh kan Member zahawm tak khan tul a tih chuan nakinah pawh a point pawh rawn sawi leh mai selangin.

Tin, RMSA chungchangah chuan nichina kan sawi tawh ang khan High School te pawh kan sa dawn a. Tuna Adhoc kha engemaw zat lo dah chhoh a te pawh hi an duh ang em? tih High School te a lo awm ve ting tang si kha chuan, keini tehfung a criteria ah khan High School a awm chuan a theih loh tih te a lo nih si chuan, a awm ve ting tang khan sorkar a ti rit a, khawtlang a ti rit a. Mahse, RMSA atanga sak mai theih a nih kha chuan zirtirtu engemaw zat nena pe thei nghal tura hmalak theihna tur kha a ni nghal dawn a. Mahse, tun kum tharah hian 23 kan ti thei dawn chauh a, chutiang bek bek a ti chho tur kan nih chuan tunah min lehkha zir an duh tawh bawk si, zir tura an duh tawh bawk si karah khan kan innghak hlei thei love, mahni tih tihin kan lo ti ang e, an lo tih chuan an zalenna a ni a. Keini sawi phak a awm lovah ka ngai a.

Tin, Col. Z.S. Zuala, Member zahawm tak khan Separation of Judiciary chungchang a rawn sawi kha pawimawh ka ti a. Nichinah pawh khan a thu kha kan han sawi deuh laih laih bawk a, helai hi han sawina remchang pawh a ni a. Tun kan han sorkar ve tirh pawh khan kan hnenah mi thenkhat te, a veng angte pawhin an lo kal a. Separation of Judiciary chungchang hi Mizo

mipui hrim hrim tan hian kan lo la hmelhriat lo khawp mai a. Veng pakhata ka thiante ti mai ang, lo kal chuan kan inkhin naah Magistrate khan kan Ukil rawih thu a la duh tlat lo mai a. Kan Ukil rawih thu la tur hian min hrih sak rawh, an rawn ti a, a khirh khawp mai a. Magistrate chungchangah kha chuan engmah a ni'na Court lam rorel naah kha chuan an chhungkua rorel ang chiaha va zalen tur an nih kha kan la hre chiaha lova. Vawiin ah pawh hian hetia kan sawi hian he House Leader zahawm tak, kan Chief Minister Pu Hawla chungchang hi sawi a awm leh thin a. Tin, keini'na kan sawi loh pawn rawn sawi hi an awm leh bawk thin a. Han sawifiah ka duh chu, sorkar hi a inrawlh lo a ni, tih hi Chiang takin ka sawinawn leh duh a. Sorkar hi inrawlh dawn ta se chuan kan inrawlh duhna tur chu tihfel thuai thuai ai mahin, awm mai mai tir te pawh kan duh mai thei. Enge ni an rorel dan tur kha tuma hriat phak loh a ni a. A judge thinlunga awm tlat a nih avang khan tumahin heti zawngin tih rawh, ti thei lo kan nih avangin. Chuvangin sorkar tan hian judge hnenah engmah kan sawi ngam lo a ni. Amaherawhchu, Member dangte pawn an sawi tawh tho a, he House ah hian sawi theih ve na chen awmin ka hria a. Ka sawi ve tawh tho a nih avangin sawi tul ve niin ka hria a, term hmasa chhung kha chuan nichina kan Law Commission Chairman zahawm takin a sawi ang deuh khan, engemaw hun lai kha chuan Court ah hian sorkar kha inrawlhna chen an nei thin a. Aizawla Magistrate tha kan tih te pawh hlate khuaa han sawn deuh thut ang chi te pawh an awm a. Tin, hmanhmawh taka public procecutor han thlak rum rum te pawh a awm tih hi phat rual a ni lo a ni, mipuiin kan hmu a, kan hriat vek a ni. Chuvang chuan kan House Leader chungchang leh hmanni lawka Judgement chungchangah hian sorkar hi kan inrawlh lo, pakhat te mahin kan inrawlh lo, tih hi vawiin ah hian ka sawi Chiang duh a ni.

Tin, Customary Law chungchang a rawn sawi kha a dik a. Amaherawhchu, ziaak miah loh ringawt dan neih hi mi thenkhatin an duh loh avangin kan unau chakma te pawhin an codify fel thlap a. An hnama an Customary Law kha an hriat tlan leh consensus an neih theih dan kha an codify thlap a. Keini pawh hian kan hriat chian dan leh kan hriat pawh tlan theih hi chuan han codify-a ziaka han neih ve hi chu thatna chen chu a awm tho mai a. Engpawh nise, keini ah chuan sorkar hmasa lo hmalakna atangte pawhin Customary Law kan neih hi tunah print a ni a. Mizoram Upa Pawl te pawhin an ennawn leh mek a. Law Commission te pawhin an ennawn leh mek a, kan hnam dan a nih avanga ziaak loh ringawt hi chu a ni bik chuang lova, inhnialna te pawh thil awm thei a nih avangin.

Taxation chungchanga sipai lampang te CSD canteen exemption chungchang kha engemaw chen chu kan tih sak tawh a, sorkar hian. Amaherawhchu, Pu Deputy Speaker, kan hriat ngai chu thenkhat ten Tax an pek miah lova, thenkhat ten Tax an pek si, sumdawng tlang an ni a, a leitute mi thuhmun an nih si hi chuan fair competition kha a awm ve thei a. Sipai chauhin lei ta se, sipai te duhsakna lai a awm thei a, civil miten an lei chang ni lovin, civil miten hralh chhawn lehna tur te pawh an lei chhawng ve leh a. Chuvang chuan a man kha a intlawm hleih viau khan chuan fair competition a awm loh khan chuan a tha lovang tih ngaihtuahna chu a awm a. Chuti chung chuan Taxation Department chuan engemaw chen chu anni hi ngaihtuah sakna

kan nei a. Tun hrim hrimah hian Tax rate hi ennawn nuam kan ti lova, a chhan chu India ram pumpui ah VAT (Value Aided Tax) hi hemi thlak tur hian GST (Goods & Service Tax) Goods and Services Taxes hian inthlak nise, tiin. Tunkar lawk April ni 1 atanga tan tur kha a ni nghe nghe a, mahse kan tan hman dawn lova. Chutiang khawpa India rama thlak dur dur a nih lai a, Mizoram ah pawh VAT rate engemaw tia lo tih danglam a hi Cabinet tan pawh a harsa lutuk dawn a, kan ti a. Hei hi chu kan muangchan pui ve deuh hrim hrim a ni.

Education quality chungchang thu a, Col. Z.S. Zuala rawn sawi kha min rawn tawmpui ta meuh a, a lawmawm a. Tin, helai hi a rawn sawi chhuah takah chuan Member te tan pawh sawi tulin ka hria a. Recruitment of teacher chungchang hi SSA te emaw, RMSA te emaw a nih hi chuan nichina kan sawi tawh ang khan term reilo te te an ni a. Han in hriatthiamna te pawh nei mah ilangin, zirtirtu regular tur ang chi te pheih hi chu merit-a kan lo lak hi chu a pawimawh khawp mai. Nikum lawka police an lakna turah pawh khan Delhi ah kei ka awm lai tak a ni a. Kharagpur IIT atangin an tih tir daih a, anni khanin mithiam kha an la tawp ringawt mai a ni. Delhi police khu an in rawlh lo reng reng a, mithiam leh mitha kha an la tawp mai a. Hei hi kan la e, an ti a, appointment pe turin list a kha an pe tawp mai a ni. Chuvang chuan engtin nge kan kal zel dan tur a hi, keini ah chuan vawiin ah ka sawi mai thei lova, (Deputy Speaker : khawngaih takin lo ngawi lawk teh, hun pangngaiyah chuan kan ban a hun a, kan chhunzawm zel ang nge, kan chawl ang a, kan lut leh ang ? Awle, zo law law phawt mai sela) Mizoram pawh kan kal zelna turah hian Selection Board kan siam dawn nge ? MPSC hi kan ring dawn nge, mithiamte hian kan fate hi zirtir se kan ti a ni. Kan fate hi zirtir se kan ti a nih chuan, chutianga ngaihtuahna chu kan hman ngam a hun tawh a. Chutiang a nih loh chuan engemaw hun laia zirtirtu unqualified lak tur te pawh vawiin ah hian kan buaipui chho ta zel a. VRS kan ti a, structural adjustment loan hmangin Asean Development Bank atangin pawisa engemaw zat puk ila, anni hi an la pension mai dawn si lo a, mahse an zirtir hlei thei tawh bawk si lova. Naupangin an zirtirna an ei thei tawh lova, an zirtir hi buaithlak tawh a nih hi mawle, anni hi han senghawi a ngai a ni, tiin zirtirtu za rual senghawi tul naah hian pawisa nasa takin kan mamawh belh ta a. Chung lo chhuahna chu a recruitment hun laiah khan kan mithiam leh mitha neih a te kha lo recruit sela chuan, vawiin ah hian harsa kan nei lo tur kha a ni a.

Tin, Member zahawm tak Pu K. Liantlinga rawn sawi, Law chungchangah unfracture a tha tawk lo riau mai a tih leh, hemi ah hian hma in lak mek bakah hian a lak lehzual theih ang em, tih chungchang te a rawn sawi kha, tunah chuan kan ti chho tan ve riau zawkte pawhin kan hria a. A chhan chu kan Department hi Developing Department a ni ve lova, Law hi mi anga hma han la chiam chiam hlei thei kan ni lova. Tin, CSS kan lakah hian Department dangah 90% hi grant a ni a, 10% chauh hi Loan a nih lai hian keini chu 50% hi grant a ni a, a chanve dang 50% kha Loan a ni a. Chuvang chuan pawisa han theh chhuah tam pawh hi a huphurhawm a, Mizoram sorkar tan pawh hian duh ang thala tih theih loh harsatna bik nei kan nih hi a sawilan loh theih loh a.



Tin, Youth Parliament chungchang kha a rawn sawi a. Tuna kan sawi ang khan kum khatah nuai 3 chauh te kan neih avang khan kan duh ang chu a ni lova. Amaherawhchu, kan thiam angin hma kan la ve zel ang a. Tin, keini lo deuh avang pawhin a school activity hrim hrim atang pawhin kha pawisa kher lo zawng pawh khan activity hran leh anmahni ah khatiang zawng kha an lo tuipui chhohna ah hian heti zawnga hma han lak chhoh zel theih hi chu a nih ka ring a. Youth Parliament kan tih Legislature ah te debate leh han in hnial fiamna ang chi te leh rorelna kalphung han zirna kha kan sawi chhuak duh a.

Tin, PAD hian pawisa hi an nei tlem khawp mai a tih hi a dik a. Hei hi tunhma atanga lo kal dan phung a nih ve hrim hrim bakah han tihpun vak ngaihna hi a awm lova. Tin, kan mamawh pawh hian kan hna han thawhna chin saw a tam lem lova, hetah Legislative Assembly te nena thawk hova engemaw MDC pension ho te Regional Council pension ho te kan pek te leh heng House Session kan neih a, a tul ang ang han ngaihtuah leh sorkar Whips lampang han buaipui te hi a lo nih mai avang hian nuai 36 hi a tawk e, kan tihna lam ni lovin, kan lo nei tlem pawh hi kan in hmeh tawk ve ang reng tho a. Tichuan, kan Member zahawm tak Pu R.L. Pianmawia hi Deputy Govt. Chief Whip a ni a, ani hian helai ah hian Office te pawh a tuah ve a, theih chu nise pawisa hi tam zawk neiin tun ai hian hmalakna tur hi kan nei ve teuh mai a. Tin, khami in a kaihhnawih MLA te hi mi thenkhat chuan mitthi ral tur leh vui tur engemaw buaipui tura an ngaih ngawt lai hian a lo ni awzawng lo mai. House Committee hi a lo pawimawh em a ni tia rawn sawi chhuak ang chi kha a pawimawhin ka hria a. Engkim hi mi'na an hriatpui lem loh lai hian House Committee helai ah hian an thu tlut tlut a, chu chuan pawimawh tak tak sorkara official taka bawhzui ngai leh bawhzui thei chi kha an buaipui mup mup reng a. Chu chu PAD Parliamentary Affairs Department lam pawhin kan hriatpui ve chin a ni a. Tin, Member Pu K. Liantlinga rawn sawi te zing ami Rationalization chungchang school te leh teachers chungchang a rawn sawi hi he House hian min hriatpui tha ka ti a. A sawi bakah pawh han sawi belh ka duh chu kan Rationalise-a school te hi 'kan khawper thenkhat ten High School an nei a, engatinge kan neih ve lovang' tih ang hlir zawnga kan rilru kal hian School Education Department ah hian harsatna nasa tak a thlen a.

Thakthingah sawn tunhma khan naupang 3 an awm a, zirtirtu 6 an awm a. Naupang 1 zirtirtu 2 zelin an chang an tifiem thin a, kum  $\frac{3}{4}$  kal tawh ah khan. Thenkhatah chuan naupang leh zirtirtu inzath chiah te pawh an awm a. Ka han sawr chhuah chhan chu a ve hrim hrim laiah hian khua/veng tam tak kan buai a. Mahse school aia thil dang an lohna a nei a. Dawhkan ang deuh, te reuh te pawh siam dawn ila, ke 4 a neih a ngai tho ang hian school ah hi chuan a tlem berah 3 zel an awm a ngai a. Naupang 1 pawh nise 2 an awm a ngai tho a. Chutiang a nih avang chuan kan ram tan tha ber tur kan neih ang ang daihzai lai hmang tangkai thei tur chuian Rationalisation kan tih a la ngai dawn a ni.

Tin, Higher & Technical Education lamah hian Budget a tlem lutuk tih kha a dik a. Mahse kan Budget hi kan thlir kan thlir ve thin a.

Nikum ami kan pha lo a ni, kan tih lai hian Plan size lai chauhah hian kan phak lo a ni. Plan chungchang hi chu he House ah hian vawi duailo kan sawi tawh a. Plan hi nikum size-in kan han ti hrih phawt a, nakinah chuan Plan size hi a rawn lian leh dawn a. Chutah chuan Department te an mamawh angin kan rawn pek belh dawn che u a nia. Tunah chuan session pangngaiin kal phawt se, kan sawi kha chuan Plan ah hian a rawn pek belh hi chuan kan pawisa mamawh tuna a tlem a ni, tia kan sawi hi chuti vak chuan a ni dawn lovang tih ka ring a.

Amaherawhchu, Department a mawhphurtu ni bera han sawi loh theih loh chu Education chu tun ai hi chuan kan thanlen chhoh zel chu a ngai a. Un-employed graduate emaw, master degree nei emaw an tam viau lampang ang hi kan ram hian tlin tawhin ka hre lova, naupangin an zirna, an thiamna an neih ang chin zawng zawngte hi eizawn nana an hman theih a, un-employment hi O' Level deuh thawa kan dah theih loh hi chuan ram hi a buai chauh ni lovin, chhungkaw tam tak an buai tlat a. Chuvang chuan Higher & Education technical ah hi chuan pawisa hi chu kan la mamawh belh zel dawn a.

Amaherawhchu, wawiina kan Budget-a lang ve miah lo UGC lampang atanga direct-a an lo pek ve thin, he Budget bua in thai lut miah lo a hi a awm ve teuh a ni tih kha Member zahawm tak ten min lo hriat sak ngaiin ka hria a. Nuai 60, 70 nuai 100 te, tiang kha College tam takah hian direct-in, direct funding hi V/C hian a lo pe ve a ni tih kha min hriat sak turin kan ngen duh che u a.

Scholarship Centralisation chungchang kha an han sawi nual a, Member zahawm tak Pu Ramhluna pawh khan a rawn sawi tho bawk a. Scheme hrim hrim a hi tha niin ka hria a, a fuh lo zawk lo maw; hei hi chu tuna kan kal dan pangngai hi ni zawk mai se, tih te pawh khan ngaihdan a rawn sawi a. Amaherawhchu, keini kalkhawm ve chuan hei hi tha kan ti a ni. Centralisation loh avanga problem harsa tam tak kan neih hi kan pumpelh thei dawnah kan ngai a. Tin, Pu Ramhluna, Member zahawm takina a sawi kha han pakai chho nghal law law mai ilangin, Director te hela Secretary leh Joint Director tena thil engemaw ti a, hei hi a kalhmang em maw chu, keini ah chuan kan ngaihdan a lo ni miah lo a. Hei hi nikum December ni 2-a Cabinet ina a lo rem tih tawh, a hma daih a CRP Congress Legislature Party pawhina kan lo ngaihtuahna, rem kan lo tih tawh a ni a, a principle pawhin. Amaherawhchu, keimahni zawk Department a hi kan muang a, zep thu a cheng lo a, kan muang a, kan lo che muang deuh hlek a. Kan Chief Minister zahawm tak hian hetiang hian han ti ta ula a tha ang em ? tiin instruction te a lo pe a, chu chu kan kal dan tur chu a ni mei reng lah tak a. Amaherawhchu, khami ah khan engkim kha a famkim lo a, famkima ti chho tur chuan tunah hian Centralisation tur chua Autonomous Body-in nge kan dah ang a, Member te hi khawi khawi eminent person te emaw prominent person emaw pawh te pawh kan la be khawm ang nge ? Enge ni, tih lai hi tunah hian Department hian kan exam mek chauh zawk a ni. Engemaw tia Department chhunga harsa leh keimahni pawh lungrual tawk lo leh ti teuh tuk anga kal lek leka hriat theih anga House a lo ri chhuak kha mak ka ti a, pawh pawh ka ti a. Khatiang zawng khan vawikhat te meh hi ka la hre

miah lo a, a titu ber Joint Director khan a ti mawp mawp a. Hetia kan tih hi chuan State sorkar-a Plan pawisa kan hman piah lamah pawh hian khu lama direct-a han lak theih tur te pawh hi a awm dawn a ni a. Hei, kan thil tih hi a tha dawn khawp mai tih hi a rawn report a. Secretary te nen pawh hei hi chu kan Parliamentary Secretary te nen pawh kan lo sawiho a, kan lo hlimpui viau a, thu harsa awm hi kan neih reng reng kan hre lova, kan Chief Minister lahin tha min tihpui em em a. Chutiang a nih laia kan rinloh lam zawng deuh hleka thil awm palh kha pawl ka ti a, chutiang zawng tur chuan keini chuan kan ngai lo. Thil tha tak niin kan hria a, kan ti dawn chauh a, a ruangam kan buatsaih mek chauh niin kan hria.

Tin, Pu K. Liantlinga sawi bawk, Republic Middle School chungchang thu kha nuai 5 leh singruk sangriat leh zaruk leh sawmnga zet hi chu khulai khuan seng turin an lo ti a. Amaherawhchu, a hmun hma khua a remlo em mai a, chuvangin an duh ang hi chuan an ti thei lo a ni awm mang e, tih hi information kan neih dan a ni a. Engpawh nise, thahnem ngaia mahni bialte chungchang rawn sawi tawh a nih ang hian helai hi chu ka lo enzui ang a, thil fello emaw thil a nih tur ang a nilo emaw, azik tluak zo lo deuh hlek a nih chuan a tul anga pawisa pek belh hreta fel thei mai tur te a nih phei chuan, chung ang tur chu tih ngai niin ka hria a. Ka lo enzui ang, tih kha House ah information kan pe duh nghal a.

Tin, chhiah pek chungchang Member zahawm tak Pu K. Liantlinga'n a rawn sawi a, remchang buatsaihna piahlahmah pawh tun aia tam daih hi kan la la thei lo maw, a tih kha hmanni Consultative Committee ah pawh khan kan sawi tawh a, a dik chiah a. Additional resources mobilization kan tih ARM kan tih ang chi zawnga ngaihtuahna hmang tak mai ina khatiang a rawn sawi kha lawmawm ka ti a. A chhan chu Finance Department lampang atangin keimahni'n kan ngaihtuahna hmang lo mah ila, sorkar hrim hrim tan hi chuan sum kan mamawh belh danah, kan lakluh belh theih danah mipui lampang tirit chung chuang silo a, phur taka rawn pek theih a, anmahni zawk a pe tur te tih hausak a, NLUP a ni emaw, scheme dang dang hmanga anmahni ti hausak a, NLUP emaw phur taka sum sorkara an rawn chhun luh a, State sorkar hausa tak nih ve theih dan kawngte hi chu a awmin kan hria a ni. Chuvang chuan heng hi kan la hmabak, kan la ngaihtuah chhoh zel tur a ni a. Mahse income tax kher kher ah kha chuan kan ngaihdan a in ang lo a ni mai thei a, income tax hi thatna tam tak a awm a, corruption te pawh engemaw chen chu income tax zarah hian chin fel theihna lai pawh a awm mai thei a. Sikkim ah te, Nagaland ah te khuan income tax ho hian Office hi an dil deuh dak dak thin a, biak bak eitur an hmu ngai lo an ti mai a hi an tlangtla lo khawp a ni. Cartoon pakhat ka hmuh chu Pu Deputy Speaker, America ramah khuan IRS an ti a, a bag ah khan IRS tih kha a tar va mai a; lumeh naah khan a lu met zo han chhuak kha helaia lo thu ho khan an nuih a ni. A chhan chu a lu meh kha a chhe ve lutuk a, IRS chhiah khawntu a nih avang khan lumettu thleng pawh khan an haw fai vek tawh a. Anmahni theih tawh khan a chungah phuba an lo la ve a, amah khan engmah sawi thei bik hek lo, lumettu te pawhin a meh chhiat lutuk lamah an lo tan ve zel tawhna lai kha a awm a. Chutiang deuh hlek chuan income tax chungchangah hian waviin ah hian Political Party zawng

zawng te, NGO te thlenga Kohhran te nen pawh tih ngaihndan fumfe tak pawn census kan nei a nih loh chuan keini sorkar ah hi chuan income tax hi ti ve tawh mai ang, tih hi chu a la harsa deuhin ka hria. Kan Member zahawm tak Pu Duhawma'n a rawn sawi ang khan income tax pe lo mah ila, chhiah hi chu kan pe tam a ni. Chuvang chuan tlem anga kan in ngaih avanga tute corrupt pawh hi a theih a ni mai alawm, a hmaah a lo inhung miao a, tih ve mai tur a niang chu ti lova, hei chu thawhkhawm a ni, kei pawh a thawhtu ka ni, kan tihna key atanga thikthu chhe zawka kan ngaihtuahna hrim hrim hi chu kal a tulin ka hria a. Tin, Pu Deputy Speaker, kan Member zahawm tak Pu C. Ramhluna'n HTF Budget hi a tlem ta viau mai, a tih kha nichin khan ka rawn sawi nual tawh a, khami bak kha han sawi ngaihna vak ka hre chuang lova. Tin, Scholarship Board chungchang pawh khatiang kha a ni a.

Grant-in-Aid chungchanga sorkar sikul lo te kan enkawl dan tur chungchang rawn sawi pawh kha a sawi thui vak lo nain, ngaihtuahna hi chu kan lo hmang ve tawh a. Tunah hian sorkar sikul lova tanpuina kan pek theih dan hi deficit-in kan pe thei a. Adhoc kan ti a, chu chu an hlawhpui leh half allowance a ni a, chubakah chuan lumpsum kan ti bawh a. Khami chi thum teh duah nilo khan chi khat hian pek te pawh hi ni ta mai lela, tanpuina zawk a hi a hlawh tur zawng pawh ni lovin, sikul khan naupang an neih tam dan a zir te pawhin scale hrang hrangte awm ta se, tih te pawh ngaihtuahna ah a awm a.

Tin, Pu Deputy Speaker, vawiina kan sawi tam takah hian kan sawi final theih loh nachhan a awm a. Chu chu Education Reforms Commission kan din a, lungsi takin kan din a, anni pawn rim takin hna an thawk a. Tun March ni 31 hma ngeia thehluh an in beisei laiin, May ni 31 thleng hian min extend sak leh ru, an ti a. Chu mite recommendation chu kan nghah hrih avangin, anni hian policy lian pui pui te, thil thlak danglam tur tam tak te pawh an rawn rawt thei ang a, tih ngaihtuahna vangin keini lam hi kan la insumkar ve hram hram a ni. Chuti chung chuan tih loh theih loh engemaw a awm thin a ni chauh zawk a, chutih lohah chuan Education Reforms Commission hi kan ngaichang viau a ni tih kha min lo hriat sak ka duh a.

Tin, saw lampang deuhah chuan Hindi Teachers kan la dawn a, Hindi B.A. kher lo deuh te pawh hi a theih lawm maw ni le ? tih kha vawin hi chhan a remchang niin ka hria a. Tuna Hindi Teachers kan lak tur hi Middle School Hindi Teachers leh High School Hindi Teachers a ni a. Primary an nih loh avang hian anmahni a matric an tih leh class-XII an tih ang chi kha R.R. ang hian an qualify pha lova. Tin, mi 500 chawl ta te leh, 687 High Court ah pawha sorkar khing tute pawh kha, khangte nen pawh khan ngaihfin miah lo tur a nih nachhan chu an nilo reng reng kha, Primary Hindi Teachers an ni. Vawiina kan lak tur a hi chu Middle School leh High School Hindi Teachers an nih avang khan an qualification te pawh a lo danglam ve hret a, khalai te kha a danglamna a ni a. Chuvangin saw lamah pawh khan an bial te lamah kan Member zahawm tak Pu Ramhluna bial te lam pawh kha ni dawn selangin, Middle School emaw High School emaw a nih dawn kha chuan, helai atang anga kan qualification kha chu an fulfil ve a ngai dawn tih kha min lo hriat sak se a tha awm e.

**Pu C. RAMHLUNA** : M.E. School atan khan Hindi B.A. kha a ni mai em ?

**Pu LALSAWTA, MINISTER** : Aw, Hindi B.A. ni e, general line-ah matric emaw kha a ngai ve a.

Tichuan, Member zahawm tak Pu B. Lalthlengliana rawn sawichhuah thenkhat, Separation of Judiciary kha chu tikhan kan tawm liai liai a, kan sawifel tawh viauin ka ngai a. Amaherawhchu, hei hi chu he House zahawm takah hian sawi nawn sawi nawn ngaia ka hriat chu, Court ah hi chuan kan inrawlh lo mai chang ni lovin, a nihna tak takah chuan kan Magistrate te leh kan Judge te anmahni chungchangah hian thu kan neih hi a tlem khawp a ni. High Court deuh vek hi a ni tawh a, proposal te pheih zawng kan siam ve theuh a. Tin, kan proposal hi a tlang vek chuang bik lo a ni tih pawh kha Member zahawm tak ten min hriat sak a ngai a. Tin, Tlabung chungchangah chutiang khatiing chuan a tawp ta mai a, kha judgement ah khan an aggrieved a nih khan chuan hmun dangah thenawmte hnenah sawi sawi pawh a sawt lo, mipuite hnenah sawi sawi pawh a sawt lo. court-a kan lungawi loh chuan court sang zawka kal kha a kawng awm chhun kha a ni ringawt mai a ni.

Tin, Member zahawm tak Pu Nirupam Chakma ina a rawn sawi Fast Track Court chungchangte leh tuna Separation of Judiciary chungchang te nena han sawiah khan Fast Track Court hi Mizoram ah pawh kan thiam ang tawk tawk leh kan tlin ang chuan kan han nei chho ve zel a. Kan Magistrate te, kan Judge te pawh an ti tha hlein kan hria a. India ramah hian keini aia ti tha bik hi an awm dawn emaw ni le, te pawh hi kan ti ve a ni. Tin, nichinah pawh kan sawi tawh ang khan Gram Nyayalayas an tih ho, nuai 18 emaw a bul kan han tan ve tur MJS Officer ah LLB ngei mai thingtlanga court aiin han bun sak tur a te kha, khang chungchangte kha kan Member zahawm takin a rawn sawi te kha, kan sawi tawh atang khan lo hrethiam mai turah ka beisei a. Tin, kan dan neih te compilation hi volume-IV thlengin kan zo tawh a, volume sawm velah hi chuan kan zawh theih kan ring a. Tin, kan zo thei a nih pawhin a chawp leh chilh hian hmanni ah pawh a Private Resolution-a kan sawi ang deuh hlek khan dan hi a tam em em a. Rules, Regulation leh Act, khang kha a nih reng avang khan volume sawmah kan zo ang han tih mai theih pawh a ni lova. Engpawh nise, Department hian kan thiam ang chuan hma kan han la chho ve a.

Tin, Parva School chungchang a sawi kha a dikna lai a awm a. Mahse keini lamin kan hriat danah chuan defunct angah hian kan ngai tawh a ni, sawlai School saw an tin vek tawh niin kan hria a. A kal dawn pawhin kan Member zahawm tak khan office ah min rawn tlawh a. "Hei ka kal dawn a, han zawt chhin teh, enge an chhanna che", a ti a. Saw lamah phone ten kan va zawt chhin a, kan sawi tawh ang khan amah ber a kal dawn avang khan an lo in ralring ve a, chutiang deuh mai chu a ni a. Nichina rationalisation kan sawi ang deuh khan tling lo tur pui leh that pui chuang lo tur School neih ve hrim hrim ang zawngah a awm ang kha a nih palh pheih chuan kan tih tawp ngam te pawh a ngai dawn a. Mahse a bialtuin ti tawp love, hetiang hian in tan tak tak

ang aw, tih ngaihdan tha takte a siam chuan, vung takin kan la chho leh mai turah ka ngai a. Amaherawhchu, kan ngaihtuah ngai fo erawh chu, tumah hian India ramah State hausa ber pawh nise, an duh ang thal hi chuan pawisa an nei bik chuang lova, kan neih ang ang hi a remchang zawk leh a tha zawka kan hman hi a ngai tlat a. Chumi atan chuan Parva chungchang kha tih tlak loh tur, nei ve hrim hrim tur, teacher hlawh an lak ve hrim hrimna tur ang, naupang pawh nei ngai mang lo te an nih phei chuan kan ngaihtuahna thar kan hman a ngai dawn a. (Pu Nirupam Chakma : School awm dan khu Headmaster hmun dangah an attached a, zirtirtu hmun dangah an attached a, L.D.C. te pawh hmun dangah an attached a, tin, Craft Teacher hmun dangah an attached a. Khatiang School ah naupang chu an awm thei lo a ni) Kan lo enfel ang a, Department-in kan ngaihthah lutuk te pawh a awm thei a, tin, ngaihthah loh theih loh te pawh a awm thei a. Tin, tun result ah Lawngtlai tih chungchang kha, Lawngtlai District an tihna niawmin MBSE lam chuan an sawi a. District tih a kha an ziak lova, Kamalanagar tih a address ah kan ziak kha a bialtu Minister khanin an phut a. Tin, kha School tan leh khaw tan pawh khan a khaw hming han tih lan ngei kha chu a awm a, hei hi a District hming anga top 10 ah a lang ve tamiah lo, khatiang ani zara lo lang thei an nih pawh khan District lam pawh kha an lo tang ve viau pawh a ni mai thei bawk a. A enga pawh chu lo ni selangin, tih sual a nih chuan rectification chu a ngai ang a. Tun hnu zelah pawh kha sikul awmna khua ah khan kan dah zel tawh turah kan ngai a. A tul angin correction pawh kan lo siam ang e.

Tin, kan Member zahawm tak Dr. R. Lalthangliana khan a rawn sawi tawh a. Tin, vawiin ang hi sawina hun remchang tak a niin ka hria a. Higher & Technical Education budget a hniam deuh han tih angte pawh Member ten thahnem ngai tak maia hetia kan sawi khawm azara a tam theih beiseia an rawn sawi niin ka hria a, ka lawm tak zet a. Tin, chubakah pawisa indaih lohna thenkhata field trip an neih ang chi, a thenah phei chuan Industrial trip te kan ti a. Khang ang chi ah khan thil hian kawng hmang a nei a. Hei hi min lo pawm sak ka duh a. Tin, kan zirlaite ngei pawhin min pawm sak se kan duh a. Heng hi excursion a ni lova, excursion-ah hi chuan a college pumpui ami angte kha an kal a, inthik theih pawh a ni a. Mahse, field trip ang chi te emaw, anmahni zirlai bik ina an subject mila khawi emaw factory emaw, khawi industry hmun pawimawh takte emaw an thawh dawn a nih kha chuan; chumi ten nuai 5 nei si a, keini'n nuai 2 ringawt hi chu a tawk lo tih ang chi kha a ni miah lo. Hetiang ang chi ah hi chuan anmahni mamawh tawk awm, a Department-in uluk taka a ngaihtuah a, a pek angah hian lungawi thiam selang chuan a tha ber zawk a. Khawi college in emaw chuti zat an hmu si, keini Polytechnic ve tho kan ni a, chuti zat kan hmu silo tih ang zawnga in teh chi a ni lova. An zirlai subject ah khan Guwahati-a kal ngai, Mumbai-a kal ngai, khatiang a nih kha chuan, chutah pawh chuan khami class a te kha automobile lam a nih kha chuan beauty culture kher kha kal tulna pawh a awm chuang lo a ni. Khalai kha kan fiah hi a ngai tlat a. Chuvangin pawng inthik a, Politechnic theuh theuh emaw, College theuh theuh emaw tih mai chi a nih lohna lai kha a awm a, sawilan a remchang em avangin kan sawi duh a.

Tin, Higher & Technical Education Department hi a service matter hrim hrim pawh hi a buai a, tih kha thudik tak a ni a, a buaina hi 2008 December, ni 11 atanga intan a ni lova, a rei tawh mai a, sorkar hmasa hun lai fe atang tawh pawh khan hetiang hi an lo khawih ve reng tawh mai a. Tuna hetiang awm reng hi a tha lo kan ti a, a Department hian uluk takin kan examine a, chung chu chinfel kan tum a. Mahse, tihhnawk kan tihte zingah hian tel chiah lo mahse mi career te a khawih thui em em avang hian ngaihtuah uluk ngai tam tak mai a awm a, kan duh loh zawng deuh ten mi tam takte kan khawih palh ang tihte kan hlau a. Tin, Law Court ah te kan inkhing vak ang tih kan hlau a, Law Court ah te kan inkhing vak ang tih kan hlau a. Engpawh nise, Principal 22 emaw kan neih zingah hian Saiha Principal chiah saw Principal Substantive-a chelh a awm a, Pu Zohupa a dang zawng hi chu Adhoc in an awm vek a ni. Chutiang bawk chuan kan Director te, kan Joint Director te pawh hi tumah hi Director emaw, Joint Director emawa substantive-a chelh an awm lo a ni. Adhoc vekin an awm a, substantive-a an awmna hi chu Lecturer emaw, Reader emaw, Lecturer Selection Grade emaw an ni vek mai a ni. Chuvangin hei hi lo hnawk rei hle tawhin harsatna tam tak hi awm mahse chinfel kan tum a. Tin, UGC hian hetiang hian an ti si a, anni pawh hi an duhsak awm khawp mai tih thawm kha a awm a. Tunah hian UGC ang chiah khan an awm a ni, a term hmasa ang khan. Mahse Six Pay-a UGC ang hi duan a Mizoram sorkar ah pawh an la awm bik loh avang hian kan Lecturers te kan Principals te hi UGC ang chuan an la awm bik lo a ni chauh zawk a, an la awm rual tlang turah kan beisei a. Tuna an dinhmun mekah hi chuan 5<sup>th</sup> Pay hun chhung ang kha kan la hawlh thlen chhoh zel avang hian vawiin ni thleng hian anni hi UGC ang chiah a awm an ni tih kha House ah hian min hriatpui ka duh a. Mahse tuna Maharashtra emaw Punjab-in emawa UGC anga 6<sup>th</sup> Pay mila an kal tawh hi chu kan la ti lova. Kan sorkar Officer tam tak MCS te, MPS te leh sorkar hnathawk tam takte pawh 6<sup>th</sup> Pay anga an la la lo ve bawk ang hian an dinhmun kha a la inang khat pat a, han vui chiah hlei thei bik chu an awm lova. Mahse chuti chung chuan kan thiam ang tawka chakin office hour piah lamah pawh kan theih ang tawka chakin kan ti chho ve mek zel a ni tih kha House hi ka'n hrilh duh bawk a.

Tin, Recruitment Rules te pawh Recruitment Rules ni mai lovin, Service Rules anga siama anmahni pawh hi Service, Organised Service mumal deuh hleka tih hram kan tum a ni. Tin, hetih hunah hi chuan tuna kan kal ang lo deuh hleka kal a market atang pawha mithiamte pawh hi lak theih tura buatsaih te pawh hi a tha awm mang e, tih te hi chu kan ngaihtuah naah a awm a. A chhan chu Lecturer atang ringawt veka tuna 100% an kal khan anmahni lamah pawh khalam lo tui lem lo pawh an awm thei a. Tin, thenkhat chu hna an thawh dawn tak takin kum lama lo upate pawh an lo awm thei bawk a. Chuvangin fresh applicant tena an luh ve theihna tur atana entry grade-ah pawh hian engemaw chen chu hawn a ngai mai awm mang e, tih te pawh ngaihtuah naah chuan kan nei ve a. Chutiang a nih pawhin hei hi chu mithiam awm khawmna an nih avangin basic qualification ah chuan a hmasa in degree an neih ngei ngei chu loh theih lohah kan ngai a. Thenkhat te phei chu PHD te pawh an nih hi kan duh tur a ni, tih hi kan lo sawi lawk tawh sa a ni.

Tin, Dr. R. Lalthangliana, kan Member zahawm takin a sawi bawk, hemi Birth Certificate chungchang kha kan hriat dan a inang lo deuh hlek mai thei a. Keini lamah hi chuan kan vengah sawn Primary Teacher te zinga mipakhat hi khatiang lampang titu kha a awm a. Zingkarah emaw kan leng a, awlsam tein kan ti mai a. D.C. lamah tihfel a ngai an tih pawhin D.C. lama kan va len leh mai khan kan chingfel thei a. Amaherawhchu, hmun dang dangah practice a inang lo thei a. Engpawh nise, hei hi chu Law atanga kan chinfel mai chi a ni kher lo mai thei a, hetah GAD lam pawh a ni palh thei a.

**Dr. R. LALTHANGLIANA** : Pu Deputy Speaker, khalai awmdan kha nia, harsa lutuk phei chu a ni lo a. Ama'rawhchu, form kha a awm a, D.C. Office ah khan kan hria a, form pahnih, chu chu engemaw Court fee stamp nena han tih kual a, hetah Ukil te nen, a procedure kha a buaithlak ve na lai deuh kha a awm a. Keini ang engemaw tan kha chuan a harsa vak lo a, mahse tlema a nawlpui tana harsa lo deuh hlek kha a awm thei lawm ni ? tih lai kha ka rawn raise a ni.

**Pu LALSAWTA, MINISTER** : Aw, a lawmawm khawp mai. Kan Department lampang atanga kan ti a nih loh pawhin vawiin hi remchangah ngai ilangin. GAD lampang a ni emaw, khangte pawh a tul angin ka lo umzui ve turah ngai ilangin, mipui tana harsatna awm kan chinfel theihna kha chu chinfel zel duh kan ni a. Kan thiam ang tawkin kan lo enzui ang e.

Tin, hemi Voluntary Retirement Scheme chungchangah hian nia, tunah kan tel fel tep tawh niin kan hria a. Kan sawi tawh ang khan Structural Adjustment Loan hmangin ADB hi kan Banker ah hmangin Asian Development Band hmangin engemaw zat hi chu lo chawl tawh mai ulangin, heti hian golden hand shake ang deuhin engemaw zat hi tam tham deuh hi i lo hawn ve thung ang a, zirtirtu thar te kan lo la ve thei ang a. Tunlai khawvel naupangte mamawh leh in thiam zawng te hi a inmil tawh lo a ni, tia han inchawlh tir kan tum a. Ama'rawhchu, midang kan demna lampang leh sorkar hmasa kan demna ni miah lovin harsatna kan neih theih lai hi a awm ve a. He House ah pawh hian hriat a tha in ka hria a. A scheme ah hian anmahni kha permanent employee an ni tur a ni, tih a lo ni a. Tunah hian temporary employment-a awm an nih khan chuan permanent employee-ah kan han seng lut ang a, kan seng luh rualin 6<sup>th</sup> Pay Commission ina a recommendation anga hlawh sang an nih bawk si chuan, 'ka duh leh lo' an ti ang tih hi chu kan hlau khawp mai a. Sorkar hnate a vang tawh a, chutiang karah chuan hlawh sang tawh bawk si, permanent tawh bawk si, khang kha a scheme-in a tum tlat bawk si avang khan, a scheme hming lah hi voluntary retirement scheme a ni a. Voluntary tih hi chu lehlin ngai lovin kan hriat sa vek a ni a, a hming te hi lo phuah thar leh thei ta ila chuan Bonanza Retirement Scheme emaw Gratuitious Retirement Scheme emaw lo ti ila chuan, a retirement hi a lo awlsam deuh tur a ni a. Voluntary tih hian min phuar mang e, tih te hi chu kan harsatna a ni palh ang tih kan hlau a ni.



Engpawh nise, tunah hian kan thiam ang tawkin hma kan la zel a. Hetianga chawl duh hi engemaw zat an awm ve hrim hrim a. Mahni hmakhua ngawt ngaihtuah chuang lova, chawlh hi ka duh ve tawh a ni tih hi. Chuvang chuan tuang takin kan kal thei turah kan ngai a. Kum thar 2010-2011 ah hian chuan a takin kan puitlin theih tawh kan ring a. Hei hi Health Care nena a ruala kal chho zel kha a ni a. Health Care hi an lo hmanhmawh deuh a, nikum hmasa lam khan a lo puitlin nial nual thei tawh zawk a. Keini hian khatieng remchang kan neih ve loh avang khan a engmah hi kan la ti thei lo a ni chauh zawk a.

Tin, hemi Novadayas School kan tih ang chi, Central School kan tih Kendria kan tih ang chi Zemabawk ah leh Thenzawla awm ang chi te hi neih belh theih dan tur kan ngaihtuah zel ang a. A tul chuan kan Chief Minister pawhin hma min lak pui zel ang a. Khulam pang han biak ngaihna ah hian keini ang aw ringawt hi a tawk thei lova. Anni tena vawikhat emaw lehkha min han ziah sak mai pawh hian a sawt thei a. Hei hi thlakhlehawm tak a ni. Kan lo bawhzui ang e.

Tin, naupangte physical chungchangah emaw, Sports ah emaw kan han ko khawm a, pawisa te a awm tam loh avangin helai ah kan lo khualna ah leh an haw na lamah te pawh kan Member te kan han ti hah leh thin hi paw kan ti a. Hemi hre reng chung hian kan tih hi a ngai ve a, rual kan awt si a, anmahni lamin District anga han in el ve te an duh ve bawk thin avang khan khatieng khan kan han ti a; tih loh ai chuan i ti ang, ti ang hian kan kal hret zel a. Nakum pawh damtea kan awm chuan kan thleng leh ang a, kan ti leh bawk dawn ang tih chu ka ring a. A pawisa lampang tum tur ang zawng pawhin kan thiam ang chuan hma kan lo la tho ang a, chuti chung chuan hma kan sawn vak lo a nih pawhin, a ngai te bawkin kan tih leh tho chu a ngai ang. Hlim tak hi chuan kan inthen ve zel bawk a ni. Kha kha hma kan sawn thei vak lo a nih pawhin extra curriculum atan a pawimawh em avangin hetiang zawng hian kan ti ve zel hrih ang a. Mahse, Member ten an rawn sawi takah chuan ngaih pawimawh ah kan lo neih ang a, kan thiam ang angin improvement awm thei turin kan lo bawhzui ang e.

Tin, CSS chungchang leh a hun taka hman tih chungchang kha keini hi sorkar thar te kan ni a, kan thiam tawk lo viau thei a. Hengah hian kan thawh hona leh kan rilrua lian ber a chu, a bikin School Education chungchangah leh Higher & Technical Education chungchangah chuan zirilaite an nih avang hian kan Member te pawh hian insumkarna leh mahni lampanga inthlahrunna awm miah lo hian advise hi House chhungah leh House pawnah pawh hian min pe turin ka ngen nawn leh duh che u a. Kan hriatthiam tawk loh te, lo tih nachang kan hriat loh te a lo awm chuan englai pawhin in thurawn kan hlut em em a ni, tih kha ka'n sawinawn leh duh bawk a ni.

Tin, Member zahawm tak Pu Lalduhawma'n a sawi, Tel ah leh Dal ah chhiah a awm tlai mai, tih kha heti mai hi chuan ka han react thei lova, declare good kan tihte zingah hian an tel em? Engpawh nise, mirethei ber pawh ina kan mamawh em em mai, chhungtinin kan kawl fir fer chi a ni a. Mipui

tizangkhai thei tur zawnga hmalak theih a nih phawt chuan theihtawpin hma kan lo la zui ang, tih kha ka sawi theih tawk ni phawt sela.

Tin, Kawlkulh-II-a an sikul chungchang a rawn sawi leh khaw awm silovin regular takin hlawh an la a ni mai awm mang e, tih kha chu kan lo finfiah ang a. Tin, Kawlkulh-II han pianhmang hrim hrim a hi Pu Deputy Speaker, mak ve deuh a nia. Khi laiah khian Kawlkulh a awm a, Kawlkulh kha Vety Department ina hlawhtling thei tura Household 60 emaw tal chuan NEC atang tea buaipui kha a bialtu kha Vety Minister a nih avang khan mahni bial lama han inhnuh thlak khan hetiang hian vawiin thleng a lo chho ta zel a ni a. Fiamthuon - Motor bung inpek a va ang ve maw le, Motor pawh a bun hmawh hi chuan an pek a te tana hmantlak loh ve vein a chhuak ve thei asin. A pangngai ang khan chungkaw 60 awmin an pawisa hman tur ang angte kha hmang ta selang chuan, khilai khi an tiliak bik miah lovang, tih kha a siperah kan sawi tel duh a. Khatiang anga sikul a taka awm silo, zirtirtute lo awm a, hlawhte lo la ngar ngar an nih chuan kan lo chhinchhiah ang a, kan lo verify ang a. Thil diklo ti an awm chuan kan titawp nghal ang, tih kha vawiina ka sawi theih chu a ni a.

Tin, Champhaia rualban lote chungchangah khan vawiin ah hian information lampang ka rawn keng lem lova, hetia han sawi chhuah takah chuan engemaw thil diklo deuh hlek mit tithip a awm hi chuan, helai rorelna meuha sawi chhuah a nih hi chuan kan enzui ngei ngei a ngai a ni mai a. Tih dik leh theih a nih chuan kan tih dik leh a ngai a ni a. Khatiang khan kan lo enzui ang e.

**Pu LALDUHAWMA** : World Bank kan ti deuhin ka hria a. SSA hnuaia thawktu chungchang kha a ni a.

**Pu LALSAWTA, MINISTER** : A awm deuh chuan ka hria. Hman nia kan Officer pakhat pawn “Helai hi i lo hriat ve deuh a ngai ang” a ti a. Ngawi rawh hei thildang kan la buaipui si a, thil fello a awm chuan chinfel theih turin lo inbuatsaih rawh u, complaint information te pawh lo khawn khawm rawh u, ka ti a, chutiang chuan ka lo enzui ang e. Tin, Right of Children to Free and Compulsory Education Act, 2009 hi an passed tawh a. Amaherawhchu, effective date hi an la rawn notify lova, an sawi dan bak chu keini'n official communication kan nei miah lova. ‘It shall come into force’ tih laiah khan a pointed date te hi min la rawn hriattir lova. Tlang ti tia an sawi danah chuan naktuk tuk leh lawk April ni 1 atanga India ram pumpuia effective tura sawi a awm a. Mahse chu pawh chu official takin ka sawi ngam lova, official tak khan lo awm pawh nise, hemia heng zirlai tena an right an rawn claim-na tur sorkar te hi kan la inpeih lo tlang viau vek mai a. ‘As a matter of right’ tiin an rawn claim thei tawh a nih si avang hian. Chuvang chuan kan Secretary Delhi-a kal te pawh helai hi engtinng e kan tih dawn, hetiang hi anmahni rawn tih dan ang ang te a nih chuan changes hi a revolutionary viau mai a. Section tam takah hi chuan Elementary ah chuan tumah retention a awm tur a nilo. Tumah an fail

thiang lo a ni. Tin, Elementary tawpah tih lohah hi chuan a kar lakah Examination a awm tur a nilo, tih te a awm a. Heng angte hi kan ti mai thei dawn em ni, tih te han chian rawh kan ti a. Ani pawhin a theih ang ang chuan a rawn chian a. Hemi hi Right anga a lo awm takah chuan sorkar kha, khamia kan tihpuitlin loh chuan min rawn khing thei ta si a. Chutiang tur chuan hei ni 2/3 lek min dang tawh a ni mai a, mi ti ti hi a dik a nih chuan. Chutiang a nih chuan School ban phaka awmdan tur zawng zawngte dan meuhin min rawn khuahkhirh ta bur mai a.

Tin, Pu Deputy Speaker, han sawilan ngai chu Supreme Court-in thu an nei em em mai a, an thuneih danah hian keini State rethei te tan chuan thil harsa tak a tam a. Building chungchangah te School tam tak an han sawi naah hian Supreme Court-in hei hi an lo zawm tur a ni, tih hi Education Secretary-in Affidavit High Supreme Court a rawn file tur a ni. Chumi ni hmian an rawn ti mai thin a, chung anghah chuan Playing Ground an nei ngei ngei tur a ni, private pawh nise. Tin, file register an nei ngei ngei tur a ni. An School chu lirnging ah pawh, kangmei ah pawh, thlipui ah pawh kawng tinrengah a him ngei ngei tur a ni, tih pawh khang ang zawng zawng an rawn tih kha, keini tan chuan thil awmkhawm ni mahse, kan tlin lo sa. Khatiang chiah kha ti dawn ta ilangin zirna School kan tlin lo ang tih kha a hlauhawm tlat mai a. Chuvangin Supreme Court te pawh a duhtui leh lutuk hi keini kan pachhe si a, pachhe lote pawhin an tlin bik si lova. Maharastra a ni emaw, Gujarat an ni emaw, Punjab an ni emaw, chuvang chuan a legally-a kan tih hleih theih loh hi a awm ve nual mai a.

Tin, Mizoram Education Act, 2003 chungchang leh Notification a la awm lo tihte pawh kha nichina kan sawi tawh ang khan, Mizoram Reforms Commission te kan ti a. Heng avang hian thil tam tak han zeh duh a la awm dawnin kan hria a. Kan Act, 2003 sorkar hmasain duh taka a lo passed pawh hi eng eng emaw han tih a, a thente phei chu han zethlak laite a awm dawnin kan hria a. Chuvang chuan a Notification te pawh kan hmanhmawh lo deuh bawk a, khalai kha chu hriatthiam kan ngai a. Education Reforms Commission din si a, anmahni nghak lova thil eng eng emaw lo tih ve pheng phung kha kan hlau ve deuh a. Khati khan kan la innghak tui ve duh a ni tih kha ka sawi duh a.

**Pu LALDUHAWMA** : Pu Deputy Speaker, kha kha a dik em em mai a. Amaherawhchu, India ram pumpui huapa hman tur dan an lo siam si a, an rawn enforce thut mai kha chuan miin an right an rawn claim theih tawh hnua kan lo in rin bawk si loh kha chuan kan buai hle mai dawn a. Ka duh aiin Department hi a in puahchah nep ka ti deuh hrim hrim a. Khatiang thleng thut thei kan nih avang khan pawisa te pawh a mamawh belh teuh dawn a. R.E. lamah te pawh special scheme emaw te pawh dil a remchang in ka ring a. Helaia Education Commission result han nghah te kha chu a dik tho laiin, nghak thei lo pawh khan min rawn enforce thei a, kan adopt ve te te te pawh a ngai ve mai thei a. Khalai ah khan chak leh zual deuh hlekin tun atang hian hma lo lak theih dan kha awm selang kan ti a ni.

**Pu LALSAWTA, MINISTER** : Pu Deputy Speaker, Term of Officers te hi Right of children to free and compulsory Education Act, 2009 ina Mizoram a nghawng dan tur leh hemi ina kan in ralrin a ngaih dan leh kan lo inbuatsaih ve dan tur a te lo en turin kan lo siam ang e, Committee. A hma pawhin titi ang hi chuan kan sawi fo a, ziak te pawhin kan ti a. Mahse, tuna kan Member zahawm takin a sawi ang chiah khan a mawhpurto bik in siam a, lo hmachhawn tu leh hetiang tak hian aw tia, Secretariat by Secretariat a lo ziak tute kan lo in siam a nge.

Tin, Member zahawm tak Pu T.T. Zothansanga khan, keini ho hi, helai amite hi chu kum 30 bak kan awm tawh lo mai thei a ti a, Member te a'n ti a kha a zahawm ka ti a. Vawiin ah hian School Education Department ah hian crore 500 thelh, cheng nuai singnga thelh kan Budget ah hian a lang a. Hetiang pawisa hmang hian sorkar school kan enkawl a, Officers te an awm a, zirtirtu engemaw zat an awm a. Hei hi thingtlang amite emaw hian min han chhuahchhal ta se, engtingge maw kan chhan ang le, ti hian ka ngaihtuah thian a. Heng mite hian engtingge school tha min pek ang, an tu an fate chu a thei te chuan America ah an zirtir a, a thenin Mumbai, Delhi Kolkata ah. Aizawla awmte pawhin kan school pangngai te pawh duh tawk lovin, a school tha tha private school ah fee sang zawk chawiin. Engtingge hemi te hian school tha min buatsaih tehlul ang, min ti ta se, thu dik a ni. Chuvang chuan khatiang chhuahchhalhna lo awm thei laka kan lo chhan theihna chu School Education Department kan theih ang tawkin zirtirtu leh hnathawktu hrang hrangte hmangin zirlaite kan sorkar school-a kal te hi an phu tawk, he khawvela an din chhuah theihna tur atana kan tih tur hi kan tih a ngai a ni. Kan pian thar pawh hi a ngai a. Vawiin ah hian he House ah hian zirtirtu thahnem ngai tak tak, an hming pawh sawi chhuah chakawm tak tak an tam a ni. Mahni hlawn atanga zirtirtu lo ruai ve ngat khawpa tan la te pawh an awm a ni.

Tin, zirtirtu tha lawr, an sawi te pawh extend chak awm khawp te pawh kan ngah a ni. Mahse, hetiang karah hian hma lakna tur a la tam mai a, vawiin ah hi chuan kan la ti tha theiin kan hria a. Chutiang atan chuan kan Member te pawh hi ka sawmna ni se. Hei hi Mizoram ina kan chakna awm naah chuan a chiang sa ber a ni. Hei hi resources kan neih a ni. Lei lamah nise, vawiin niah chuan kan la hai chhuak mang lova. Rocket emaw, thlawhtheihna emaw, Motor Car emaw, Truck emaw, Refrigerator emaw, T.V. emaw hetiang khawl ropui tak tak hi Mizoram hian tun hnaiah hian kan siam chhuak thei lovang. Man tlawm zawk, tha zawk bawk si te hi chuan Korea te emaw, India ram, Maharastra te emaw hi kan zuk el mai zo lovang. Mahse, mihring puitling a insiam chhuahna, Human Resources hi chu kan ban phak rengah hian a awm tlat a ni. Hei hi keimahni kan tana kan in tih phur thiam a, remhre taka he House Member zawng zawngte pawhin heti zawk hian aw, tia kan infuih tawn hian chuan kan ram hi kawng dangah siam hluai lo mah ila, heti kawng zawng hi chuan kan ti mai thei nghal a ni, tih hi ka rin dan nghet tak a ni. Chuvang chuan hetiang zawng hian kan rilru kan ngaihtuah ve nasa em em a. Kan Member zahawm tak Pu T.T. Zothansanga'n a rawn sawi hi a pawimawh em em a, kan rilru vek a ni. Nepoleana te an han chak lova, amah pawhin a han kawh chat chu khami khan Indo a thiam vang leh khami kha a

huaisen vanga hneh lo kan ni lova. Eton College zawk kha a ni. Eton College England ami zawk kha kan hneh loh chu a ni, a tih ang deuh khan, keini pawh mizoram mipuite hi khati zawng khan kan thei a ni, kan hmaah hian hei hi a in hung reng a ni, tih kha kan hria a.

Tin, Pu S. Laldinglana'n Education Reforms Commission chungchang, Higher Secondary chungchang, amah pawh kum 27 zel a lo awm tawhna a lo sawi te leh Principal Appointment te, tin, Director Appointment chungchangte leh khang zawng zawng a rawn sawi kha tunah khan ka rawn sawi nel nual tawh a. Ka wind up naah hian Pu Deputy Speaker, ka sawi duh chu nimin piah lawkah High School Result a chhuak a, he House zahawm tak hmangin nangmah ngeiin khalai Chair i luah lai khan congratulation te pawh i pe a, a lawmawm tak zetin ka hria a. Kan result kum liam ta a kan neih tak zawng zawngah kumina kan result hi a tha ber a. Hei hi keini kan sorkar vang emaw, keini he Education Department ka enkawl vang a ni lova, a thawktute hah vang leh naupangte tan nasatna hi a rawn par chhuak a ni a. Chuvang chuan kan naupangte leh zirtirtu zawng zawngte leh zirlai zawng zawngte khang ho kha 66.6% an han awm theihna leh Higher Secondary School nena inkawp pawh nise, 136 zet a passed kim thap an awm theihna te, tin, kum danga tlar dul thin Failed vek awmna 8 chauh an awm thei te hi lawmawm ka ti a. Nu leh pa zawng zawng hnenah pawh a hminga mawhphurtu kan nihna angin ka sawi duh a. Heta lawmthu ka sawi hi min lo dawn sak se ka duh a.

Tin, helaiah hian kan Member te sawi piah lamah Taxation-a hmalakna a zawh te, tukin lamah kan in hriattir tawh ang khan kan Member te hriat sa a nih avangin ka sawi nawn tawh lovang a. Mahse, kan Department pawisa hman leh Public Money heti khawpa an tam ngaihtuah a, Private Institution zawk school ah te miin kan fate kal tur an chhuhsak char char lai hi chuan Department kan tan a ngai hle mai niin kan hria a. Mahse, chuti karah chuan kan sorkar hrim hrimin enge a tih ve hi han sawichhuah ka chak a.

Tunhnai khan kan Cabinet Meeting ah chuan school zirtirtu 270 min phalsak a. Hei hian tlabal zual engemaw chen min phuhruk theih kan beisei a ni. Tin, Hindi Teacher hi Mizoram chhungah Middle leh High School ah 1305 kan la dawn a, Autonomous District Council ah engemaw zat kan pe pheii ve ang a. Education Department tichak turin SSA leh RMSA kan nei a, heng hian a pawp lai rawn thawm turin hma an la chho zel a. RMSA chu kumin atangin kan tan dawn chauh a, April 1 atangin. Tin, Deputy Director te, DEO vacant post 6 kan fill up chho ve a, tunhnai ah, Headmaster 20 zet nen.

**Pu P.P. THAWLA** : Pu Deputy Speaker, khawngaihin thil pakhat lek, Supplementary Demand Programme-a lo lang Additional Fund nuai 812 required for payment of lumpsum grant-aid for Non-Government High School leh Higher Secondary School tih te hi khawngaihin list Member ten kan nei thei ang em aw !

**Pu LALSAWTA, MINISTER** : Khang lumpsum grant kan tih ho a kha kan pek tur a hi tunah hian kan review mek a. A pawisa lam a kha chu tuna R.E. 31<sup>st</sup> March-a tawp turah hian kan han dah phawt a. Chutiang chuan anmahni kan pek tur a chiah hi kan la final lo a ni.

Amaherawhchu, tuna kan ngaihtuah naah chuan thahnem ngaia school nei ve duh te hi an school a te hi chu thiah sak lo ila, ama'rawhchu, zirtirtu an dah tam lutuk angte hi chu naupang 10 zirtir turin zirtirtu pakhat angte hian hemi tehfung hmang hian a zirtirtu lam hi hlawi ve deuh thung ilangin, ti ang zawng chuan ngaihtuahna sorkarin a nei a. Hei hi kan la final lo deuh hlek a, tun atanga rei vak lova final ngai a ni a. Kan Member zahawm tak, Pu Duhawma pawh hian in muangchang deuh mang e, min ti tawh thin a. Mahse langin.

**Pu P.P. THAWLA** : Pu Deputy Speaker, khawngaihin engtik vela final tur nge ni ang aw !

**Pu LALSAWTA, MINISTER** : Tun atanga thla hnih chhung chuan kan tihfel a ngai ang. Chutiang chhung chuan tute hi nge kan chhawm chhoh zel tur ni ang a, tute hi nge khatianga kan chhawm chhoh theih tak loh tur kha. Amaherawhchu, mihring hmingin - Lala, Kunga, Remi tih zawng khan keini'n kan va paih dawn lova. In school ah hian zirlai 13 in awm a, zirtirtu 7 awm hi chu in tam lutuk a ni. Zirtirtu hi 4 in awm a ngai ang a, Adopt Management Committee hian 4 bak hi chu nangmah nin in thei a nih chuan in lo ti tawh mai ang a. Keini chuan hemi zirlai 13 lek enkawl tur hian zirtirtu hi heti zat bak hi chu kan pe thei lo che u, kan ti mai dawn a ni. Khatiang kha kan hmalak dan tur ni awmin a lang.

**Pu LALDUHAWMA** : Khami ah khan lumpsum grant tih te, Adhoc tih te, category thum lai kha chi khata rawn siam in tum ta nge ? A ngai ang hian pek tlak a ngaih hote chu in rawn pe chhunzawm mai dawn nge, tih kha a han sawi theih em ? Tin, a Guideline leh Managing Committee thuneihna te pawh kha review tumna a awm thei dawn em ?

**Pu LALSAWTA, MINISTER** : Tun ami ang kha kan han ngaihtuah thin a. Miin school te an nei a, an fate hi an school ah khan lut ve hram se an tih ngawih ngawih laia, lo tih loh hi chu kan tan hian a inthlahrun awm ve maw le. Hei tunah RTI te pawh India ram pumah kan han ti chho a ni zel a. Chutiang karah chuan keimah nina kan tih tur awm chin leh a mawh kan lak tur awm chin hi chu a hriat theih ang a, mimal school ngawih ngawih mi'n sumdawn nana an lo hman angte hi chu kan huang chhungah tel lo turah ngai ila. A nih lem loha khawtlang nu leh pa ina thawhlawm te an lo khawn a, an tih ve tang tangna hi chu, heng school ang hi chu paih thlawrh thlawrh loh dan hi ngaihtuah ilangin. Amaherawhchu, school defunct tawh kan veng a awm ve

hrim hrim se tih ang chi, khatiang ang kha chu kan ngaihtuah lai hian a tel lem lova. Chutiang nilo, thahnem ngaih vang leh rualawh vanga an lo tih ve na na na hi chu tih theih se, tih hi Principle ang deuha kan neih deuh a ni a. Chuvangin kan sawi tak ang khan a tehfung atan pawh a school lampangah hi chuan zuk liam nasa lo ila. Zirtirtu erawh hi chu zirlai zat nena han teh a, inphu lo lutuk awm a hi chu a zirtirtu phawi zawk ta ila, tih a kha tuna kan han ngaihtuah theih chin a ni a. Tun atanga rei vak lovah hian kan final in ka ring a. Mi rilru na kan insiam kan ring lem lo, theih ang tawkin kan pawisa harsa chung hian tih theih hram hram chu kan tum a ni, tih kha he House-a ka'n sawi theih chin chu a ni deuh mai awm e.

Tin, Headmaster pawh 20 hi kan regularized a, a dangte pawh 45 vel hi kan ti chho leh zel dawn a. A hma lama kan sawi tawh ang khan thenkhatte tan hian thingtlang kil lutuka Head va nih a, mikhual va nih bawk si a, helai khawpuiah Kohhran Upa an nihna te nena han tlansan a tih atan chuan a man love ti a, tih duh lem loh hi an awm ve teuh thin a. Khang zawng zawng khan harsatna kan tawk thin a, mahse chuti chung chuan Head awm lova school tam tak awm hi kan ngaimawh a, Member tam tak ten kan ngaimawh ang bawkin. Tin, kan Department hrim hrima kan awmdan a hi min hriat sak kan duh chu sorkar school kan tih, Primary School hi 854 kan nei a, Middle School hi 534 kan nei bawk a, High School kan tih hi 199 kan nei a. Tin, Higher Secondary School kan tih hi 20 kan nei a, Private School hi a tam viau a. Tin, naupang Mizorama kan chhinchhiah dan angah chuan kan neih hi student hi 27,611 hi kan statistic a ni a. Kawlkulh-II ami te chu a lo tel ve reng mai thei a. Tin, teacher hi 21,414 kan nei a, kan chhinchhiah danah chuan SSA school kan tih hi elementary a ni a, Middle leh Primary a ni mai a. Chungah chuan 257 zet kan nei bawk a, tin Private School hrim hrim a hi 991 Mizoramah hian a awm a. Hei hi anmahni sawi danah chuan "In naupang te hi 62% hi sorkar school atang hian kan chhuh sak tawh che u", a ni min ti a. Tichuan a school hrim hrim awm a hi 3623 kan nei bawk a.

Tin, kan sawi tak a ng khan VRS hi a taka tihhlawhtlin kan tum chho mek a. Vawiina kan sawi tak ang khan Education Department kherah chuan quality leh merit hi kan hotupa hian a ngai pawimawh a. Chuvang chuan quality leh merit ang hian kan kal hram hram a nih loh chuan naupang zirlai ah wrong message a va pe thei a, chhungkhat laina induhsakna emaw Officer ten an thil tih theihna anga appointment te hi pek mai mai zel a nih zel chuan keini zirlaite tan hian enge kan zir chhan ang le ! Thiam hian engemaw awmzia nei ang le ! an tih te pawh hi kan hlau ve a. Tang sauh sauh tura kan duh si hi chuan an tan sauh sauh theihna tur atan Mizoramah hian Education Department ah na na na chuan a theih ang chin hi chu merit anga kal kan tum a ni, tih hi he House pawhina min hriatpui tura kan duh chu a ni a. Tin, kan zirlai tam takah hian education reforms in a rawn hma tur a nih lai hian ka'n sawi duh a chu result tha te a lawmawm a; vawin niah te pawh kan sawi ang khan result leh certificate piah lamah hian thluaka hriatna nghet hi pawimawhin kan hria a. Chuvang chuan kan zirlaite pawh hi la her rem a, thiamna tak tak nei thei tura zirlaite hian zir thei hram turin kan duh a. Chumi tur atan chuan Mizo chuan Mizo tawngin, Lai chuan Lai tawngin tih te hi kan ngaihndan a ni a.

Mara pawn Mara tawngin, Chakma pawn Chakma tawng ngei hian hriatthiamna leh hriatdikna ah hian zirlai hi nei thei se kan duh dan a ni a.

Tin, India ram hi hmanni lawka India ram kan hriat hi a ni miah tawh lova, a ropui tawh a, a hausa bawk a. Tun kum, kumtira Barak Obama-in Union of States address a sawiah pawh khan, keini hi kan chawl dawn em ni ang? India a chawl ve si lova, China a chawl bawk si lova, tia Union of States-a a vawikhat sawinaa India a lam, ropui taka a sawi theih khawp kan lo nih ve tak avang hian Education hi Mizoramah chauh ni lovin India ramah leh khawvelah pawh kan lar chhuah theihna niin kan hria. Chuvang chuan Education Department ah hian quality tha kan in chher chhuah turin merit hi kan hman tangkai leh zual kan beisei a. Chuti a nih loh chuan naupangte ah wrong message kan thawn palh ang tih kan hlau ve ngawih ngawih a ni.

Tin, nichina kan sawi ang khan Polytechnic 4 tun hnaiah kan han neih belh dawn a, 2 kan neih bakah NIT hi kan nei mai dawn a. Mi In luah pawn i bei ang u, ti khawpin Pu Deputy Speaker, tan an rawn la tawh si a. Chutiang te a nih si chuan a building leh engemaw lam kha Central atangin puihna te hmu thin mah ila, a faculty, hlawh te leh a in enkawl zel a kha chu keimahni State pawisa te a ngaih dawn avangin policy swift a hi a ngai kan ti a. Kan Member zahawm tak Pu Dinga'n a sawi ang deuh khan kan policy ah hian college tam dul neih ai chuan college tlem deuh zawk, college tha, hostel pawh awm, khatiang te kha kan neih a; kan khua college min chhuh sak ti zawnga ngai lem lo a, college tha helaiah hian a awm dawn alawm, helaiah hian naupang sang 2/3 an awm dawn alawm tia, khatiang pawisa pawh renchem deuha kan tih a, NIT te, Polytechnic te, Technical studies tha zawka kan neih theihna tur atan kan hmalak dan tur sorkarin kan policy hi min hriatpui theih chuan chu chu kan duh khawp mai a. Chutiang zawng chuan kan Member zahawm tak takte pawh kan han ngen bawk a ni.

Tichuan, kan wind up chu duh ang tawkin sawi thei lo mah ila, darkar khat leh minute 40 zet ka sawi a. Sawi tur tam tak a la awm, a chhan chu Department atangin hei hi han sawi ngei ngei rawh an tih tam tak hi ka sawi lova. Pu Deputy Speaker, mahni Department ngaih pawimawh hi a na a. Ama'rawhchu, ka wind up tawh mai ang a. A pass ka rawn dil tawh mai dawn em ni ang?.

Pu Deputy Speaker, ka Department enkawl ve, Department 5 - Law & Judicial Department, Demand No.4 cheng 12,48,70,000/- hei hi Budget bua figure nen khan a in anglo a. A chhan chu separation of judiciary vanga voted ni ve lo charge 312,10,000/-, Judge ho hlawh tur keini ina kan thinrim a, kan vote duh loh pawha hlawh la tho tur, khang hote, nuai zathum leh sawmpahnih te avang khan vawiina ka Demand ah hian a rawn tlem phah ta a, nuai sangkhat leh zahnih sawmli pariat leh singsarih. Tin, Taxation Department Demand No.8-na 7,93,35,000/-, Parliamentary Affairs Department, Demand No.12 na 36,98,000/-. Tin, School Education Department, Demand No.20 na 4,28,92,07,000/-. Higher & Technical Education 69,11,13,000/-, a vaia belhkhawm



5,18,82,23,000/- . Hei hi Governor recommendation ang leh he House in a remtihna ang leh i phalna angin pass pui turin ka rawn ngen e.

**DEPUTY SPEAKER** : Kan Minister khan a rawn wind up a, a rawn sawi chipchiarin kan Member te thusawi pawh a rawn react tha hle mai. Awle, Minister-in a rawn wind up a, a Demand pass a rawn dil bawk a, a Demand No.4 Law & Judicial 12,48,70,000, Demand No.8 Taxation 7,93,35,000, Demand No.12 Parliamentary Affairs 36,98,000, Demand No.20 School Education 4,28,92,07,000, Demand No.21 Higher & Technical Education 69,11,13,000. A vaiin 5,18,82,23,000 hi pass remti apiangin 'remti' ti ru le. (Member : Remti) Remti lo an awm em ? Remti lo an awm loh chuan Pu Lalsawta, Minister Demand No.4 Law & Judicial 12,48,70,000, Demand No.8 Taxation 7,93,35,000, Demand No.12 Parliamentary Affairs 36,98,000, Demand No.20 School Education 4,28,92,07,000, Demand No.21 Higher & Technical Education 69,11,13,000. A vaiin 5,18,82,23,000 te chu House-in lungtual takin a pass ta a ni.

**Pu LALSAWTA, MINISTER** : Pu Deputy Speaker, ka lawm e.

**DEPUTY SPEAKER** : Awle, tunah chuan kan chawl lawk ang a, khi dar 5:15 a ni a, Darkar chanve chawl ila, a rei mah mah nge... a tawk maw. Chuti chu dar 6 minute 15 a rik loah kan lut leh dawn nia.

**S P E A K E R** : Dr.R.Lalthangliana leh Pu B.Lalthlengliana te taksa chaklohna avangin an awm lova, Pu P.C. Zoram Sangliana thil tul dang avangin. Tunah Pu Lalrinliana Sailo, kan sawihona te rawn wind up turin leh pass rawn dil nghal turin i lo sawm ang u.

**Pu LALRINLIANA SAILO, MINISTER**: Pu Speaker, ka lawm e. A hmasain Demand sawiho naah Member zawng zawngte hnenah lawmthu ka sawi a. Constructive approach neia Zoram tan, bial tan, mipui tan an sawi avangin lawmthu ka sawi a. Hriat hrehawm leh ngaihthlak hrehawm awm reng reng awm lovin thahnem ngai taka an sawi avangin lawmawm ka ti tak meuh meuh a ni. Chuvang chuan kei pawhin sawi rei loh ka tum ang a, a tiha tih tur leh ngenna te a awm nual avangin mimal tinte ka rawn react vek lo a nih pawhin min lo hrethiam se, kan lo chhinchhiah thlap a. Tin, kan Officer ten an lo chhinchhiah vek bawk a. Member 11 in Health Department an sawi a, Trade & Commerce hi mi 4 in an sawi a, Labour & Employment hi mi 4 bawkin an sawi a, a lawmawmin ka hria. A hmasa in kan vaia kan ngaihpawimawh ber, a sawi zawng zawngten an sawilan Health Care chungchang hi sawi ngaiin ka hria a.

Demand No.24 ah ADB loan min rawn pek chhan pawh hi han sawi pawh a thain ka hria a. Kan hre theuh ang a. World Bank te, Asian Development Bank te hian khawvel ram harsate leh ram retheite chawikan nan

loan an la thin a. Chu chu kan Central Sorkar pawh hian a ram chhunga State hrang hrangte dinhmun hniam deuh te a rawn en ta a. Tichuan, kan Zoram pawh hi chiang takin Planning in min hria a. Finance in min hria a, mi chawikan an tum ta a. Tichuan, Asian Development Bank atangin U.S. Million 100 dollar kha min rawn chawikanna turin loan an la dawn a. Chutah chuan, million 25 hi Health & Family Welfare bikah hian an dah ta a. He Asian Development Bank pawisa kan puk turah hian, kan hman turah hian Central a fimkhur em em a. State pawh kan fimkhur tur a ni. Hetiang anga mi rawn chawikan an tumna hi kan hriat angin 100 ah 90 Central-in loan hi min tum ang a, 100 ah 10 hi kan lo puk ve tur a ni a, kum 20 chhung atana rulh tur a ni a. Tichuan, U.S. dollar million 100 ah khan 25 Health in kan chang ve ang kan tih a kha, heng hrang hrang hi U.S. Million dollar 100 ina hmanna tur chu sawi vek tawh mah ila, nichina kan Education Minister zahawm takin a sawi ang khan Education system siamthat ngai te, khawvel leh India ram pawhin zirna hi a ngai pawimawh a. Tichuan pension te dinhmun chawikanna tur leh system tha zawk te, tin, Public Undertaking Company hrang hrang leh kan Co-operation hrang hrangte lost ringawta kal te, chung ang dinhmun chu rawm chawikan an tum a.

Tin, chung zingah chuan Health hi nichina kan ngaihthlak ang khan Fundamental Rights an ni a, hei hi Education leh Health te chu kan Fundamental Rights tak meuh meuh a nih ve avangin, million 25 hi India tangka chuan tun anga kan thleng naah vaibelchhe zasawm pasarih leh nuai sawmriat a ni a. Tichuan, sawi tawh ila a tha awm e. Vaibelchhe zasawm pasarih leh nuai sawmriat chu a hmanna tur dik takah chuan Health Care Mizoram a hriselna tur, tihchangtlunna tur a ni a. Tunah hian pawika tih em em chu kan Opposition bench lama kan senior pahnih Dr. Thangtea leh Pu Thlenga, Member zahawm takte an awm lo hi pawika ti a. Anni pahnih hi thil tha duh leh senior an ni a, kan House practice leh ethic ah senior chu kan zah a, thil tha pawh an duhin ka hria a. Awm se, an awm laia sawi ka duh chu he thil Health Care lo chhuah a kan hma Ministry ina an sem dawn a, an rel lai khan an awm ve lo a mi, tih ka zawt duh a. Awm ve se, heti ngawt hi chuan thil an tih ka ring lo a ni, Pu Speaker, Sap thufing leh kan mithiam zawk ten 'preventive is better than cure' an ti a. Invenna hi nat tawh hnua inven ai chuan, invenna hi a pawimawh zawk a. Chu chu keini chu tunah hian kan House Leader zahawm tak ho hian kan sawikhawm dial dial thin a, an thil tih tur hi an sawikhawm lo emaw chu aw, ka ti. Nge ni a, inthlan dawn avang a ni a, tikhan lo kal tur kha an lo sem tawp. Thingtlang leh rethei harsa zawkte hmuna Health Care a kha develop dan leh tihchangtlun dan leh a prevention (a invenna) ang chi te, khang a pawh kha a tel vek a. Hetianga a sum hlawma pek tawp ang chi hi a ni ang em? tih te pawh kha chhut theih a ni a. Amaherawhchu, an sawiho lo nge ni ka hre lova. Tikhan nikum kum leh tawh zawkah vawina ADB atanga pawisa kan la hmuh loh cheu a, a taka Health Department-in kan la hmuh loh a hi nikum kum leh khan an lo sem ta a ni, a awmzia chu. Chu chu kan sawinawn fo tawh a, cheng vaibelchhe 50 kha Plan Fund atangin an lo la tawp mai a. Engtik niah nge a procedure leh a kal kawng neuh neuh leh han tihfel kha a la thui dawn tehluul nen. Cheng vaibelchhe sawmnga kha an lo hmang tawp mai a, a dik tak chuan anmahni leh anmahni

sorkar pawh kha an buai hle ka ring a ni. Plan Fund a nih avang khan khawimaw laia sikul building sakna tur emaw, khawimaw laia Health Sub-Centre emaw leh khawimaw laia Step siamna tur emaw khang Plan a kha an lo pawt peng ta a. Tichuan, hei hun a lo kal zel a, 2008-a sem tawh kha April ni 1 atanga sem kha a ni a, khata tanga tih tur kha a ni a. Amaherawhchu, an thawhpuite April ah an in puahchah fel ta nge ka hre lova, April ni 9 ah khan an rawn sem ta a ni, khami kan Health Care a kha. Chutiang chuan a kum leh 2009 April ni 1-a tawp tur a ni a, chutiang chuan pawisa kha a tak a awm hma, ADB Central chu kan hria a, Manila ah a ni a. Central-in min rawn puk sak a ni ber a, a awmzia chu. Chutah Central ah a lo kal ang a, hetah kan lo sawi fel ang a, chumi hma chuan kha pawisa kha tikhan lo hman puk lawk kha a lo ni ta a ni. An tum dan nen a in ang em aw, tih pawh hi chhut tham tak a ni.

Tichuan, Pu Speaker, Bajaj Alliance kha ka'n sawi leh ang a. Kan Member zhawm tak, Aizawl West-I bialtu ina a tih ang khan midang ina sawi chiang tura min duh angin, in hria a, kan hriat tlan a ni a. Hetiang ang Insurance chungchang hi Central ah Finance Department hnuaiiah SEBI an ti a. Security Exchange Board of India te, Insurance, Regulatory Development Authority te hnuaiiah khan Bombay Stock Exchange a awm a. Bombay Exchange hnuaiiah chuan heng ang Insurance Company hrang hrang hian, an in register ta a. Tichuan, policy an zuar a, Company lianpui pui tam tak a awm a, tunah hian ka sawi vek seng lo ang a. BHEL tih te, National Thermal Power Corporation tih te, tin, ICIC tih te, tin, heng ang L&T tih te, DLF tih te, ONGC tih te a awm ta a ni. Tikhan an policy kha an zuar ta a. Tichuan, tunah hian hemi Bajaj Alliance pawh hian policy hrang hrang a nei teuh a. Internet ah vawiin ni ngei pawh hian en ta ula, in hmu theiin ka ring a. Nizan khan zanlai thlengin kan bei a. A tawi zawngin kan sawi ang a, an policy ah chuan Century tih te, Young Care Equity growth fund tih te. Tin, Century plus Equity growth fund tih te, Care cap plus accelerate fund tih te, Century plus Equity Index fund II tih te tam tak a awm a ni. Heti chen hi a tlar dul a ni. Chutiang chuan an rawn ti ta a, khatiangah khan a then chuan in government bonds kan tih te, corporate bonds ah te hian an dah thin a. Chu chu tunah hian an dah dan dik tak kan hre lova.

A pawimawh ber, vawiin nia kan inhnial tak a chu hei hi a ni. Net Assets Value (NAV) an ti a, chu chuan unit a lei ta a. Khatih lai khan vaibelchhe sawm Bajaj Alliance kha kan va pe ta a. Kan va pekah khan a vaibelchhe sawm ngau ngau kha keimahni hian pung turin kan va dah a ni lo phawt a. Anni khan cut neuh neuh leh service charge emaw neuh neuh kha an lo nei ta a. Tichuan an cut hnuah khan an policy nen khan an han zuar kha a ni a. A eng policy berah nge an dah dawn ka hre lova, an unit leh khami NAV kan tih price a kha a pawimawh ta ber a ni. Dik tak chuan Pu Speaker, a rate chungchang leh vaibelchhe sawm daha a pung, chuti khati kan tih a hi, inhnialna finthlak loh tak a ni tih hi he House zahawm takah hian ka sawi duh a ni.

Kan hria a nikumah chuan khawvel market recession a awm a. Market rate a tlakhniam duai duai avangin Europe ah te, USA ah te, khu lamah khuan an pawisa neih pawh an invest ngam lo a ni. A bikin tuna India ah te Look East a enah ngat pheih chuan a rawn tlan chhuak tan tawh a ni a. Khatiang khan market recession lian tak mai kha a awm a, market rate chhiat kha a awm a ni. Member tam zawk hian in hre vek ang a. Nikumah khan he vaibelchhe sawm dah hi la chhuak ta ilang chuan Pu Speaker, vaibelchhe nga leh ruk bak a ni lo reng reng nikum khan. Market recession kha a nasa lutuk, Global market recession kha. Chuvangin a rate a pung tih hi inhnialna finthlak loh a ni. Vawiin niah chiaah erawh chuan tihian market rate a lo tha chho deuh hlek a, a chho ve mahna.

Tin, Insurance an tih dawn reng reng hian a lehkha ah hian, 'Hei hi risk a ni e', an ti a ni. Mutual Fund ah reng reng chuan risk a sang hrim hrim a. Chuvang chuan tuna a rate kan tih chungchangte hi tuna lo inhnial chi a ni lo a, tahchuan fiah taka kan Member ten a hriat atana ka duh chu 3 years lockin a ni ta a ni. Kha vaibelchhe 10 ah khan sawi ta phawt ila, vaibelchhe 10 kha Bajaj in a lo chang ta phawt a. An cut neuh neuh hnuah khan kan invest tur tak kha chu a awm dawn a. Chu pawh chu engzat chiaah nge tunah hian ka hre lo a ni. Engzatnge cut ka hre tawh si lova. Tichuan, he policy hi kum 10 tan a ni a. Kum 10 atan a nih rualin 3 years lockin period an ti a. Kum 3 chhung hi a khawih khawih chet theih reng reng lohvin a dah phawt mai a ni. Chuvangin lo sorkar leh ta pawh nise, anni hian an tih theih hi ka ring lo reng reng. Vaibelchhe 10 kha khawih chet theih reng reng lohvin an dah a. Kum 3 kha lo ral pawh nise 10 years policy a nih avangin eng ang system in nge, eng ang condition in nge an lakchhuah theih dawn? Chu pawh chu an la phal lo thei cheu a ni. Chuvangin hei hi House zahawm taka sawichhuahna remchang kan nei hi ropui ka ti a. Member ten ngun taka ram hmangaihna avanga zawhna in siam hi lawmawm ka ti tak meuh meuh a. Hei hi issue lian a tling tak meuh meuh bawk a ni. A hrim hrimin khami a fund value kan ti tawh mai ang a, vaibelchhe 10 atang khan an cut neuh neuh ang a, kan invest tak tak kha chu a hriat loh kan tih kha. Chu chu fund value a ni ta a, kha pawh kha kan hre ta lo a ni. Chuvangin tuna Bajaj Alliance ah hian a pung chuti zat chu a ni tih hi thudik lo a ni. Chuvang chuan Pu Speaker, mipui hnenah pawh hei chu inchuha thil tih hi a tha ka ti lova, keini pawh khan tih mualpho leh tih chhuah kan tum a ni lova. Health Care Scheme hi in tan leh dawn em? min ti a. Tah chuan, 'Tan dawn e', tiin kan policy ah a lo awm bawk avangin kan han sawi a. Amaherawhchu, sum dinhmun dik tak kha kan han chhui a, kan han tih kan han tih khan, tute emaw tih mualpho tumna nilo khan a lo lang chhuak ta a. Media ten min zawt a, kan sawi lo thei lo a ni, tih kha kan sawi phawt duh a ni.

Tichuan, Reliance kha a lo awm leh a, nichina Member zahawm takte zawhna ang khan. Reliance hian cheng vaibelchhe za leh tih chuang a kha, engtik niah emaw Zoram in kan puk dawn tih a lo lan tawh avang khan, vaibelchhe 50 kha an lo la lawk kan tih kha. Chuta tang chuan Reliance nen chuan an lo ti ho ta a. Reliance hian cheng vaibelchhe 28, 93,88,192 hian an chhang a, vaibelchhe 29 tep a ni. Chuta tang chuan Member zahawm takte sawi

ang khan khami cheng vaibelchhe 28, 93,88,192 kha pek vek turin an rel a, file ah pawh a lan kha. Amaherawhchu, kan Doctor ten 'e tichuan kan chan a chau lutuk ang e, 5% hi chu lo hreng ve ang u' an ti a. Chumi 5% chu cheng vaibelchhe 1 nuai 44 leh singruk sangkua zali leh sawm a lo ni a. Vaibelchhe 1 leh nuai 44 a nih ber chu, a tawi zawngin. Chu chu kan hnenah khan a awm ta a, Health Department ah khan. Tichuan, charge ka han lak khan 27,49,18,782 kha Reliance Company khan an chang ta liau liau a ni.

A awmzia takah chuan Aizawl West-I bialtu zahawm tak hi lo sumdawng ta se, South-III bialtu zahawm tak Pu K.S.a hnenah hian, 'Khaile, pawisa ka pe ang che, tichuan damlo kha duh ang ang minrawn pe rawh se' ti se, a inang reng. Reliance khan Vaibelchhe 27 leh nuai 49 chuang an chang ta a, tichuan, Mizorama rethei te te leh harsa te te dinhmun kha anrawn thlir ta a, chumi ang chuan pawisa kha anrawn release ta a ni. Pu Speaker, a dik tak chuan sorkar in change hi lawmawm tih ve deuhna ka nei a, ka sawi duh chu charge ka lak ve khan vaibelchhe 8 leh nuai 16 kha Reliance Company khan kan harsa leh damlo te tan anrawn pe a. Health Care Society nen an lo in be thei tawh lo reng reng a ni. Kan Health Care Society leh Reliance Company te, kha an in be thei tawh lova, engatinge tiha kan zawh chuan pawisa min pe duh tawh si lova, kan in be thei tawh bawk si lova. Helaia an TPA 30% Administration kha an agency te khan Medi-assist an ti a, Kolkata ah a then an transfer thla ta a, a buai ta nuai mai a ni. Vaibelchhe 28 dawnah khan vaibelchhe 8 vel chauh kha sorkar anrawn pe a ni.

Tichuan Pu Speaker, kan buai ta a, kan hahpui hle a ni. Kei ringawt pawn vawi 13 ka Committee pui a ni. Private Hospital pawh an lawm hle a ni. Chanchinbuah te pawh lawmthu te an sawi a, Delhi atang ten Committee ka rawn ko a, dar 3 ah kan Committee ang, te ka rawn ti a. Chutiang ang chuan anmahni leh Reliance pawisa petu leh helai mite kha kan insuihkhawm a ngai phawt a. Chutiang chuan a changin ka vau a, a changin ka thlem a, a changin ka tlawn a, khatiang khan ka ti ta a. Court ah kal ta se, Court ah te chuan engtia rei nge an inkhin dawn a hriat si lova, khatih lai khan a chak hian an chak ngawih ngawih ang ka ring. Tichuan, a chang leh Reliance Company kha inrawn tih that loh chuan Delhi ah Press Conference ka ko ang, te kan ti a, a changin kan invau a. Tunah tak hian cheng 16,40,92,711/- an pe tawh a ni. Rs. Vaibelchhe 17 an la pe lo deuh a nih chu, tan chu tang tak kan ni.

Chutiang chuan Private Hospital zawng zawngte an fel a, kan thawkho a, tihdan tur te kan rel hova, bul kan tan leh a, a pawita em em chu enge ni kan hre tawh lo a ni. Hetiang hi sawi pawh a nuam lova, hlauh lohna ruk kha anrawn nei a ni. Inkhing ta ila, kan chak dawn lo reng reng si a. Tunah hian vaibelchhe 5 atanga vaibelchhe ruk vel hi la tang niin kan hria a, chutiang vel chu kan dinhmun a ni. Hei hian tha pawh a heh khawp mai. A Reliance Company pawh hi kan inah vawi 6/7 an lo leng a, extra burden kan nei a ni ringawt mai a. Chu chu tuna Health Care hi a dinhmun a ni a.

Tin, tunah hian ADB atangin pawisa hi rawn kal chho a ni a. Chutiang chuan ADB chuan min rawn pekna angin kan sawi ang khan Compass fund tur a ni a. Vaibelchhe 117 leh nuai 80 chu an duh dan thlapin kan Finance Department in tender/bit an sawm ta a. An chhan ngamna chutiang vaibelchhe 117 chuang kha hetiang hian chhan a ni ta a, he House zahawm tak hi ka hriattir duh a. Mizoram Rural Bank in kum 1 atan hian 7% in an chhang a, chu chu pek tur a ni a. Rural Bank ah hian kum 1 atan nuai 50 kan pe ang a. Mizoram Urban Co-operative hian an tih ve bawk avangin vaibelchhe 50 Rural Bank ah khan Urban Co-operative Development Bank ah hian vaibelchhe 2 a ni a. Kum 3 atan kan chhang leh a, tahchuan Rural Bank in vaibelchhe 5 an chang leh ang a, tin, Urban hian vaibelchhe 3 an chang leh ang a. Tichuan, a interest a lo sang deuh hlek a, kum 5 atan IDBI Bank Ltd. hian 7.76% in an chhang a. Chu chu midangin an chhan ve loh avangin vaibelchhe 57 leh nuai 80 hi an chang dawn a ni. Chutiang chuan tunah hian hemi chungchang chu kan sawi ang kha a ni a. Vaibelchhe 117 nuai 80 kha kan dah pung ang a, tun anga mutual fund system ang chi deuha dah hi an awi lo reng reng a, IDBI leh khulam khan. Chumi pung te chu an rawn chhut a, kum khatah vaibelchhe sarih/riat vel emaw vel a lo ni ang.

Tunah hian Health Care hi kan tih tum tak a chu vanneithlak takin Labour & Employment ah RSBY an ti a, chu chu BPL hnena mipakhata cheng singthum thleng tih theih a kha. Hei kan vannei zel a, Mizoram kha District zawng zawng min phal sak ta bik a, a lawmawm tak meuhin ka hria a, India rama tih mek a ni a. Tunah hian India ramah State 23 in an ti tawh a, a ti hnuhnung pawl kan la ni leh cheu a. Nikumah helaiah hian North East tan March ni ruk khan an rawn Committee nghe nghe a, mahse kan ti lawk thei lova. Amaherawhchu, Employment Department hi kan hriat angin man power ah kan chau em em a, khang vangte pawh kha a ni a. Theih tawp chuan kan Staff te pawn an ti ve bawk a, chu chu tunah hian tender te kan ti chho leh tawh a, khami nen khan tuna a pung te te te nen khan tih chhoh kan tum ta a ni. Tuna Assian Development Bank atanga pung tura hi roughly chuan han chawh rualin a tlangpuiin vaibelchhe riat vel emaw hi kum khata pung tur a ni a. Tuna kan tih dan system a hi a hma a mitena politics-a he Ministry hian a ti thei lo tih leh thil tang te kha lo awm lo sela chuan, hetiang lo pawh hian tih theih dan a awmin ka ring a. Heta thingtlang leh harsa leh a rethei tak takte ngheng zawka a prevention zawka pawh kha tih a ngai mai thei a. Ama'rawhchu, tunah hian kan hotute nen ngun deuha kan ngaihtuah hnuin kan kal lo thei ta lova. Labour & Employment hnen atanga pawisa kan hmuh tur nen kan ti kawp dawn ta a. Tichuan Labour & Employment pawh khan singli sangnga vel BPL hi a nih thin a kha, chu pawh chu min rawn nawr leh ta a. In share a tlem em a, kal ru, kal ru an rawn ti a. Planning Commission in BPL thlan dan tur min rawn pe dawn a, ama'rawhchu, Labour & Employment Centre khan in State a te a, kal thuai thuai ru, an ti a.

Tunah hian Urban leh Rural amite nen BPL hi 69,000 velin kan chawk chhuak a, chumi ang chuan RSBY a hi kan kal dawn a, tiang chuan BPL angin kan kal dawn a ni, tih kha House ah ka sawi duh a. Helaiah hian tumah hi inchirh theh emaw, engemaw zawng hian kal kan tum lova.

Amaherawhchu, chanchinbu mite an chak a, min zawhin kan sawi ta a ni. Hei hi thudik tak a ni tih kha ka sawi duh a.

**Pu C. RAMHLUNA** : Pu Speaker, point of clarification atan ka'n au ve chhenna chhan hi chu thil dang a ni law. Khami vaibelchhe 50 atanga vaibelchhe 10 State Bank of India-a Bank-a an lo dah a kha, Bajaj te, Reliance te kha chu thudang pawh lo ni ta se, 10 crore lo awm ve a kha, khami a kha a hman theih mai lawm ni, tih kha kan au ve thinna kha a ni a. Kha kha tunah khan sawi a ni ve ta lem lova, khami kha a hman theih loh dan a awm nge ni a, in han dah pung tam deuh dawn em ni? A chhan chu mipuiin an nghakhlel tawh si a.

Tin, nikum May thla khan Order in chhuah vek tawh si a, Gazette ah khan a chhuak chuai chuai tawh si a. Kha kha in ngawi vawng vawng tawh si a, khami pawisa in hmang tur a kha emaw kan lo ti che u a, chulai tak chu a nia ka'n au ve na chu ni.

**Pu LALDUHAWMA** : Pu Speaker, hei a pawimawh em a nia, kan ngaihthlak tak ang khan kan sorkarin pawisa puk a tum, a sum puk tur a dawn hma kum hnih ah Plan sum vaibelchhe 50 lo la chhuakin he scheme hi inthlan dawn tepah an ti kha a ni a, kan hria a. Hmang seng leh si lovin engemaw zat chu khawi khawiah emaw an lo deposit leh thluah bawk si a, an mamawh vak lo tihna a ni a. Tin, insawisel naah kan ngai emaw, ngai lo emaw, hei hi chu a rapthlak in ka hria, he thu hi House ah hian ka sawi duh a. Kha vaibelchhe 50 an hmanna break-up a kha kan Minister hian ziakin min pe thei se ka duh khawp mai a. Khawi Bank ah nge an dah? An dah ni leh interest te, tuna a interest awm tawh zat break-up te nen min han pe thei se. Tunah chuan a tan sawi a har mai thei a, chu chu ka'n hre chiang duh a. Tin, Reliance an pek zat kha crore 28 bawr vel a ni a. An hman tawh, bill an pek tawh a kha crore 16 vel a ni a. Hman bang kha crore 5 crore 6 vel an la nei niin kan hria a ti a. A ni thei dawn em ni? Crore 10 chuang hman bang a la awm dawn lawm ni? Hei hi clarify ka duh bawk a.

Tin, Reliance Company-in an dawn tur atanga 5% kan Doctor ten an lo cut sak kha, an lak tak loh a kha, vaibelchhe khat leh nuai 44 dawn vel a kha khawiah nge tunah hian a awm? Pawisa a la kim em? Nge an lo hmang leh tawh? An hmang a nih chuan khawiah nge? Eng atan nge an hman, tih kha, kha kha nichinah khan kan sawi bawk kha a ni a. Khangte kha min han hrilhfiyah deuh law law se, tun bak hi chu kan sawi kher tawh pawn ka ring chuang lova.

**Pu LALRINLIANA SAILO, MINISTER:** A lawmawm hle mai, Pu Speaker. Member zahawm tak Pu Rama rawn sawi ang khan, vaibelchhe 10 kha State Bank of India ah dah a ni a. Amaherawhchu, sawi pawh a hrehawm a, a buarchuar em mai a. Bajaj Alliance-a vaibelchhe 10 awm kha chu thudang a ni

a. Tuna Reliance a dah pawh kha hman hek leh a ni tawh a, critical illness kha a awm ve a, chu chu pek loh theih loh kha a ni ve a. Tichuan, tuna Pu Duha, kan Member zahawm tak sawi kha a rawn zawh kha a dik khawp a. Heti laiah hian keimahnia thil chiang awm a chu vaibelchhe 28 chuanga an lo chhan kha chu an chhanna an inrem tawhna a ni a. Chutih laiin keimahni Mizoram chhunga damdawiina awm te khan vaibelchhe 23 vel kha an claim a, claim bak kha chu agreement ah khan an ta tur a ni tlat mai a, risk a nih avangin. Chung kan chan pawh chu nasa tak a ni nghal hrim hrim, ka sawifiah zo emaw? Vaibelchhe 28 leh singkua vel kha an ta tur liau liau, an agreement ang a ni. Khami chhung kan pelh chuan.

**Pu LALDUHAWMA** : Kha kha chu ka hre thiam a. Mahse, an claim, an pek loh si a awm teuh a ni lawm ni? Kha kha kan pek tir thei lo em ni?

**Pu LALRINLIANA SAILO, MINISTER** : Awle, ka'n sawi zel ang e. Nichina rawn zawhna a nih avang khan vaibelchhe 28 leh nuai 93 chuang kha an claim khan agreement kha a ni ta a. Damlo te hian vaibelchhe 35 pawh lo claim ta ila, min pek tur ni awm tak a ni a. Ama'rawhchu, an operate te a tlai bakah tunah hian vaibelchhe 24 a tling lova. Engle khawle, vaibelchhe 28 a danga 24 a lo tlin lohna 24 chin pawh kha agreement a awm tawh avangin an claim ngam tawh lo hrim hrim, kan claim ngam china damlo te bill kha vaibelchhe 24 vel a ni a. Chuta tang chuan nichina kan sawi tawh ang khan vaibelchhe 10 leh nuai 40 vel a ni a. Chu chu kan in nawrna reng a ni. Chutah, heta tanga rawn theh lut kha technical-in a diklo an ti a, a chang leh CMO zawng zawngte kan in ko khawm a, kei pawh darkar 6/7 te ka meeting pui a, chutiang chuan kan nawr a ni. A zialo ang reng khawp mai. Chutih rual chuan 5% kha an lo deduct a, chu pawh chu anni hian critical ah an lo pe a nih ka ring a. Min lo pek tur hian a daih dawn tho avangin hetah hian kan adjust mai ang, an ti a nih ka ring a. Chu chu kan hmang a nih ka ring, chutiang chuan kan hmang e, an ti a, 5% a kha, vaibelchhe khat leh tih a kha. Chu chu Health Care hi a nih leh nuai avangin Lawngtlai bialtu in a ti thei nghal mai lawm ni, a tih kha. Lehlam ah RSBY nen chance kan lo neih that dawn bawh avangin kha kha kan tender bawh a. Kan Staff te pawh an hah hle a, streamline a ngai si a. RSBY ah hian kan tih fuh chuan kum khatah vaibelchhe 200 chuang kan hmu thei dawn a ni. 79000x30000 puntir ila, vaibelchhe 237 a chhuak daih a ni. Anni pawhin 'pawisa kan nei e, tan rawh u' an ti a. Tichuan, hmanni ni 24 khan anmahni Director general hovin an lo kal leh a, chutiang chu kan kal tum dan mek a ni.

Tunah kan Member te sawi hrang hrang a kha, a tih a tih kan rawn tum ang a. Hei vanneihthlak takin kan Chief Minister, Planning Minister ni bawkin 13<sup>th</sup> Finance Commission ah vaibelchhe 30 vel min pe a. Chu chuan sub-centre 180 sakna tur leh PHC 15 sakna tur min pe a. Chu chuan tuna in rawn sawi a kha chu mimal In ding te, in bial amite kha chu a cover zawh deuh vek ka ring a. A tih a tih khan kan rawn kal ve ang e, tih kha a tawi



zawngin ka chhanna a ni. Tin, Pu Speaker, kan vaia kan tanrual chuan he State hi hriselna ah hian khawvel hriatah India ramah pakhatna kan ni thei a ni.

Tin, hmanni ah ka sawi tawh a, kan tan tlanna tur pakhat ka'n sawi leh duh a chu, sub-centre ah hian Untied Fund kan ti a, cheng singkhat kan dah thin a, kumtin hian. Tin, Annual Maintenance Fund cheng singhnih a nei a ni. Chu chu lo en ta vek ula, a nihna anga kan hman thlap thlap chuan hriselna ah hian hma kan sawn ngei ngei ang.

Tin, Village Health Sanitation ah singkhat kan rawn dah bawk a, chu chuan hna a thawk turah kan ngai a ni. Tin, PHE tinah hian Untied Fund kha cheng singhnih sangnga kan dah a. Annual Maintenance Fund ah hian grant a ni a, hei hi cheng singnga a ni a. Tin, RKS ah cheng nuai khat a ni. Nuai khat singsarih sangnga hi PHC ah a rawn let a. Chu chuan kan mamawh zualpui leh thingtlang leh anmahni building leh material pawh kha, kha khan a suthla thei tura ngaih a ni a.

Tin, CHC ah hian Untied Fund kan tih kha singnga a ni a, tin, Annual Meeting Fund hi nuai khat a ni a. Tin, RKS hi nuai khat a ni bawk a ni. Khatiang khan a te deuhah VCP an chair a. Tin, PHC ah te, CHC ah te khan BDO an chair tur a ni a. Pawisa te hi a nihna ang anga kan hman chuan thingtlangah te, Zokhaw lamah te khan hmasawna a hmuh theih ngei kan ring bawk a ni. Chung chu kan tan tlanna tur nise kan ti a.

Tin, OPD building bo tih a hi Pu Deputy Speaker, hei hi a awmzia chu a ni. Chanchinbuah kum hmasa lamah khan a lo chhuak a, chu chu keini pawhin 'engtizia nge' kan ti lo thei lova. Chumi rual chuan tuna kan zawh hian kan Officer ten hei hi Anti-corruption in an chhui tawh avangin tiang hian a kal, an ti a. Nia, kan sawi a, kan vaiin Law shall take its own course, kha kha keimahni purview a ni tawh chiah loh avangin kan va um, kan va um ta lem lova. An chhui muan leh keimahni a ni lova. Chutih rualin keimahni ah tih tur dang a lo tam em avangin, min an chhui mek si avangin kan lo ngaihtuah lo a, kan chhanna pawh hi khati khan a kal thin a ni. Inthlahrung takin Engineer John Rammawia chu vawikhat at home kan neih naah, Enge i dinhmun, i chanchin hei an chhui tih hi a ri a ri a", ka ti a. "Nia, a kal mek", a ti a. Chutiang chuan, a bak kha "Minister-in a ti", tih kha kan hlau si a, ka inthlahrung ang reng khawp mai a ni. MMU pawh kha chutiang tho chu a ni a. Chhui a nih tawh kha chuan keimahni Health Department kha chu kan kel e awl tlat mai a. Va nawr chak emaw, va tih a kha a mawi lo chin a awm ang em? tih te, chuvangin helai ah hian thu inchuh kal lai kha ka sawi duh a ni.

Tin, Pu Tlinga'n a rawn sawi, Member zahawm tak ina sawlai Civil Hospital chungchang kha theih tawpin kan tang a, vanduai thlak takin kan Chief Minister makpa a damlo a, thil fello a hmu a, an sawi a. Tele-medicine te, thingtlang leh heng Lunglei te, Champhai leh Saiha te khatianga T.V. hmanga in enkawl theihna anga dak a hawn ni te pawh a han sawi a, chu chuan kori a tu viau mai a. Aizawl Civil Hospital hi India ram Civil Hospital ah a fai berin ka ring a.

Tin, tunah hian kan Chief Minister hmalakna leh keini pawh ni pahfawm a, Casualty atanga Operation Theatre thleng sawn inzawn luk luk ngai tawh lovin, nawr zar zar theih turin an siam tawh a. Khatiang khan hma kan sawn a ni tih hi ka sawi duh a. Tin, nichina an rawn sawi Member zahawm tak tena an rawn sawi gas pipeline kha room tina dah tur tih chu, khami capacity khan a zo lo hrim hrim a. Tunah hian chumi zo tur chuan project siam kan tum a, chutih rualin khami lo siam tawh kha chu thla hmasa lam khan function tawh a ni a. ICU ah te leh room hrang hrangah khan engemaw chenah khan connected a ni tawh, tih kha ka'n sawi tel duh a. Tunah hian NRHM ina hmalakna hrang hrang sawi tur a tam khawp mai a, amaherawhchu, Member te rawn zawhna kha tikhan kan zo thawkhat dawnah ngai ila. Tin, Lunglei lam Member zahawm tak Pu Thangtea zawhna te, Lunglei Hospital-a Cabin te pawh kha kan ngaihtuah lai mek a ni a. Tunah hian Rs.60,00,000/- vel turin DPR kan siam a, chu chuan a huam tel a. Dik tak chuan a pawisa dang a lo kal a, duhlai bel leh mai thin ang khan kan Chief Minister zahawm takin hnawk lianpui mai khawlaiah kan siam leh ang a, tih a hlauh ang deuh hlek khan master band kan siam a ni.

Tuna Aizawl Hospital pawh hi chutiang deuh hlek chu a ni a, fund dang a lo kal a, guideline an han en a, chumi Doctor chu a impose posting awmna sa a ni tur a ni, tih te kha a lo ni a; a ei ah te pawh khan kan bel lo thei lo a. Tin, tuna kan building la kal mek te saw rin aiin kan tih chak theih lohna chu solar system kha a lo awm ve a. Chu chu ZEDA in a khawih a, kan va ti thin a, khulam ah kan agent ten an ti kual a, thla fe a kal a ni. Nikum January 24 ah foundation laid a ni a. Chuti chung chuan kumin te pawh khan kumtir lamah la tih loh a nih avangin a tam phah a, kei ka tlin tawh love, ka inti a. Keimah ngei hian ka'n chhu chhia ange ka ti a, a building kha tubauhin kan va chhu ta a, Thana Officer te nen kan chhu liam liam a. Tunah chuan dismantle a ni tawh a, chutiang chuan building kha tan theih a ni dawn ta a ni. Chu chu vaibelchhe 54 kan tih fo nen pawh khan inzawm vekah ngai ta ila, kha kha sak chhoh zel tur a ni.

Tin, Member zahawm tak ten an sawi, Pipu Tlang an tih mai a kha, a lehlamah chuan kan Doctor te, kan medical-a thawkte reng reng hi thahnem an ngai a, chhun zan zawmin hna an thawk a. Chutih rualin an mangnghilh nia ka hriat ve chu intih thengthawtna tur leh intih thawvanna tur hi an nei lo reng reng mai a. A dik tak chuan building ringawt khan an rilru a khat a, chu ai chuan hmun han infiamna tur te, table tennis te emaw, han intih zangkhaina tur te hi hmun awm se chuan an tan pawh thawktute hriselna leh hlimna leh an inpawh nan pawh hian a that ka ring a. Chu chu Member zahawm tak ten, Health Department ram sahthlak tur emaw an tih lai a kha, kei ka thinlung tak tak chuan Pu Speaker, mimal takin anmahni staff te tan pawh hian pawl lovin kan hre deuh hlek a, an hriselna tan pawh a that ve ka ring a. Amaherawhchu, sawlai ram engchin nge niang tih lai erawh chu la sawikhawm tur a ni a, Member te an zahawm a, ka react vek seng lovang, tih ka hlau deuh a. Tin, nichina ka sawi ang khan hun a lo kal ang a, a tih a tih zawngin rawn ram tang ila, kan tih kha tha mai teh se a. Health Department ah chuan theihtawp chhuah kan tum a nia.

**Pu LALDUHAWMA** : Min han phalsak leh la, larawn react leh la, Bajaj Alliance-a vaibelchhe 10 lo dah a kha sorkar sum ni si a kha, mimal sum angin an va deposit ta a. A mature hunah khan anmahni lo chuan an draw thei si lova, an draw chuan affidavit emaw, engngemaw siamin an intiamna ang khan sorkarah an chung let ngei dawn em, tih finfiah theihna a awm em? tih kha ka zawt duh a.

Tin, a Health Care Society-a a hotupa berah hian kan Chief Secretary hi kan hmang in ka hria a. Chief Secretary hrim hrim hi an buai a, Chair-na te hi an ngah a, mibuai lutukin hetiang mipui interest an khawih hian an hman lohna vang khan a muang thei a. Midang awl deuh zawkin hengte hi khawih ta sela, kan thatpui zawk lo'ng maw?

**Pu LALRINLIANA SAILO, MINISTER:** Pu Speaker, a lawmawm e. Ni e, khami mimal hmanga dah kha kan buai lai mek a ni a, kan buai reng a, i ti mai ang. Amaherawhchu, ringtu kan ni kan in ti a, kan Health Minister zahawm tak kal chhuak pawh khan mi rinawm ber nia kan hriat te hmingin kan dah a ni e, a ti a. Kha kha chu rin ngam turah ngai phawt ila, chuti lo chu tihdan dang awm vak hek lo. Tin, khami kha kan sawi leh ang a, ACB paw'n an chhui mek niin ka hria a. Ama'rawhchu, Member ten ti taka kan ngaih pawimawh avangin leh mipui hmangaihna avangin ACB in an khawih chungin sawifiah ngaiin ka hria a. Tun atang chuan ACB in an khawih vangin a khar leh theih tawhin ka ring a, Pu Speaker.

Theihtawpin kha lai kha tha turin kan han ti a. C.S. hi a buai khawp a, mahse a fit a, a tang ve fuat fuat viau a nia. Kan tifel mai ang, a kal ve zel a nia, hei a lawmawm khawp mai.

**S P E A K E R** : Tikhan Health kha i conclude dawn tawh em ni? Kan MLA te hian morgue Van neih tam hun kha an nghakhlel viau in ka hria.

**Pu P.P. THAWLA** : State Bank-a crore 10 dah kha a interest engzatnge ni tawh ang tih hriat kan va chak ve, Member ten.

**Pu LALRINLIANA SAILO, MINISTER:** Pu Speaker, nichin khan zawh a ni tawh a, written khan chhan a ni tawh a. Crore 10 kan han tih kha critical illness ah te lo hman hek tawh a nih vangin crore 10 a tling tawh lova. Chuvangin interest tuna ka rawn chhanna kha chu nuai 12 vel a ni e. 13 a tling lo hret a. Chu chu tun dinhmun a ni a, theihtawpin kan tang e.

**Pu K. LIANTLINGA** : Pu Speaker, ka'n zawt ve lawk, Bank ah hian a interest kha engpawh nisela, nuai 50 chin chunglam, nuai 100 chin

vel a hi chu 6% vel a ni tho a. Hemi fixed deposit ah hian nuai 12 vel ang chauh kha chu, crore 2 vel ang chauh interest a ni pha a, engzat chiah nge awm le. Khati lai hman bang a kha le? tih kha a han clarify thei em aw? tih kha ka zawt duh a ni.

**Pu LALRINLIANA SAILO, MINISTER** : Ka rawn chhan dan a kha min lo pek dan a ni a, kan lo enfiah leh ang e, chiang deuhin kan lo pe leh ang che u. Tin, kan tih rei ngam lohna chhan kha chu ADB (Asian Development Band) atangin hmu thut ta ila, kan kalpui thut a ngai dawn si a. Ti khanin a interest tlem te te khan, reilote te kha kan dah a. Tin, kan hlauh deuh avang leh mi pawn min rawn chirhtheh zui ang tih kan hlauh avang khan a interest hniam te te ah phawrh awl tur khan kan dah hrim hrim mai a. Tin, vaibelchhe sawm kha a tling tawh lo hrim hrim bawk a tih kha ka'n sawi duh a. Chiang takin Member zahawm takte pek kan rawn tum dawn nia.

Tin, Morgue Van chungchang kha, kan Chief Minister-in Cabinet kan neih hmasak berin Health chungchangah uar takin a sawi a. Chumi bawhzui chuan thingtlang lam bialtu te tan pawh a hahthlak a, mitthi an awmin harsa takin an rawn kal a, an hawng leh lam hi an khawngaihthlak e, tiin, “Morgue Van lei belh ang”, a ti a. Tichuan kan lei belh nghal a, tlema khaw kar kil deuh hleka kal thei chi te pawh kan lei a. Hemi 407 kan tih ang chi te, Bolero Camper ang chite pawh kha kan lei a. Lunglei ah te, Aizawl ah te pawh dah a ni a. Hei hi a hranpain kan lo la ti leh lo a ni mai thei a, a then chuan an hmang tangkai tawh a. Tin, kan indaih lo nain kan thlir zel dawn nia.

Tin, Morgue Van tih rualin Morgue House, chanchinbuah te pawh a lang thin a, Morgue House te pawh hi tih kan tum a. NEC ah khan cheng nuai 180 chuang deuh hlek kha kan han thehlut a, ama'rawhchu, a rawn muang deuh a. Tunah sawn sawlai kan mipuite leh mitthi te, khati ringawt maia an awm ai chuan tiin nuai 13 velin han ti phawt ila, kan ti a. A tihvawhna ang chi te, mipui a huhova engemaw accident ilo te pawh a lo awm palh a, an lo chawlh hahdamna tur ang chite pawh rilruah a lang tel a, chutiang chuan zawite tein hma kan la a.

Tin, Pu Speaker, ka'n sawi leh duh a chu tuna kan Hospital, Aizawl saw a awm anga kan tih saw chuan a lo rei deuh ang a, a tawp dawn lutuk ringawt mai a. Theihtawpin thawktute tang mah ilangin, a hmun awmdan leh a plan a dik loh avangin rilru chuan a rang thei ang bera Referral Hospital te pawh va thlen kha, va insawn phei te pawh saw a lang a.

Tin, Referral Hospital kha Member zahawm tak ten an sawi zawk a. Vaibelchhe 4 leh nuai 61 kha tun sorkar tharah hian hmuh a ni a. Amaherawhchu, fair takin kan ti leiba an lo neih zawng zawnga kha kan clear vek a, Pu Speaker. Tichuan, P&E ah te kan dah a, tin, PHE ah te, PWD ah te chuan kan theih ang angin Departmental-in hna an thawk a. Tunah sawn work progress chu a tha viau a ni. Bed 220 thlen kan tum a, chu chu Referral Hospital pawh saw kan khawih dan ka'n sawi a ni. Sawi tur a tam ang...

**Pu NIRUPAM CHAKMA** : Pu Speaker, point pakhat chiah, point of clarification. Khami Health Care Scheme Bajaj Alliance ah investment a siam, Mizoram Health Care Society-in. Hei, Insurance Company reng reng hian direct-in pawisa an dawng lo a ni a. Hetia deposit tawp a ni lo a ni. Tu agency hmangin emaw investment kha an siam thin a. Policy neih tur chungchang kha. Tuna crore 10 investment ah khan tunge ni agent? Chumi tal chu min hrilh thei em? Tu agent hmangin nge investment an siam?

**Pu LALRINLIANA SAILO, MINISTER:** Pu Speaker, pakhat ka sawi leh tur chu tlem kawk tih lai a te kha engemaw han chhut sual palh a ni thei ang a. Tin, tuna kan Health Care tho a hi a ni ta a. A hma khan ADB ami kan hmuh tur a kha lo reflect a lo nih loh avang khan vaibelchhe za leh tih a, tuna hniam duai a lang ta a kha hemi tho hi a ni a. A lo thlen tak avang khan dah leh kha a ngaih kher tak loh avangin, khalai hniam ta duai a sawi lai a kha a nihna phung dik tak zawk chu a ni.

Labour & Employment ah kal ta ila. Tawi te te in ka'n ti tawh ang e. Labour & Employment hi kan hria a. India ramah te chuan Department pawimawh ber anga ngaih a ni a. An Secretary te pawh khu Labour & Employment-a an pension lo a nih chuan, hmun pawimawh takah an awm chho leh thin a. Tuna Secretary kan zu dawr thin, Sudha Pillai-i te pawh kha tuna kan Home Secretary zahawm tak nupui, tunah hian Planning ah a awm leh nghe nghe a. Mizoram ah nikum March ni 6 ah a rawn kal a, chungte pawh chu, 'lo kal leh ka chak e', a rawn ti a. Kan zu dawr ve thin a, Department pawimawh si hi keini ang State te ah chuan a pawimawh thei tlat lo mai a. Chuvang chuan, han inhau in, han ti fe mah ila, kan Labour welfare te ropui taka an kal theih loh chuan State kha a ropui lo tih a chiang a ni. Mizoram ah chuan Labour Commission te chu mi tlawn leh biak that kha an lo ni a, chu chuan Labour Department a len theih lohna chu kan ram economy te, kan asset heng ang Industries te kan neih loh zia a ti lang chiang em em a ni. Industries worker pawh kan nei tha lova, khalam kha chu thui tak kan sawi lo ang a. Chuvangin Department pawimawh hle si hi a pawimawh tur ang hian kan ti thei lova, chuti chung chuan kan Chief Minister te hian an ngaihtuah a, nimin ah pawh khan MPSC in order a rawn chhuah a, Employment Officer pathum min lak sak a ni. Tin, Labour Deputy Commissioner tur post min siam sak leh a, chutiang chuan tih hmasawna turin hna kan thawk a, a pawimawhna hrang hrang hi kan sawi vek lo ang.

Tin, Pu Speaker, chutih rual chuan building & other construction worker- cess Rules 1998 a hi a pawimawh a, Supreme Court order a nih avangin hei hi kan kalpui a ngai dawn a. Nichin ah kan Chief Minister zahawm takin a sawi a, Chanchinmawia vanduaithlak takin a accident a, chutiang chuan kan kuthnathawk tute hi an Artesawn thih a. Tin, an tuar tlawk tlawk mai a, a thawktu ber hi. Chu chu hemi Rules leh Acts hian a rawn chhan dawn ta a. Construction work reng reng 10 lakhs and above ah khan 1% chhun luh tur a ni. Chu chuan Labour te dinhmun hniam tak mai, accident palh a JCB in a ban a chil bung tih te, electric atangin a tla tih te, khang hrang hrang a kha a lo

tuamkhawm dawn a. He mite welfare atan liau liau hian hei hi hman tan tumna a nih thu te kan sawi duh a. Chutih rualin tunah hian Central atangin hemi a pawimawhna hria in Central hian hemi Skill Development Initiative tih hi a ngai pawimawh a. India ram ina a tlakchham nia an hriat a chu Skill Worker kan nei tha lo hi a ni a. Chu chuan kan economy a vawrh kang thei lo, tiin pawisa pawh a phalrai ta hle a. Tichuan hemi tuah hian Skill Development Initiative hi a ngai pawimawh a. Tunah hian kan Chief Minister zahawm takin Youth Commission chu Employment hnuaiyah a rawn dah ta a, hei hian kawng tam takah hma min sawn tir ka ring a. Kan Minister zahawm tak Pu Zodintluanga ho khan hei thalaite zirna ah te training an lo pe a, tiang khan hlawhtlinna nasa tak pawh an lo nei nghal a. Tunah hian khang kha Sports & Youth Services atang chuan fund a awm mumal theih loh avangin Labour & Employment atang te, Tribal Affairs atang khuan sum a awm theih dawna a lan avangin kan tih leh turah pawh hian nakum ah hian, kumthar ah hian, khatianga training na kan neih ah khan a thlawn a tih kan tum ta a. Zirlai 120 lai chu Central-in an rawn tum vek kan ring a.

Tin, chutiang atan chuan tunah hian Lunglei leh Saiha ah cheng vaibelchhe hnih leh nuai sawmnga ve ve min rawn pe a, sorkar tharah hian. Saw saw an kalpui mek a, Building te an sa a, chuta tang chuan equipment te, khang ang thangthar kum 14-19 inkar te thawk thei khan training na tha nei tur khan, Labour & Employment pawh hmasawn chhoh zel kan inring a, tunah hian. Officer pawh lak kan tum leh a, kan hotuten min pe zel a, a lawmawm kan ti tak meuh meuh a. Tin, tunah I.T.I vengah khuan chutiang chuan Rs.250 crore hmalak mek a awm bawk a. Inhmachhawpna tam tak hi chu sawi ta lo ilang, hun te a tlem tawh bawk a. Labour & Employment hi kan tihfuh a, thalai, thangthar te kan sawi tawh thin a, kan lo develop that a ngai a ni. Globalisation Corporate Rule ah kan awm tawh a, Multi-National Company an lo lut dawn a ni.

Hei, Look East te kan tih chuan an lo lut tuk tuk ang a, chutah chuan kan thalaite khan khami Company kha a nihna tur dik taka an lo hmuh a, an lo thlen kha a ngai a. An thawh theih chin tur kha kan lo siam sak a ngai dawn ta a ni. Chumi tur chuan hemi Skill Development Initiative tih te, Capacity building tih te hi a pawimawh em em a. Kan thawktu ten, Officer ten tunah hian an thawk char char a. A technical ang reng a, Labour Employment hi chuti chung chuan thahnem kan ngai em em a ni, tih kha ka sawi leh duh a, tawite in. Tin, Pu H. Zothangliana, Member zahawm tak, tuna zawhna kha a hming maia saw laiah sawn kal a ni a. Zepthu a awm lova, Chawngte ah pawh hian hman laiin a awm thin a. Amaherawhchu, khatiang tak a nih avang khan a tih tak tak theih lova, a hmingin UD khu chu an la awm ve in ka hria a, Chawngte ah sawn. Chutiang chuan Lawngtlai ah pawh sawn a dinhmun a ni a. Amaherawhchu, tunah sorkar tharin hma an la a, Officer te kan lak chuan khawiah nge kan post ang, tih kha kan han zir chiang ang a. Fumfe takin chu chu hma lak kan han tum dan a ni.

Trade & Commerce hi kan hria a, tawite in nichinah kan ngaithla tawh a. Nikum lamah Rs.60 lakh revenue ah kan chhunglut ve a, tunah 75 ,

kuminah hian 100 min han phut a ni a. Chutih ruala ka sawi duh chu kan Budget kha kan hmu ang a, Plan leh Non-Plan tlingkhawm pawh kha vaibelchhe 4 vel a ni a. Vaibelchhe 4 vel chutiang a nih rual a, vaibelchhe khat tlin tura min ti kha chu leh lamah chuan a lawmawm ka ti a. Department ah sorkarin rinna a nghtat tih a chiang a, a lawmawm hlein ka hria. Khatiang anga Revenue collect tur te leh hmasawn tur chuan a Budget a pawh kha pun ve deuh te pawh kha kan duh hle a. R.E. lamah chuan kan beisei sang hle a, tin, ti tha kan inti ve hle a ni. Tunah hian market neuh neuh ang hi 174 kan enkawl a, tiang chuan keini hi kan chhangchhe khawp a.

Pu Speaker, lawmawm deuh mai chu, sawng New Market tawp niai nuai thin, pick pocket a tam tih te, Krismas leh engemaw nikhua ah phei chuan kal hleih theih lova innawk kha kan thawktu ten an thianfai ta a. Mi 134 kha sawmi a kawtzawl atangin sawnin an han nawr lut ta a ni a. A har khawp mai a, rawn ti bawrh bawrh pawh an awm a. Amaherawhchu, pakhat mah buaina chhuak lova kan thawhpui ten an ti thei hi lawmawm ka ti a. Tunah chuan a fai hun tawh mai a, sawlai saw. Khatiang khan sawng pawh saw kan han bei chho zel a, tunah kan hotuten min hrethiam a, a lane pawh saw tih that kan tum a, nuai 120 tunah last minute ah min rawn pe leh a ni. Chutiang te chuan New Market pawh saw fai zawk leh changtlung zawka siam kan tum a ni.

Tin, hei kan sawi fo, Member zahawm tak te pawhin an sawi a. Zokhawthar chungchang han sawi hmasa ila. Kum 1994-a Agreement lo sign tawh a ni a. Khatah khan thawhhona tur ang chi kha fel taka hmalak tawh a ni a. Tichuan, engemaw ti ti chuan kan sorkar hmasa kha a lo kal ve a, a lawmawm a. Tunah chak takin kan han ti chho leh a, kan inpe tawn reng a. Tin, a leh lamah chuan a hawn ang tak leh thil ti tak tak tur khan a process leh a behbawm a lo tam lutuk a. Tahchuan, Integrated Check Post (ICP) te kha Home tih tur kha a lo ni leh a. Passport exchange te leh thil dangte kha chutih rualin keini chuan kan Secretary hovin Directorate te an tang em em a, lu letin an tang a ni ringawt mai a ni. Kei pawh ka hun chhungin wawi 5 ka han thleng chho tawh a, Zokhawthar ah khian. A changin Helicopter ten kan chho a, Central an rawn phur em em a, kan Chief Minister in vawikhat a'n ziak a, keini'n kan bawhzui a.

Tunah khian Food Laboratory Testing Centre tih kan tum a, chu chu kan beisei sang khawp a. Chutih rual chuan tui in tur nuai 156 min rawn sanctioned a, tunah hian kan sorkar hnenah a rawn thleng tawh a. Tin, khi lamah khian warehouse sak a ngai e, kan ti a, nuai 216 min rawn pe bawk a, khi laiah khian tan kan la nasa a ni. Chutih rualin Pu Speaker, Bangladesh lam a ni emaw, Zokhawthar lam a ni emaw, hetia sorkar leh sorkar muang deuh ruih maia a kal hi keinina a State anga kan lo hmanhmawh ang hi chu a ni lo, tih hi min lo hriatpuia tha a, tunah khian hawng thei turin kan in beisei tawh a. State Bank, International link thei tur kha dah a ni tawh bawk a. Central-in a rawn phur chho a, kan hotuten an pump thiam bawk a, a lawmawm tak meuh meuhin ka hria a. Khi khian kuthnathawktu leh kan thlaithar te kan deh chhuah chi hrang hrangte inthawn tawna ah nasa taka hma a sawn kan ring a.

Tin, Bangladesh ah kan hriat angin hmanni ah conclave kan nei a, ni 22.7.2007 khan. Tah khan MoU kan sign a, West-I bialtu zahawm takin a rawn sawi ang khan. Anni khan ti hian an ti a, test nan Aieng leh Sawhthing thlakhat chhungin trip khat ve ve an rawn ti thei ang em? an ti a. A hralh duh zawk kan ni si a, a season lo nain a hralh duh zawk leh a mamawh zawk kan nih hi, tiin 'thei ang', kan ti a. Hei hi sawi chian pawh a thain ka hria a. Tichuan, kan inthen ta kha kan zu email thin a, kan zu telephone dawn thin a, inbiak zeuh a awm a, biak theih loh kha a tam zawk thin a. Chutih rualin inbiak pawh chhunin Germany ah ka kal a tih te, London ah ka kal a, tih te kha Abdul.... a kan Chairman kan tih khan a rawn execute thin a. Tichuan, thla a lo ral a, Aieng kan collect tawh si a, Sawhthing kan collect tawh si a, a season lo mah nise, a thutiam hlen zawkah i tang ang, kan ti a, ti thei lo chung chung khan kan collect ta a ni. Tichuan, Sawhthing leh Aieng te kha a chhe dawn mai si a, a chhiat hmaa thlen kan tum a. Tichuan, co-incident takin tlangval Zarzokima an thah kan zu ral tum khan kan Deputy Chairman MAMCO ho khan an rawn phur thla a. Tichuan, kalpui kan tum a, khumi Tripura ah khan kan lut bawk a, boundary an cross thei bik ta lova. Chutiang chuan hma kan la thlap a, kan inhmuh leh niah chuan kan ti a, chu chu thla fe a kal tawh a ni.

Kan inhmuh ta chiah reng a, Pu Speaker, Kolkata ah kan inhmuh ta a, kan in charge ta chiah a, heti hian ram leh ram agreement kan siam a. En rawh, thlakhat chhungin tiang hian mi rawn ti a, keini chuan kan rawn ti a ni. Hei hi a thlalak a ni, kan ti dap dap a ni. Chumi ni, khumi ni ah kan rawn keng a, nangni enge ni hetiang hi in tihdan tur em ni, kan ti a.

Tichuan, 'ka mobile a bo a, a chuti khati', a ti kual a. Excuse chhuanlam tling lo a ni. Tahchuan Delhi ah kan inhmuh leh a, kei chu ka ti zui tho a. Chutah kan han rel khawm a, hetiang mai maia an kal dawn chuan Bangladesh hi.... kan zu kal ang a, hei invitation kan hmu bawk a. ICC in hemi North East pumpui intawh khawm a kha .... Kan zu kal ang a, hemite ho hi a rukin zawng ang u, kan ti a.

Tichuan, kan zuk thawk rip hle a ni. A rukin kan zawng bawk a, kan ti bawk a. Chutih rualin Pu Speaker, tunah hian free market-a kan kal tir avang hian a leh lamah chuan a ruka zawn te, a ruk lo pawn kan zawng ngei ang. Kha pa pawh kha kan zu hmu leh a ni, Chairman a kha. Engtin nge in... rawn thleng ta a, kan agreement hi engtin nge kan kalpui dawn? Hei hi engtin nge kan tih dawn? kan ti ta a ani. Thusawi naah sawilan ka tum a, amaherawhchu, kan thawhpui ten, 'ngawi rawh, chuti thuai chuan la ti lo deuh teh', an ti a. North East pumpui leh Bangladesh te nena kan Trade conclave submit ah pawh khan tih thuai ka tum a, amaherawhchu, 'la sawi lo deuh teh, la nem teh ang, a mamawh zawk kan nih hi', an ti a. Tichuan, kan zawng ta char char a. Tunge kan contact ang? kan inti a, Chitap ah kan phei a. Chuta tangin an Minister te an fel a, an Mayor te an fel a, chaw te min eipui a, kha kha kan tum ber a ni a. Party thenkhat ten Cox's bazaar ah hralhna a awlsam lutuk an tih te hi khawng i va thleng teh ang u, kan ti a. Pu Speaker, Cox's



bazaar thlengin kan kal a, a bazaar market te kan en a. Hemi House zahawm takah hian ka'n sawi duh a chu chu.

Amaherawhchu, khami kalkawng a kha a tawn tawnin tihpuitlin sorkar ve vein a ngaih avangin khalai a kha tlemin bul tan duhna ka nei a. A dik tak chuan hei kan hria a, Bangladesh lam hi sorkar a lo inthlak hnu hian tuna sorkar khuan rilru ngaihda a rawn thlakah hian kawng a eng ta a ni mai a. Kan Chief Minister zahawm takte Hotel Sheraton-a sawmna angin chaw an eikhawm naah an sawi bawhzuiin, tiang khan hma kan la ve zel a. Khami kha kan umzui zel a ni a. A sorkar leh sorkar, India leh Bangladesh a nih rih avangin keini lamah erawh hi chuan khalai ah khan thui tak a kal theih loh a. Chuvangin kan level ah kan ti ngat ngat a, tunah hian Kawrpuichhuah atang sawnin Rs. Vaibelchhe 27 kha Home Department ah DPR kan theh lut a.

Tin, chutih rualin Pu Speaker, saw laiah sawn trade facilitator an ti a. Tlabung hmunah sawn nuai 110 velin sak mek a ni a, chu chu an la sa zo lo deuh a. Tichuan, Prime Minister hnenah te, Banker ah te, an Mayor hnenah te pawh kan sawi a, kan thawhpuite an hah tak meuh meuh a. Chu chu Dr. Thangtea kan Member zahawm takin chiang takin min hrih teh se, a tih kha ka chhanna ni nghal bawk se, kan vaia hriat ka duh a nia.

Kawrpuichhuah a lei dawh leh sawlam, a piah lam kha kan buaipui ber a ni. Chuvang chuan LL to LL, Landlop to Landlink kha siam tum a ni a. Bangladesh Prime Minister zahawm tak hnenah chuan ka pi Landlop to Landlink hi i kut chak takah hian kan beisei a ni, ka ti a. Ani pawn Kawrpuichhuah chu kan ti ang, tih Chief Minister hnena a lo sawi tawh ang khan, ama inah ngei, a sitting room ah ngei chuan a sawi leh a. Kan hlim hle a, chutiang chuan theihtawpin hma kan la a. Tunah hian kan Chief Minister zahawm tak hmalakna avangin April thla hian Home Department atangin sawlai chu enfiah turin an lo kal dawn a ni. Chutiang chu Trade & Commerce-a kan hmalak dan a ni a. Tin, Pu Lalthansanga, Member zahawm takina khilai Bungtlang a zawhna kha a 2<sup>nd</sup> installment chu lo kal leh mai tur a ni, tih kha ka hrih duh nghal a ni.

Pu Speaker, kan theih tawkin Trade & Commerce ah pawh hma kan la a. Thil pakhat, nichina Member zahawm tak Pu Duha sawi ang khan keini Trade & Commerce hian Industry tena kan khawih a ni lova. Hmannia a zawhna pawh kha kan chhang lo thei lova. Parliament atanga thu lo kalah zawhna reng reng transfer tur a nilo, tih a nih vang khan keini'n a concern ah kan va dil ta a. Keimahni rawn zawh avang khan kan chhang a. Kha te te kha Member te zahawmna kan hmu ah kan inngai a. Chhang lo thei loin kan awm a. Parliament ina a practices thar a nih avangin khalai ah khan kan inzawh sual a awm thei tawh lo tluk a nih chu, khatiang kha a ni. Tiang chuan facilitator ang deuh hlek hian a kawhmuah kan neih a ngai a. Tin, Bangladesh amiin a sawi tak a chu, pakhat a sawi zauh a chu, nangni chu sorkarin inti vek zel a; mipui, company leh cooperation leh khatiang ang PPP mode ang pawn kal ve ula, min ti zauh a ni. Nia, a ni lah tak a, Horticulture a ni emaw, Agriculture a ni emaw hetiang ang hrang hrang a hi Department-in a sanction an ti bawk a, a

execution an ti bawk a, a market an ti bawk a. Khatiang khan a leh lamah chuan an tan hian khawvel ken dan a lo ni si lova, tlem chuan helai pawh hi keini pawhin kan in enna tur pawh a awm vein kan hria a. Sawi tur tam tak a awm ang a, Member ten clarify tur a awm hranpa tawh loh chuan zo mai ila a tha awm e, Pu Speaker.

Tichuan, ka Department chan Demand No.24 na Medical and Public Health Services Rs.159,49,15,000/- leh Demand No.28 nal Labour and Employment Department Rs.6,10,60,000/- leh Demand No.44 na Trade and Commerce Rs.4,69,63,000/-, a vaiin Rs.1,70,29,38,000/- hi he House zahawm taka min pass sak turin ka rawn ngen e. Ka lawm e.

**S P E A K E R** : Awle, Pu Lalrinliana Sailo in a rawn wound up in a Demand pass a rawn dil ta a. Chungte chu - Demand No.24 na Medical and Public Health Services Rs.159,49,15,000/- leh Demand No.28 nal Labour and Employment Department Rs.6,10,60,000/- leh Demand No.44 na Trade and Commerce Rs.4,69,63,000/-, a vaiin Rs.1,70,29,38,000/- te hi passed remti apiangin 'remti' tiru le. Remti lovin 'remti lo' tiru le. Remti lo kan awm lo maw ?

Awle, Pu Lalrinliana Sailo Demand No.24 na Medical and Public Health Services Rs.159,49,15,000/- leh Demand No.28 nal Labour and Employment Department Rs.6,10,60,000/- leh Demand No.44 na Trade and Commerce Rs.4,69,63,000/-, a vaiin Rs.1,70,29,38,000/- te chu House in lungual takin a passed ta a ni.

**Pu LALRINLIANA SAILO, MINISTER** : Pu Speaker, ka lawm e.

**S P E A K E R** : Awle, wawiina kan tih tur chu kan lo zo ta a. Kan chawl tawh ang a, naktuk ni 30.3.2010 Thawhlehi zing dar 10:30 ah kan thukhawm leh ang.

Sitting is adjourned at 7:00 P.M.